



















38728/B

70







M U S A R U M  
Anglicanarum

*A N A L E C T A :*

S I V E,

Poemata quædam melioris notæ, seu  
hactenus Inedita, seu sparsim Edita,  
In duo Volumina congesta.

---

*V O L. II.*

---



*O X O N.*

E Theatro Sheldoniano, Impensis *Joh. Crosley,*  
An. Dom. M. DC. XCIX.



348133





---

---

# PRÆFATIO.

**A**lterum habes, Erudite Lector, Musarum Anglicanarum Volumen: sed illud & genuinum & Autorum permissu impressum. Londinensi Editori hanc laudem concedimus, ut Poetarum famæ dispendio sibi quæstum faciat; illis parum invidentes, qui opera adeo mutila & furtiva Typis mandârunt, ut deformes partus aut non agnoverint ipsi Parentes, aut agnitis erubuerint. Ista vero expolita jam & absoluta Tibi non displicere confidimus, quæ inchoata tantùm & inculta humanitèr acceperis.

Fatendum est tamen opus hoc minùs esse perfectum, quòd nullis Cantabrigiensium exornetur Carminibus. Illud verò infortunium nimicæ potius ipsorum modestiæ tribuendum est, quàm nostris votis, qui præstantissima illorum Poemata non semel frustra expectavimus. Eorum sanè haud pauca summâ cum voluptate legimus, quibus denuò recudendis Prælum Sheldonianum (si ita visum fuisset Autoribus) non sine honore inserviisset. Nolumus tamen alicujus scripta sese inscio in lucem emittere, ne invitis videremur donare famam, & nostro exemplo approbare, quod in Poetico Wellingtoni Examine redarguimus.

Nobis interim ignoscat Academia Oxoniensis, si quorundam Carmina rejecerimus, ut tertio Volumini sua etiam superessent ornamenta.



## PRÆFATIO.

*De Autoribus nostris multa præfari supervacaneum ducimus. Defunctorum gloria supra invidiam posita est; quam à viventibus amoliri versus nequeunt vel accuratissimi. Tecum modò cogites, quàm castigata Whitfeldi Poemata ipso superstite in publicum prodissent, quæ posthuma licet, & ab adolescente conscripta, tam eximiè elucescunt.*

*Nullarum denique partium studio addicti delectum hunc confecimus: de Carminis elegantia, potius quàm argumento solliciti. Facile autem advertes, Illum plura excitasse Poetarum ingenia, qui ampliorem præbuit Poetis materiem. Nec istud Tibi ingratum fore speramus Gulielmum nostrum tot laudis suæ præcones habuisse; nisi forsàn ægrè tuleris Vatem tantæ virtuti celebrandæ non inveniri parem.*

INDEX.



# INDEX.

- P**AX, Gulielmi Auspiciis, Europæ reddita, 1697.  
*J. Addison, A. M. Coll. Magd. Soc.* Pag. 3.
- In Exoptatum Gulielmi Regis ex Hiberniâ Reditum, 1690.  
*Edu. Hannes, A. M. ex Æde Chr. & Prof. Chym.* p. 12.
- Mulæum Ashmoleanum, *Jo. Dolben, Archiep. Ebor. Fil.*  
*Ædis Chr. Alumnus.* p. 16.
- Passer, *T. S. Ædis Chr. Alumnus.* p. 22.
- Araulio Recepta, *Ric. Mariett ex Æde Chr. Superioris*  
*Ordinis Commensalis.* p. 24.
- Administratio Mariæ, *D. Ric. Vernon Baronett. ex Æde*  
*Chr.* p. 28.
- Inauguratio Regis Gulielmi III. *Henricus Aldrich, S. T. P.*  
*Eccles. Chr. Decanus.* p. 32.
- Academiæ Oxoniensis Comitia, Anglicè an Oxford Act,  
*D. Car. Boyle Comititis de Orrery Fil. natu minor, Gul.*  
*Hayes, Gualt. Gough Equitum Fill. ex Æde Chr.* p. 35.
- Barometri Descriptio, *Jo. Addison, A. B. è Coll. Magd.* p. 44.
- Dux Glocestrensis 1697. *Tho. Jones, è Coll. Magd. Supe-*  
*rioris Ordinis Commensalis.* p. 47.
- Inauguratio Regis Gulielmi & Reginæ Mariæ, *Th. Newey*  
*Ædis Ch. Alumnus.* p. 52.
- ΠΥΓΜΑΙΟ--ΓΕΡΑΝΟΜΑΧΙΑ, sive Prælium inter  
Pygmæos & Grues commissum, *Jo. Addison è Coll.*  
*Magd.* p. 56.
- Aula Vindeforiæ D. Georgio Instaurata, *T. Spark Ædis*  
*Chr. Alumnus.* p. 64.
- In Obitum Augustissimi & desideratissimi Regis Caroli II.  
*Jacobus Harrington Ædis Chr. Alumnus.* p. 73.
- In Funus Viri Clarissimi Jacobi Harrington, Egregii  
Poetæ, & Jurisconsulti Peritissimi, *G. Adams Ædis*  
*Chr. Alumnus.* p. 77.
- Taurus



# INDEX.

- Taurus in Circo, *Fr. Knapp, è Coll. Magd.* p. 80.
- Pugna Gallorum Gallinaceorum, *Jo. Freind, Ædis Chr. Alumnus.* p. 85.
- Givetta Ardens, *Honorat. Car. Bertie, Honorat. Rich. Stewart, Steph. Lennard, ex Æde Chr.* p. 91.
- In Natalem Principis Walliæ, *Excerpt. ex Strenis Natalitiis Acad. Oxon. è Theatro 1688. Vincentius Corbet Baronett. ex Æde Chr.* p. 99.
- In Natalem Principis Walliæ, *Excerpt. ex Strenis Natalitiis Acad. Oxon. è Theatro 1688. Geo. Dixon, Ædis Chr. Superioris Ordinis Commensf.* p. 102.
- Jus Pilei Oxoniensis, *G. Adams Ædis Chr. Alumnus.* p. 105.
- In Thomam Clusium, five Campanam magnam Ædis Christi, *Tho. Spark, Ædis Chr. Alumnus.* p. 115.
- Desiderium Gulielmi. Horatius, Virgilius, Fannius. *Geo. Duncomb, Tho. Ingram, Tho. Bennet, Armm. Fill. ex Æde Chr.* p. 121.
- In Paludes ab Ormondo Duce siccatas, & Indigenas inde depulso, *Fr. Hickman, Ædis Chr. Alumnus.* p. 129.
- Prælium Navale, *Hugo Parker, Arm. Fil. è Coll. Magd.* p. 136.
- Britannia, *Sam. Lennard, Equ. Aur. Fil. ex Æde Chr.* p. 140.
- Curfus Glacialis, Anglicè, *Scating, Phil. Frowde, Coll. Magd. Superioris Ordinis Commensf.* p. 145.
- Pugna Boyniaca, Anno 1690. *W. Percivale, Ædis Chr. Alumnus.* p. 148.
- Descriptio Spectaculi, quod exhibet Templum Harlemania-  
num, *Steph. Clay, Coll. Magd. Dem.* p. 154.
- Resurrectio Delineata ad Altare Coll. Magd. Oxon. *Jo. Addison, è Coll. Magd.* p. 157.
- Microscopium, *Tho. Bisse, C. C. C.* p. 163.
- Decretum Oxoniense, Anno 1683. — *ex Æde Chr.* p. 169.
- Hircocervus. *Ant. Alsop, Ædis Chr. Alumnus.* p. 174.
- In Historiam Nativitatis Delineatam in Fenestrâ Orientali Eccles. Cathedr. Christi Oxon. Ex Munificentia  
Rev. D. Petri Birch. S. T. D. Eccles. Westmonast. Præbend. *P. Foulkes, Ædis Chr. Alumnus.* p. 180.
- Sphæ-



# I N D E X.

- Sphæristerium, *Jo. Addison, è Coll. Magd.* p. 187.
- Gloriæ Vis; sive Certamen Navale inter — Harmannum Anglum & Præfectum quendam Belgicum, Honoris ergò, commissum, *Phil. Fell, Omn. Anim. Soc.* p. 190.
- Ad D. D. Hannes Insignissimum Medicum & Poetam, *Jo. Addison, è Coll. Magd.* p. 199.
- Jacobus II. — *Recitavit in Theatro Apr. 23. 1685. — ex Æde Chr.* p. 202.
- Carmen Cornu Venatico Inscriptum, — *ex Æde Chr.* p. 211.
- Carmen Poemat. Oxon. in Obitum Augustissimæ & Desideratissimæ Reginae Mariæ Secundæ inscriptum. — *ex Æde Chr.* p. 212.
- Musæ Regem & Reginam Coronantes. — *Recitarunt in Theatro Apr. 23. 1685. D. Udal. Corbet Baronett. Joh. Sprot Arm. Guil Barber Arm. ex Æde Chr.* p. 213.
- Exequiæ Dolbenianæ: sive Ecloga in Obitum Reverendissimi in Christo Patris Johannis Dolben, Archiepisc. Eboracensis. *Sam Jones, Tho. Chester, Armin. è Coll. Mert.* p. 224.
- Scholæ Westmonasteriensis Descriptio: ad Reverend. in Chr. Patrem & Dominum Thomam, Episc. Rossensem, & Eccles. Colleg. Westmonast. Decanum. — *Scholæ Westmonast. Alumnus.* p. 231.
- Carmen in Obitum Augustissimæ & Desideratissimæ Reginae Mariæ, Anno 1695. *Henr. Sacheverel A. M. è Coll. Magd.* p. 237.
- Machinæ Gesticulantes, *Anglicè, A Puppet-show. Jo. Addison è Coll. Magd.* p. 243.
- Neptuni Vindicta: sive Inedia Undecim Dierum. *Phil. Fell, Omn. Anim. Soc.* p. 247.
- Fraus Nummi Anglicani: Anno 1696. *Jo. Trapp, è Coll. Wadh.* p. 255.
- In Obitum Reginae Mariæ. *G. Adams, Ædis Chr. Alumnus.* p. 260.
- Memoriæ Beatissimi Patris Joh. Fell, Olim Episc. Oxon. & Ædis Chr. Decani. — Cum Ipsi Monumentum poneretur. — *ex Æde Chr.* p. 264.
- Experimenta Machinæ Pneumaticæ ab Honoratissimo D. D.



## I N D E X.

- D. Boylæo Inventæ. *Henr. Stephens, A. B. è Coll. Mert. Soc.* p. 270.
- In Obitum Reginae Mariæ: Anno 1695. *Ant. Alsop, A. B. Ædis Chr. Alumnus* p. 275.
- In Novum Hôspitium, Chelseiani prorsus æmulum, ad Occidentalem Dublinii Plagam sæliciter exstructum, *Jo. Whitfeld è Coll. Mert.* p. 279.
- Ad Insignissimum Virum D. Tho. Burnettum, Sacræ Theoriæ Telluris Autorem, *Jo. Addison, A. B. è Coll. Magd.* p. 284.
- Maria Regina ex Gente Estensi. *Jo. Whitfeld, A. B. Coll. Mert. Soc. recitavit in Theatro Apr. 23. 1685.* p. 287.
- Carolus Princeps Walliæ ex Hispaniâ Redux Anno 1623. *Jo. Earle, Coll. Mert. Soc.* p. 298.
- In Juvenem Nobilem Sidneium, Caroli Montacuti Fratrem, Occisum à Batavis in Navali Prælio Anno 1672. *Ode.* p. 301.
- In Obitum Rev. Viri Edv. Pocockii, S. T. P. Ædis Chr. Canon. & Ling. Oriental. Prof. Reg. *E. Smith, Ædis Chr. Alumnus.* p. 303.

---

## E R R A T A.

*Tag. 32. lin. 1 & 2. dele & Reginae Mariæ. P. 43. l. 5. leg. accurrunt. P. 123. l. 22. leg. Atque Sophocleum. P. 171. l. 2. leg. igne.*

HONO.



---

HONORATISSIMO VIRO  
CAROLO MONTAGUE  
ARMIGERO,  
SCACCHARII CANCELLARIO,  
ÆRARIII PRÆFECTO, REGI  
A SECRETIORIBUS CONSI-  
LIIS &c.

*CUM tanta auribus Tuis obstre-  
pat vatū nequissimorum turba,  
nihil est cur queraris aliquid in-  
usitatum Tibi contigisse, ubi præclarum  
hoc argumentum Meis etiam numeris  
violatum conspexeris. Quantum virtute  
Bellica præstent Britanni, recens ex re-  
bus gestis testatur gloria; quàm vero  
in humanioribus Pacis studiis non emi-  
neamus,*



neamus, indicio sunt quos nuper in lucem emisimus versiculi. Quod si Congrevius ille Tuus divino, quo solet, furore correptus materiam hanc non exornasset, vix tanti esset Ipsa Pax, ut illa lætaremur tot perditissimis Poetis tam misere decantata. At dum alios insector, Mei ipsius oblitus fuisse videor, qui haud minores forsitan ex Latinis Tibi molestias allaturus sum, quam quas illi ex vernaculis suis carminibus attulerunt; nisi quod inter ipsos cruciatus lenimentum aliquod dolori tribuat tormenti Varietas. Nec quidem unquam adduci possem, ut poema patrio sermone conscriptum oculis Tuis subjicerem, qui ab istis conatibus cæteros omnes scribendo non minus deterres, quam favendo excitaveris.

HUMANITATIS TUÆ

CULTOR DEVOTISSIMUS

JOSEPHUS ADDISON.



---

*MUSÆ*  
ANGLICANÆ.

---

*Pax GULIELMI Auspiciis Europæ  
reddita 1697.*

**P**ostquam ingens clamorque virûm, strepitusque  
tubarum,

Atque omnis Belli cecidit fragor; Aspice *Cæsar*.

Quæ Tibi solliciti, turba Importuna, Poetæ

Munera deducunt: generosæ à pectore flammæ,

Diræque armorum effigies, simulachraque belli

Tristia diffugiant: O tandem absiste triumphis.

Expletus, penitusque animo totum excute Martem.

Non ultrà ante oculos numerofo milite campi

Miscentur, solito nec fervent arva tumultu;

Stat circùm alta Quies, curvoque innixus aratro

Desertas fossas, & castra minantia castris

Rusticus invertit, tacita formidine lustrans



4 MVSÆ ANGLICANÆ.

Horroremque loci, & funestos stragibus agros.  
 Jamque super vallum & munimina longa virescit  
 Expectata seges, jam propugnacula rident  
 Vere novo; infuetos mirabitur Incola culmos,  
 Luxuriemque foli, & turgentem à Sanguine Messëm.

Aspicias ut toto excitus venit Advena mundo  
 Bellorum invifens sedem, & confusa ruinis  
 Oppida, & everfos flammaram turbine muros!  
 Ut trepidos rerum Annales, tristemque laborum  
 Inquirat feriem, attonitis ut spectat ocellis  
 Semirutas turres, & adhuc polluta cruore  
 Flumina, famosofque *Ormondi* Volnere campos!

Hîc ubi faxa jacent disperfo infecta cerebro,  
 Atque interruptis hifcunt divortia muris,  
 Vexillum intrepidus [ 1 ] fixit, cui tempora dudum  
*Budenses* palmæ, Peregrinaque laurus obumbrat.  
 Ille ruens aciem in mediam, quâ ferrea grando  
 Sparfa fuit circum, & plumbi densiffimus imber,  
 Sulphuream noctem, tetrafque bitumine nubes  
 Ingreditur, crebroque rubentem fulgure fumum.  
 Ut vario anfractu, & disjectis undique faxis  
 Mænia difcedunt, scopulisque immane minantur.  
 Desuper horrificis, & formidabile pendent!

1 Honoratiffimus D. Dominus Cutts Baro de Gowran. &c.



Hic pestem occultam, & fecundas sulphure moles  
Cernere erat, magno quas inter mota tumultu  
Prælia fervebant; subito cum claustra fragore  
Horrendum disrupta tonant, semiustaque membra,  
Fumantesque artus, laniataque corpora lethum  
Corripit informe, & rotat ater in æthere turbo.

Sic postquam Enceladi dejecit fulmine fratres  
Coelicolûm pater, & vetuit contemnere Divos:  
Divulsam terræ faciem, ingentesque ruinas  
Mortales stupuere; Altum hinc mirantur abesse  
Pelion, invertique imis radicibus Ossam;  
Hic fluvium moles inter confusaque saxa  
Reptare, atque aliis discentem currere ripis.  
Stant dubii, & notos montes umbrasque requirunt,  
Errore ambiguo elusi, & novitate locorum.

Nempe hic *Auriaci* nuper vexilla secutæ  
Confluxere acies, hic, aspera corda, *Britanni*,  
*Germanusque* ferox, & juncto fœdere *Belga*,  
Quique truci Boreæ, & cœlo damnatus iniquo  
Vitam agit in tenebris, & Qui dudum ore perusto  
Decolor admoti prodit vestigia Phœbi,  
Undique conveniunt, totum conscripta per orbem  
Agmina, Nassovique latus socialibus armis  
Circumfusa tegunt, fremitusque & murmura miscent,



Tam vario disjuncta situ, tot dissona linguis.

Te tamen è mediis, [2] Ductor Fortissime, turmis  
Exere, Tu vitam (si quid mea Carmina possunt)  
Accipies, populique encomia fera futuri,  
Quem varias edoctum artes, studiisque Minervæ  
Omnibus ornatum Marti *Rhœdica* furenti  
Credidit invita, & tanto se jactat Alumno.  
Hunc nempe ardorem, atque immensos pectoris æstus  
Non jubar Arctoum, aut nostri penuria cœli,  
Sed plaga torridior, quâ Sol intentius omnes  
Effundit radios, totique obnoxia Phœbo  
*India* progenuit, tenerisque incoxit ab annis  
Virtutem Immodicam, & generosæ Incendia mentis.

Jam quoque torpentem qui infelix suspicit Arcton,  
Brumamque æternam frigusque perambulat, ursæ  
Horridus exuviis, *Gulielmi* ingentia facta  
Describit fociis, pugnataque in ordine Bella  
Attentus numerat, neque brumam aut frigora curat.  
En! vastos nivium tractus & pallida regna  
Deferit, imperio extremum [3] Qui subjicit orbem,  
Indigenasque hyemes, Britonumque Heroa pererrat  
Luminibus tacitis; subeunt nunc fusa *Namurcæ*  
Mœnia, nunc tardo quæ sanguine plurima fluxit

2 *Intellig. Infig. Dom. Christoph. Codrington, Unus ex Regii Satellitii Præfectis.* 3 *Muscoviae Imperator.*



*Boinia*, nunc dubii palma Indiscreta *Senefi*.

Quæ facies & Quanta Viri! Quo vertice in auras  
Assurgit! Quali firmat vestigia gressu,  
Majestate rudi, & torvo spectabilis ore!

Sic olim Alcides, immania membra Leonis  
Instratus spoliis, vastâ se mole ferebat,  
Evandri amplexus dextramque adjungere dextræ  
Cum peteret, tectisque ingens succederet Hospes.

Dum pugas, *Gulielme*, Tuas, camposque cruentos  
Accipit, in venis ebullit vividus humor,  
Corda micant crebrò, & mentem ferit æmulus ardor.  
Non jam Riphæos hostis populabitur agros  
Impunè, aut agitabit inultas Sarmata prædas.

Quis tamen ille procul fremitus, Quæ murmura vulgi  
*Nassovum* ingeminant? video cava littora circum  
Fervere remigibus, subitisque albescere velis.

*Anglia* solve metus, & inanes mitte querelas,  
*Nassovi* secura tui, desiste tumentes  
Prospicere in fluctus animo suspensa, trucesque  
Objurgare notos, tardamque requirere puppim:  
Optatus tibi *Cæsar* adest, nec ut ante videbis  
Sollicitum belli studiis fatalia Gallo  
Confilia, & tacitas versantem in pectore pugas.  
Olli grata Quies & Pax tranquilla verendum



Composuit vultum, lætosque afflavit honores.

Ut denso circum se plurimus agmine miles  
 Agglomerat lateri, ut patriam veteresque penates  
 Respicit exultans! juvat ostentare recentes  
 Ore cicatrices, & vulnera cruda, notasque  
 Mucronum insignes, afflataque sulphure membra.  
 Chara stupet conjux, reducisque incerta mariti  
 Vestigat faciem; trepidâ formidine proles  
 Stat procul, & patrios horrescit nescia vultus.  
 Ille graves casus, duri & discrimina belli  
 Enumerat, tumidisque instaurat prælia verbis.

Sic postquam in patriam foecunda Heroibus Argo  
 Phryxeam attulerat Pellem, lanamque rigentem  
 Exposuit Graiis, & tortile velleris aurum,  
 Navita terrificis infamia littora monstris  
 Describit, mixto spirantem incendia fumo  
 Serpentem, vigilesque feras, plaustroque gementes  
 Insolito tauros, & anhelos igne juvencos.

Te tamen, O quantis *Gulielme* erepte periclis,  
 Accipimus reducem, Tibi Diva Britannia fundit  
 Plebemque & Proceres, medias quacunque per urbes  
 Ingredieris, crebræ consurgunt undique pompæ,  
 Gaudiaque & plausus; mixto ordine vulgus euntem  
 Circumstat fremitu denso: Tibi Jupiter annum



Seriùs invertit, luces mirata serenas

Ridet Hyems, festoque vacat cœlum omne triumpho.

Jamque [4] Nepos Tibi parvus adest, lætoque juventæ  
Incessu, & blando testatur gaudia risu.

Ut Patrius vigor atque elati gratia vultûs

Cæsareum spirant, majestatemque verendam

Infundunt puero ! ut Mater formosa serenat

Augustam frontem, & sublimia temperat ora !

Agnosco faciem ambiguam, mixtosque parentes.

Ille Tuas, *Gulielme*, acies, & tristia bella,

Pugnasque Innocuâ dudum sub imagine ludit.

Nunc indignanti similis fugitiva pusillæ

Terga premit turmæ, & falsis terroribus implet,

Sternitque Exiguum ficto cognomine Gallum.

Nunc simulat turres, & propugnacula parva

Nominibus signat variis ; subitoque tumultu

Sedulus infirmas Arces, humilemque *Namurcam*

Diruit ; interea generosæ in pectore flammæ

Aflurgunt sensim Juveni, notat ignis honestas

Purpureo fervore genas, & amabilis horror.

Quis tamen *Augustæ* immensas in carmine pompas

Instruet, in luteos ubi vulgò effusa canales

Vina rubent, variatque infectas purpura fordes ?

4 Celsissimus Princeps Dux Glcecestrensis.



Quis lapsus referet stellarum, & fictile cœlum,  
Quà laceram ostendunt redolentia compita chartam,  
Sulphuris exuvias, tubulosque bitumine cassos?

En procul attonitam video clarescere noctem  
Fulgore insolito! ruit undique lucidus Imber,  
Flagrantisque hyemes; crepitantia fidera passim  
Scintillant, totoque pluunt Incendia cœlo.  
Nec minùs in terris Vulcanus mille figuras  
Induit, Ignivomasque feras, & fulgida monstra,  
Terribiles visu formas! hîc membra Leonis  
Hispidam mentitur, tortisque comantia flammis  
Colla quatit, rutilasque jubas; hîc lubricus Anguem  
Ludit, subfiliens, & multo sibilat igne.

Lætitiâ ingentem atque effusa hæc gaudia civis  
Jam tandem securus agit, positoque timore  
Exercet ventos, classemque per ultima mundi  
Impunè educit, pelagoque licentiùs errat.  
Seu constricta gelu, mediisque horrentia Cancri  
Mensibus arva videt; seu turgida malit Olenti  
Tendere vela noto, quà Thurea flamina miscet  
Æolus, & placidis perfundit odoribus auras.

Vos Animæ illustres Heroum, Umbræque recentes,  
Quarum trunca jacent & adhuc stillantia crudis  
Corpora vulneribus, quibus hæc optabilis Orbi



Parta Quies, nondum *Nassovo* abducite vestro  
Fida satellitia, at solitis stipate catervis  
Ductorem, & tenues circum diffundite turmas.  
Tuque, *Maria*, tuos non unquam oblita Britannos,  
O Diva, O patiens magnum expectare Maritum,  
Nè terris Dominum invideas, quanquam amplius Illum  
Detineant, Longamque agitent sub Vindice Pacem.

*J. Addison*, A. M. Coll. Mag. Soc.



*In Exoptatum GULIELMI Regis ex  
Hiberniâ Reditum, 1690.*

O D E.

**O** Fida Navis, quæ Dominum Anglicæ  
Reponis oræ, læta tibi fluat  
Fortuna semper, nec secundus  
Destituat tua vela ventus,  
Quocunque tendis; seu petis *Indiam*  
Secura lucri, seu generosior  
Bellum in triremes *Gallicanas*  
Non vacua meditaris ira.  
Scimus, beatam Quantus ad Insulam  
Accedat Hospes; scimus, ut impiam  
Gentem fugarit, multa mœsto  
Pollicitam melius Jacobo.  
Quid ripa surgens, aut medius liquor  
Contra Britannum robur, & agmina  
Sequuta *Nassavum*, & juventam  
*Montiaci* memorem Triumpho  
Juvare posset? Primus in obvios  
Mire efficacem exercet acinacem



Princeps, & insignes & imos

Exitio premit æquus uno.

Qualem Poetæ, quos Epicus labor

Ævo Latino eduxit in æthera,

Ponunt vel Æneam, vel acrem

Hostibus in mediis Achillem;

Ad quos colores non ego surgere

Ausim canendo, cum neque Spiritus

Ascendat æquus, nec modorum

Norma finat, tenuisque versus:

Talis *Gatheli* degenerem gregem

*Nassavus* urget. Non reducem pater,

Non speret uxor, si quis ensi

Fisus in oppositum propinquat.

Ac forte quisquam laudis amantior

Illum exequentem sæva negotia

Tiro laceffet, quem decorum

Multa domi generosa virgo

Ardet vicissim, quatenus æmulos

Omnes choreis & pede mobili

Excedit, aut apte vocata

Ad citharam patriam camæna.

Eheu, nec illi fæmineus favor

Profit, nec artes, quin miser occubet,

Humi-



Humique singultans amores  
Dimidios aliis relinquat !  
Sub Rege tali quid putet arduum  
Britanna pubes ? En, alacris tuba  
Invitat ! En, suspensa patrum  
Arma tholo repetamus unco !  
Juvabit arces scandere *Gallicas*,  
Plaudente Mundo, & prorueret oppida,  
Suumque Vulcanum in scelestas .  
Ferre domos. Erit, ut colonus  
Inducat *Anglus* curva *Lutetiæ*  
Aratra ridens ; tectaque regia  
Invertat ; & fessus sub umbra  
Egregiæ sedeat ruinæ.  
At tu remittas tempore postero,  
Cæsar, dolosam pectus in aleam  
Offerre pugnando ; Hoc Senatus,  
Hoc humili rogat ore Vulgus :  
An non propinquas atra Necessitas  
Concussit alas, & memori nota,  
Ne Tu venires inter arma,  
Admonuit, Jove sic jubente ?  
Aversus illi consilio Senex,  
Ubique partis clarus adoreis,



*Shombergus* in turmam haud merentem,  
Et medios properavit ignes;  
Quem nunc ademptum exercitus anxio  
Luctu requirit, non sine carmine  
Heroa laudante, & severis  
Invidiam faciente fatis:  
Frustra; Nec horæ, quas fuga temporis  
Avexit, optant ferre pedem retro;  
Nec Mens ab exangui figura  
Lapfa semel remeare curat:  
Non si medentes, unde potest, aquas  
Docta ministret *Ratlivius* manu;  
Non si *Drydenus* invidendo  
Pulsset ebur geniale plectro.

*Edv. Hannes*, A. M. ex Æde Ch.  
& Prof. Chym.



*Musæum Ashmoleanum.*

**S**ecretos ignota diu Natura recessus  
Captavit, non ante oculis, non obvia luci,  
Et sese, obscurâ Caligine tecta, remotis  
Abdideratve plagis, aut imomersa profundo  
Conatus risit varios, hominumque labores  
Elusit, nulla deprênsa indagine, nullum  
Admissura diem, nisi *Tradescantius* ausu  
Fœlici Maris & Terræ spatia ampla perenni  
Eminus Cursu, captivam pone tulisset  
Naturam, missumque nova in Compendia Mundum.

Ergo age, Musa, tuum duc in penetralia Vatem,  
Et totos evolve sinus, juvat ire per æquor  
Immensum, & diversa sequi miracula rerum;  
Jamque mihi extremis videor conterminus Indis  
Eoasque Domus, & Phœbi Regna tueri:  
O quam læta illic Nemorum spatiarer in Umbra,  
Ver ubi perpetuum, semperque injussa virescunt  
Gramina, & irriguæ succis melioribus herbæ!  
Quis mihi plantarum, longus quas explicat ordo,  
Commemorat vires, nostro sub fydere nasci

Quas



Quas olim vetuit pigri inclementia Cœli?

Angusto cum se non passus limite claudi

Et brevibus spatiis, sibi *Tradescantius* Orbem

Poscit utrumque dari; Sed enim si sole negatum est

Hic propiore frui, foecundaque semina rerum

Pulsa retro gravis aura necat, petit impiger Ortus

Æthereos, primæque adit incunabula lucis.

Certe aliquid nostris erat avexisse Carinis

Congestas Orientis Opes, spoliata relinqui

Regna vel antiquis superum celebrata triumphis,

Quos Famæ posuisse ferunt Monumenta futuræ.

Fallor? an ignoti video densa agmina Cœli

Dissimili specie, & variis depicta figuris?

(Seu vel mille modis radios percussa remittant

Phoebeos, seu Nativo fulgore coruscent)

Apparet tali *Thaumantias* Iris amictu,

Ipsa suos induta adverso sole Colores.

Non alium Regi dat decolor India cultum,

Cui texunt molles augusta insignia plumæ.

Ede, augur Romane, (tibi namque omnia constant)

Qui voces avium obscuras ac Nomina calles,

Ecqua tibi similis vasti per inania Cœli

Aereas inter volucres, turbamque sonoram,

Descriptum toties ornavit Pompa Theatrum?



Tuque etiam quanquam pariter divinus Aruspex,  
 Qui pecorum fibras, præfagaque consulis exta,  
 Fare age, quæ Nobis tulit hæc animalia tellus,  
 Quorum nunc simulachra juvat fixasque videre  
 Postibus exuvias ; ut adhuc immania pandunt  
 Ora, sitim prædæ patulo simulantia rictu,  
 Atque nova innocuus sequitur spectacula terror !

Sic cum vela daret longinqua per æquora Bacchus,  
 ( Victorem semper testabitur India Bacchum )  
 Obstupuere omnes gravibus distincta Corymbis  
 Carbasa, & ignotas passim discurrere Lynces.

Nec Maris immensum frustra decurritur æquor,  
 Aut infœcundos præbent regna humida campos,  
 Et steriles messes ; coëptis audacibus itur  
 In thalamos Neptune tuos ; gemmæque latentes  
 Cognatum videre diem, jamque æmula solis  
 Fulgura diffusum late jaculantur in Orbem.  
 Indignata sedet vacuo Thetis alma Cubili,  
 Et stupet incomptis habitata palatia Nymphis,  
 Quas ornare solet gemmarum lucidus Ordo,  
 Et niveâ semper pēdentes aure lapilli.  
 Non adeo illustrem parili vel imagine pompam  
 Edidit ulla Dies, ex quo Cleopatra nefandâ  
 Ingluvie regni pretium dissolvit aceto,



Ægyptumque uno damnosa absorbuit haustu :

Nec tales victrix egisti Roma Triumphos,

Cum sua littoribus monstraret vela Britannis

Cæsar, & in nostris legeret Conchyliaripis.

Quocunque aspicias nil non mirabile ; totos

Expandit Natura sinus, facilesque videri

Denudat vultus, & cœlo gaudet aperto.

Naturæ sed quis poterit comes ire ? sequemur

Artis & humanæ tandem molimina mentis.

O quali feret hæc Populus spectacula plausu,

Æstivi tunc cum malè mordax incola lecti

Ponè trahet longæ sinuosum syrma Catenæ,

Tercentumque geret perplexum nexibus aurum !

Bellua ceu Lybicâ captam venator arenâ

Quam circum vinclis, & ahenâ compede claudit

Indomitam, & sævo meditantem prælia dente.

Illic sublimem ferri Phaetonta videbis,

Illic solis equos, similemque per omnia Currum,

Quo prius exciderat, nisi quod sit Cerea summæ

Curvatura rotæ, radiorum cereus ordo.

Nec frustra mœstæ lachrymas fudere sorores,

Protinus in varias Electra cadentia formas

Artifices lufere manus ; hinc flava nitescent

Poculaque & gravido prægnantes flamine fusi,



Quos Pygmæa potest conjux gestare, trahendæ  
Partitur fociis cum pensa domestica lanæ.

Hic & parva uxor poterit, seriesque Nepotum  
Æquales habitare casas; nuce clauditur unâ  
Tota Domus, tenuique in cortice tota supellex.

Seu tibi Bella placent, vivâ depicta Tabellâ  
Gesta illic cernes angusto prælia Campo;  
Squamosusque Draco lethalis spicula Caudæ  
Contorquet, parvoque acini committitur orbe,  
Cum Duce Cappadocum invicto, quo præside gaudet,  
Et tutelarem sibi vendicat Anglia Divum.

Seu tibi decursos animus fert ire per Annos,  
Quos omnes pulchro distinguunt ordine magni  
Heroum tituli, nec vani Nominis, umbræ  
Illustres referunt antiqua Numismata Vultus:  
Quo Dictatorem tulerit se Julius ore,  
Quo Pater Æneas olim, Regesque Latini  
Jura dabant Populis immensum in nomen ituris.

Sic diversa suis signantur secla Metallis,  
Et revocant memores labentia tempora Fasti.  
Ornasti Matrem tantis, *Asbmole*, Trophæis,  
Ut quo fælicem sese jactavit Alumno,  
Æternum gratâ testetur voce Patronum.  
Accipe solennes tibi quas devovimus aras,



Quaque licet monumenta tuis æqualia donis.

En ut nostra tibi laxâ Compagne dehiscant

Mœnia, præcipitemque trahant disjecta ruinam !

Tali Victores excepit Græcia pompâ,

Ingressisque sacri concusso Vertice Muri

Confertas stravere vias, aditumque dedere.

Excelsô tollet quondam se vertice Moles,

In quâ perpetuis ardens fornacibus ignis

Fœcundo rerum primordia percoquat æstu ;

Et quæcunque diu cæcâ latuere sub Umbrâ

Naturam cogat vel per tormenta fateri.

Hic suspensâ tui semper quæ vivet imago,

Et posita adversâ *Sheldoni* fabrica fronte

Præbebunt alterna sibi spectâcla, nec uno

Lumina percellent vultu, vel simplice Pompâ.

Nec tamen hic fisti poterit sibi Conscia Virtus,

Illa dies aderit, gratis celebranda Camenis,

Quando tuis oppressa gement subsellia libris,

Herôum qui vix imitanda exempla secutus,

*Sheldono* cedis, (quem nulla æquaverit ætas)

Et cum *Bodleio* socios partiris Honores.

*Jo. Dolben*, Archiep. Ebor. Fil.

Ædis Chr. Alumnus.



*Passer.*

**I**Ndefessum Animal, nullâque libidine victum,  
 Cui clunes Natura agiles, caudamque salacem,  
 Nec sese æterno passam languescere motu  
 Indulgit, Quid tu *passer*, mortalibus ægris  
 Objicis absumptas uno molimine vires,  
 Demissosque animos, lassos cum evanidus artus  
 Destituit vigor, & cœptæ fiducia pugnæ?  
 Quam se tota tuis abdit *Cythereia* venis,  
 Lascivoque omnes gremio inspiravit Amores,  
 Et dedit ipsa suas longe superâsse Columbas!  
 Nulla tibi Veneris subeunt fastidia, nulla  
 Vel semel accenso defunt alimenta furori;  
 Sufficit ipse sibi, sese depascitur ignis,  
 Sese alit, & solo semper se fomite gaudet.  
 Ut memini voces læto clangore solutas,  
 Cum patiens oneris sternit tibi fœmina dorsum,  
 ( Parva quidem, tali sed non indigna marito )  
 Circuituque vago, placideque strepentibus alis  
 Sollicitare tuas visa ad connubia flammæ,  
 Suscitât his Furiis, facilemque accendit Amantem.

Tunc



Tunc Tu, qui fusus miscetur corpore toto,  
Extimulas genitalem ignem; foecundaque virtus  
Suggerit invictum robur; Si victa fatiscat  
Paulisper Venus, at renuis tibi longa quietis  
Intervalla dari, primosque recolligis æstus,  
Atque instauratis iterum complexibus usque  
Fervet opus, strident pennæ, committitur inguen  
Indomitum, & tenui lascivis cuspide, *Passer*.  
Quid quod Te subiti rapit inclementia fati,  
Nec tibi concessa est nulli speranda Senectus;  
Mille tibi præstat, *Passer*, lux singula vitas,  
Una dies, una hora humano longior ævo est.

T. S. Ædis Christi Alumnus.

*Arausio*



*Arausio recepta.*

**D**um figit bellator inertia postibus arma,  
Dum lituus flet, & pulsus ad carmina nervis,  
Aonio vates deducunt vertice Musas;  
Te quoque dicemus, regio *Arausina*, receptam,  
Fœderis æterni pignus; Tu carmina poscis,  
O patria *Auriacum* memoranda! O inclyta nutrix  
Heroum Divumque! O mille experta labores,  
Invisisque diu *Senonum* obluata catenis!

Ergo iterum gremio *Nassovi* infusa recumbis?  
Ergo arcto amplexu dilectum heroa fatigas  
Lætitiæ impatiens, dominoque priore superbis?  
Sic vi prædonum longum vexata, marito  
Penelope castos redeunti aspirat amores  
Singultans; oculosque natantes pascit, & ulnis  
Advolat expansis, & inhæret pendula collo.

Jam pulsi exilio cives, pia turba penates  
Dilectos repetent, jam rura *Arausica* simplex  
Religio, pietasque, fidesque antiqua revivent.

Mox



Mox huc confugient *Valdensis*, & accola ripæ  
*Eridani* durus, patriis de Vallibus actos,  
Quos ferro hinc *Lodoix*, hinc igne *Sabaudius* arcet.

Interea longè *Auriacis Gulielmus* ab oris  
Ignatî sobolem pellet, fœdosque cucullos,  
Atque pias fraudes tardosque abdomine Fratres.

Artibus ille suam melioribus instruet Urbem,  
Jura, magistratusque dabit, sanctumque senatum.

Ille novas *Ædes*, *Phœbo* Musisque, dicabit,  
Atque recepta novi cantabunt rura *Marones*.

Ille domos *Atavûm* lapsas, & hiulca ruinis  
*Cœlicolum* attollet delubra; arcesque reponet

*Mauritii* everfas, & inexpugnabile vallum.

En! video ut studio fervet generosa juvenus,  
Pars humeris truncos, pars grandia marmora portant  
Obnixi; surgit moles operosa, minæque

Murorum ingentes; summis undantia pinnis

*Auriaci* vexilla ardent, ruptoque remugit

Tormentum fumans cœlo, & nigrescit ad auras.

Tum tibi quas grates, *Gulielme*, *Arausio* solvet,  
Quas statuas dabit, & capiti decernet honores?

Tempus erit cum olim *Arausinos* advena tractus

Invisens, illic non jam pendentia saxa,

Reliquias fastûs *Romani*, aut templa stupebit

Disjecta,



Disiecta, egregiasve ruinas *Amphitheatri*.  
 Non *Mario* victos post *Cimbros* structa trophæa  
 Spumantem *Rhodani* attonitus spectabit ad undam;  
 Sed, *Gulielme*, tuum spiranti in marmore vultum,  
 Atque triumphales portas, monumentaque famæ  
 Sacrata *Auriacæ*, surgentesque ære Columnas,  
 Defixus mirabitur, ardescetque tuendo.

At vos quis virtus bellandi, & nobile robur  
 Semper crescentem famam, semperque virentes  
 Concessit lauros, immortalesque triumphos,  
 Magnanimi heroes *Nassovæ* gentis, & umbræ  
*Mauritii Fredericique*, atque ingentis *Adolphi*;  
 Vos dilectæ animæ; Vos (si mortalia curant  
 Ordinibus divûm inscripti) nova gaudia tangant;  
 En! vester sanguis *Britonum* diademate crines  
 Auctus laurigeros, post expugnata *Namurci*  
 Mœnia, post fractas vires, animuinque subactum  
*Borbonii* dextram placidè tendentis, & ultrò  
 Pacem implorantis, sedes securus avitas  
 Occupat, atque domos patrum, *Auriacûmque* reposcit.  
 Regna olim erepta, atque suis dominatur in oris.

Jam *Senonas* piget, Augustos rapuisse penates,  
 Fœnore cum multo, *Gulielme*, requiris adultus,  
 Quos puero incassum *Lodoix* detraxit honores.



Sic olim *Edwardus*, plenis maturior annis  
Fræna *Arari Ligerique* daturus, mitior iras  
Distulit, & Celtis concessit fœdera, sedesque  
Avulfas *Aquitantum*, & *Neustrica* regna recepit.

*Ric. Mariett* ex Æde Christi,

Superioris Ordinis Commensalis.

*Ad.*



*Administratio Mariæ.*

**D**Udum relicto pectine *Lesbio*,  
Nunc ad priorem sic temerè feror  
Infaniam. O Pecten, movere  
Qui superos potes, & creare,  
Hoc si supremum carmen amicior  
Camœna pulchrum ducet in exitum,  
Te, Blanda testudo, lyramque  
Emeritam tholus hic eburnus  
In pace ponet tempore postero:  
Haud illa rursus dextera pervicax  
Audebit ad priscum quietas  
Officium revocare chordas.  
Me si *Lycoris* dura refugerit,  
Non Tu quereris flebilibus modis;  
Me si beârit, non, ut olim,  
Voce Tuâ peragam triumphum.  
*Maria*, magni Comparis æmula,  
Te destinamus materiem; Tibi  
*Theatra* clamant, ac jocosa  
Admonitus salit *Isis* unda.  
O Diva, si quid forte Tibi vacat,  
Nec semper urges pectus amabile



Curis, gerisque semper Anglo

Sollicitam super orbe frontem,

Descende paulum huc, & propior Tuas

Invise Musas, dum Tibi Regiam

Urbem æstus infestat, Canisque

Pene novum minitatur ignem.

Videbis omnes laudibus in tuis

Fervere vates: Pars ad originem

Recurrit, & clarum salutat

Per memores genus omne fastos:

Hic enitentem corpore gratiam

Narrat; manusque & cæsariem, & genas

Miratur, incedens per ignes,

Et nimio periturus anso.

Alter sonabit, *Tu bona, Tu pia,*

*Tu pura vitæ, & justitiæ tenax,*

Mittetque virtutes in ævum

Egregiis numeris Poëta.

Non hæc ab udâ fas fuerit Tibi

Sperare *Leydâ*: Lauream *Belgicam,*

Quocunque delinita cultu,

Odit humum minus hospitem.

At O! Quis alium tollet honoribus

Diem, labanti qui dedit *Insulæ*



Spem primus, ultricemque flammam

*Borbonias* tulit in carinas?

Illas ovantes in vacuo mari

Matrona longè ex moenibus *Anglicis*

Prospexit, ut charis diurnum

Virginibus dabat æqua pensum;

Ah, flete, dixit, fata *Britannici*

Extrema regni! Quæ nova *Wallia*

Victis favebit, atque fractum

In gremio populum recondet?

Vos in catenis quatenus auguror,

Captas puellas auferet insolens

Cohors, & ignotum bibetis

Aut *Rhodanum* procul, aut *Garumnæ*:

Tunc, vel superbum vester erit labor

In *Ludovicum* psallere carmina,

Laurosque, supplicesque gentes

Et trepido data jura mundo;

Vel imperatæ stamina purpuræ

Texetis auro, quam Domina induet

*Parisiæ*, quo sagatum

Luce novâ feriat maritum:

Sic elocuta est. Atqui aliam vicem

In lance pendens fata Diespiter



Parabat: Extemplo volentem

Ad scopulos, & amica saxa

Gallum videres, fulmine percitum

*Anglo*: Videres nantia Lilia,

Trabesque, & Antennas Deosque,

Præcipitesque rates, & ipsos

Duces in undis; heu, nitidos comæ

Frustra, & ferentes pignora Virginum

Lævo lacerto, dum repellit

Dextra graves operosa fluctus.

Ex hoc in hostem bella refundere

Ardemus ultro: Jam freta milite

*Anglo* relucet; jam potiti

Oppositâ dominamur orâ.

*Normanna* Tellus, unde genus virum

Audax *Britannâ* crevit in Insulâ,

O Pulchra mater! O tot alma

Post hyemes repetita, salve!

Agnosce natos, qui tibi vincula

Rumpent dolenti; seu *Lodoix* fremat

Præsens in armis, sive prisca

Ex Erebo redeat *Joanna*.

Ds. Ric. Vernon Baronet. ex Æde Ch.

*Inaugu.*



*Inauguratio Regis GULIELMI &  
Reginæ MARIÆ.*

A D R E G E M.

**O** Magna *Auriacum* soboles! O stemmate longo  
Heroum demisse Heros! Quo sospite manes  
*Nassavii* exultant; *Fredericique* umbra superbit,  
Magnanimi recolens famamque & fata nepotis:  
En! tibi captivam prisce gens aspera Bruti  
Submittit cervicem ultro; tibi bella minanti  
Obvia in amplexus ruit; & Mavortis aviti  
Oblita, insuetam manibus prætendit olivam.

Quos non terribilis Cimber, tristesque videri  
Pictones, aut torvi fregit vis dura Canuti;  
Quos non Roma potens bello, Celtæve Latinis  
Agminibus misti; gelido neque victor ab Istro,  
Edomuit pugnando, deditque in vincula *Cæsar*:  
Hi non indecores ferro, neque cedere castris  
Assueti quondam, Tua sponte in fræna reclines  
Subjiciunt humeros; victriciaque arma secuti,  
Optato cedunt nodo, manicisque fruuntur.

Aspice, ut unanimis Procerum, populique senatus  
Sceptra Tibi parat, & solito movet ordine palmam,  
Et merito capiti exortes decernit honores!



Nam neque Te regni summa ad fastigia vexit  
Lucinæ favor, & nascendi inglorius ordo :  
Vivida sed bello virtus, tutataque ferro  
Libertas, justique amor, & reverentia Divûm,  
Intemerata fides, & non revocabile verbum.

Hâc olim Argolicum *Theseus*, hâc arte *Quirinus*  
Romanum imperium fixit : *Cyrusque* subactis  
Major avo, ambigui Martis durique laboris  
Mercedem, Persas, populosque recepit Eoos.

Te Duce, Gradivum poscunt defueta triumphis  
Agmina, & in patrias sperant assurgere lauros :  
Te Duce, victrices aquilas trans ostia Rheni,  
Trans Ligerim ostentant Britones ; avibusque secundis  
Avulsos Morinos, & Neustrica regna reposcunt :  
Semineces video Celtas, genibusque minorem  
*Borbonium* sævire minus, promittere iniqui  
Exilii finem, pulsosque requirere cives :  
Nequicquam : Domino *Rhodanus* meliorem superbit,  
Et fractos Tibi volvit Arar, Tibi Sequana fluctus.

Auspice Te, canum Mater cultuque decorum  
Efferet os tenebris, puroque incedet amictu  
Relligio ; & vanas, in Te inclinata, retundet  
Irasque, infidiasque, & ovantem sanguine Romam.

Vos, fidi Manes, nati melioribus annis,



Vos *Baliolæis* bustum miserabile flammis  
 Experti quondam; *Latimeri* simplicis umbra,  
*Ridlæique* anima, & *Cranmeri* dia senectus;  
 Nunc O! nunc hilares defensis funere vestro  
 Arridete aris; hæcque olim sanguine fœdas  
 Lustrari gaudete arces; hæc sede cucullos,  
 Funigerûmque greges, & adorea numina pelli;  
 Inferiæ hæ vobis, hæc grata piacula funto.

Ecce suos repetit, pulso bubone, Penates  
 Cecropiasque domos, dilectaque mœnia Pallas.

Qualis ubi mediâ volucris Jovis ales in Æthrâ  
 Sanguineas agitavit aves, milvumque rapacem;  
 Impavidæ redeunt in patria rura volucres,  
 Tuta colit sylvas Philomela, & littora Cycnus.

Quin Tu, sancta Ædes, quæ multos ubere partu  
 Fudisti Heroas: Quæ nunc (sic fata revolvit  
*Nassaides*) Dominum tanto es fortita minorem,  
 Quanto alias inter fulges Regina sorores:  
 Tu quoque non levibus nuper jactata procellis,  
 Tu cladis pars magna; alios meliore metallo  
 Fidas ire dies; alium tibi surgere credas  
*Wolscum*; Auriaci Te spera in nomen ituram,  
 Henricique Tui majorem agnosce Nepotem.

*Henricus Aldrich*, S. T. P. Eccles. Chr. Decanus.



*Academiæ Oxoniensis Comitia,**Anglicè An Oxford Act.*

**P**Hœbe redi, quâcunque lates fugitivus in orâ,  
Sive aliquam sequeris deserta per avia Daphnen,  
Seu pastoralis repetens gestamina sceptri  
Thessaliæ jam tristis agas in finibus exul ;  
Te (quam longa tuæ passi dispendia lucis)  
Te Dominum *Oxonidæ*, quondam tua turba, repossunt :  
Sunt & adhuc qui Te non in vulgata vocabunt  
Carmina, sunt Juvenes, qui, sis modo dexter, Apollo,  
Non ita degeneres opera interrupta capeffent :  
Quo tibi solennes instaurant ordine pompas.  
Cernis, & augusti pandunt spatia ampla *Theatri*.  
Scilicet hanc *Cæsar* Phœbeis fecit Alumnis  
Lætitiâ : Ipse procul *Mosæ* bellator ad undas,  
Tela inter media & districtos cominus enses  
Intrepidum urget iter, nec, quanquam sæpe *Mariæ*  
Menti surgat imago, iras animosque remittit,  
Quin toto insultantem ardens agit æquore *Gallum*.  
At Nobis placidæ interea fœlicia pacis



Exercere dedit studia, atque aperire recessus  
 Castalios jussit, sacrosque recludere fontes :  
 Tuque adeo, Decus Aonidum, quo Præside manes  
*Sheldoni* exultant, & sancti dia superbit  
 Canities *Felli*, doctæ otia longa Juventæ  
 Excutis, & Musas ultra non passus inertes,  
 Desuetos renovas, circo plaudente, triumphos :  
 Qualis, cum nimiam Latio indulgere quietem  
 Relligio mitisque Numæ sapientia, lentæ  
 Virtutem excivit Patriæ, residesque movebat  
 Tullus in arma Viros. Opera omnibus arbiter æquus  
 Impendis diversa ; hic dulcia pollice lævi  
 Fila movet Flacci, aut Divinam Æneida tentat ;  
 Ore sonans grandi, Demosthenis acrior alter  
 Arma quatit, densis alii Te, *Occame*, latebris  
 Expediunt, multoque latentem pulvere *Scotum* :  
 Fervet opus, læti feriunt laquearia plausus.

Quare agite, egregii pars & vos parva triumphi,  
 Queis calamos inflare leves Heliconia Virgo  
 Indulsit, facilique poemata ludere venâ.

*H.* Nosti quæ festa & quos restaurare triumphos  
 Incipit ? (*G.*) Aut hoc aut aliquid simile huic mihi  
 quondam

Commemorabat Avus. (*H.*) Certe hæc nil tale tulerunt  
 Secula,



Secula, vix tenuis famæ nos attigit aura.

*G.* Hinc est, quod varium mirabar in oppida vulgus  
Confluere, Aonidumque domos turbare quietas:  
Hac Cives ( quibus alma salem Natura negavit,  
Et multum nebulæ per frontem fudit amictum )  
Incedunt taciti, & mirâ gravitate verendi.  
Ac juxta, taurorum uncique oblitus aratri,  
Rusticus exultat; passim convitia spargit  
In focios; hilaris baculo, pede, voce jocatur.  
Illic Cecropidas, Nomentanosque nepotes  
Vestibus insignes, nec non & torva tuentem  
Thraſonem vidi, ille plicatam in terga retorſit  
Cæsariem, tunicamque dedit diffundere ventis,  
Et subtus lato fulgebat balteus auro.

*H.* Credideram vero haud oculos retinere tuos qui  
Spectatum veniunt, sed qui spectentur ut ipsi.  
Vidisti in scenâ Pygmæam ludere gentem,  
Et saltare vagum per pulpita Pumilionem?  
Vidisti, populo qua lætos area ludos  
Exhibet, & gemino distendit stipite funem,  
Quam facili corpus nisu saltator in auras  
Tollat, quam justo gressus libramine firmet  
Infiliens, agilisque trementia fila pererret? [det illum

*G.* Parcius hæc. (*H.*) Te puparum pudet? haud pu-



Qui septem studiis annos dedit, & cui longe  
A cubito manica ad talos demissa pependit.

Hic Te, si memini, seniori cedere jussit,  
Summovitque loco, sibi prima sedilia poscens.

G. Hæc tecum ulterius mox excutienda, vocat jam  
Altera materies; & da (*ad B.*) Tu, si grave non est,  
Quæ tanta hospitibus *Rhedicinam* causa videndi?  
Et quo procedant, quas narras, ordine Pompæ?

B. Organa, diverso quæ multa foramine jungit  
Fistula, & aerios acceptat follibus Euros,  
Audistis centum discrimina ludere vocum.  
Inde canunt, habiles quibus in nova carmina vires  
Diva dedit, numeris & qui valere solutis.  
Talibus auspiciis Juvenes Encænia templi  
Pierii renovant, Magni memores *Sheldoni*.  
Ille (sacras quanto versans molimine curas!)  
Has posuit sedes æternaque mœnia Musis,  
Et Te centenis admisit, Phœbe, fenestris:  
Illi solennes primo solvamus honores;  
Craftina lux vobis forsan gratissima, risum  
Cum moveat, crepitant cui circum compita focci,  
Et male compactas pelles futura relaxat:  
Aut qui Sidonio splendet venerabilis ostro,  
Dum fudat sub mole togæ, talosque gravatos



Vix trahit, & toto resonat gravis ocrea vico.

*H.* Sed nullos stimulos, nullum, puto, gestat acumen.

Hunc credas forsan sedes mutare quietas

Cornipidemque diu desuetum poscere, terrasque

Explorare novas. (*G.*) At credant ista recentes,

Non ego, namque illos didici securum agere ævum,

Nec charis *Rhedinæ* excedere moenibus unquam,

Dum loca sunt, quæ grata focis communibus ardent,

Spumea qua lætos ducit circum amphora gyros,

Et bene concusso crepat alea jacta fritillo.

*B.* Mox veniet, magno vulgi qui murmure rostra

Conscendet, cujus mordax agitabit acumen

Confestim juvenem atque senem. Trepidate Puellæ

Deliciæ Cottis, bullatæ & cura juventæ:

Tuque annis gravis & fracto jam corpore, cujus

Friget in effoetis conjux petulantior ulnis.

*H.* Agnosco quid ait, *Terræ*, puto, *filius* hic est.

*G.* Et magis agnosces, cum Teque tuamque Corinnam

Attigerit, cæcosque diu patefecerit ignes.

*H.* Hunc circum longo dum sese examine fundit

Turba favens tremuloque quatit subsellia risu,

Hic forsan vili subtemine crassus arator

Incumbens baculo, colloque in terga reclini,

Torvum hiat, indoctasque ad pulpita porrigit aures;



Et quoties alii plaudunt, juvat hunc quoque risu  
Durum agitare latus, grandæque intendere buccas.

G. At cur simplicitas adeo tibi rustica ludo est?  
Quid facient cives? aurem substringet hianti,  
Et gravis in turbâ luctabitur *Aldermannus*:  
Illi sufflatu pulmo prælargus anhelat,  
Colla madent, liquidæque genæ pinguedine rorant,  
Materiesque suis fit Lychniopola lucernis:  
Demum importuno diducit labra cachinno,  
Tum cum forte suâ de conjugè fabula cœpit.  
Atque aliquem, credo, fallent per sæpe togatum  
Romano fermone joci. (*H.*) Verum ille sodalem,  
Cui tenues melius finxerunt pectus Athenæ,  
Observat, nervisque alienis mobile lignum  
Ducitur: hunc usque intentis aspectat ocellis,  
Ac si quando videt patulum dimittere rictum,  
Laxat & ipse parata sequacibus ora cachinnis.

G. Abderitano quis me pulmone beabit,  
Quis mihi ferratos lateri circumdabit orbes,  
Crastina si tantum præbent spectacula risum?  
O quam te impatiens quæ proxima voveris opto  
Læta dies, longumque Mihi memoranda per ævum.

H. Et memoranda quidem, cuicumque accumbere mensæ  
Contigerit, cuicumque loco successeris hospes.



Seu qua fumantes ex æquo meta laceffit  
In certamen equos, vel galli cæde rubentem  
Tingit humum sanguis, seu cum ridente colono  
Effutire sales mavis, ut turba jocantem,  
Ut dominum miretur anus grandæva futurum,  
Hinc falis æterni fontes, hinc nota supellex  
Suggestit ingenium, & decies repetita placebit.

*B.* Multus uterque fuistis in hoc; jam fronte severâ  
Ecce movent duo pugnacis certamina linguæ,  
*Democriti* ille ingens vacuum, & tenuissima rerum  
Semina; particulasque leves, globulosque *Renati*;  
Obscuro hic quicquid *Zabarella* volumine condit,  
Materiem formamque & inania nomina jactat.  
Hos cito dimitti sperabitis. (*H.*) Imo ego lætus  
Hos etiam specto, vultu dum multa minati;  
Exertis digitis, exporrectisque labellis  
Nescio quid spinosum, atque implicitum Labyrintho  
E nube & tenebris in lucem educere certant.

*G.* Dumque ardent oculi, & pulmo acres ventilat æstus,  
Surdus uterque sono alterius diverberat aures,  
Nec lateri parcunt, nec ficco ex ore salivæ.  
Et jam jamque magis fervent, atque omnia miscent,  
Arbiter è cathedrâ donec venerabilis altâ  
Increpet, & lites æquali examine libret,

Atque



Atque regat dictis animos, & temperet Iras.

*B.* At ne vos teneat cæcis discordia nodis  
Perplexæ, & vocum obductæ farragine nugæ.  
Alter adest vestras qui molli urbanior aures  
Mulceat eloquio, & Nympharum enarret amores:  
Virgineum ille chorum, pexusque togæque recenti,  
Sublimi spectat de sede, latusque venustum  
Huc illuc lentè flectit, miserisque puellis  
Dat vulnus linguâ, obliquo dat vulnus ocello.

*G.* Ille refert siquis lascivæ uxoriis ulnis  
Languescit sponsæ, gremio quæ infusa seniles  
Nauseat amplexus, invisæque basia libat.  
Vel si qua incauto tacitis præcordia flammis  
Accendit juveni, sterileque inspirat amores:  
Mox male respondet curis, animumque morando  
Torquet, & admissos astutè ventilat ignes

*H.* Pectoris O duri filices! O ferrea corda!  
Ille verecundos suffundere sanguine vultus  
Audebit, tenerisque procax dare vulnera Nymphis?

*G.* Crudelis Virgo magis an magis improbus ille?

*H.* Improbus ille. (*G.*) Tamen, crudelis tu quoque Virgo.

Nec tu adeo immitis nimium miserere Corinnæ;  
Ipsa dolet merito, quæ tot fuit ante dolori.



*H.* Sic post edomitum Buten Pagasumque Chromimque  
Infelix jaculo cecidit stridente Camilla.

*B.* Quotquot amœna colunt formosæ rura puellæ,  
Vel quarum doctæ veneres mirantur Athenæ,  
Huc simul occurrunt. (*H.*) Hinc tu tibi felige Nympham,  
Quæ tecum aut fastus Galatææ & Daphnidis ignes  
Dulce canat, vel, humum pallâ verrente, choreas  
Instituât numerosa, (*G.*) Choreas semper amavi.

*B.* Vos tamen, augustas qua pandunt atria valvas,  
Et vastæ fumant patinæ, & geniale falernum,  
Ante dapes fumetis. (*H.*) Et has quoque semper amâsti.

*B.* Ut memorare juvat quo pingues ordine mensæ  
Ostendant epulas, quo nondum instructa tumultu  
Unâ hospes civesque ruunt in fercula; sed vos  
Non moror invitos; notum dat buccina signum,  
Arbor & in medias altè porrecta plateas  
Jamdudum pictâ pandit spectacula chartâ.

*Ds Car. Boyle* Comitibus de Orrery Fil.

*Gulielm. Hayes*

*Gualterus Gough* } Equitum Fill.

} Ex Æde Christi.

Barometri



Barometri *Descriptio*.

**Q**Ua penetrat Fossor terræ cæca antra, metallo  
 Fœcunda informi, rudibusque nitentia venis;  
 Dum stupet occultas gazas, nummosque futuros,  
 Eruit argenti latices, nitidumque liquorem;  
 Qui nullo effusus prodit vestigia tractu,  
 Nec terram signo revolubilis imprimit Udo,  
 Sed fractus sparsim in globulos formam usque rotundam  
 Servat, & in teretes lapsans se colligit orbes.

Incertum quâ sit naturâ, an negligat ultra  
 Perficiet, jubar & maturus inutile temnat;  
 An potius Solis vis imperfecta relinquat  
 Argentum malè coctum, Divitiasque fluentes:  
 Quicquid erit, magno se jactat nobilis usu;  
 Nec *Deus* effulsit magis aspectabilis olim,  
 Cùm *Danaen* flavo circum pretiosus amictu  
 Ambiit, & gratam suadente libidine formam,  
 Depluit irriguo liquefactum Numen in Auro.

Quin age, fume tubum fragilem, cui densior aer  
 Exclusus; fundo vitri subsidat in imo  
 Argenti stagnum; ut pluviam impendente metallum



Mobile descendat, vel contra, ubi postulat æstus,  
Prodeat hinc liquor emergens, & rursus *inane*  
Occupet Ascensu, tubulumque excurrat in omnem.

Jam cœli faciem, tempestatesque futuras,  
Conscia lympa monet, brumamque & frigora narrat.

Nam quoties liquor insurgit, vitreoque Canali  
Sublatum nequeunt ripæ cohibere priores;

Tum lætos sperare dies licet, arva fatentur  
Æstatem, & largè diffuso lumine rident.

Sin sese immodicū attollens Argenteus humor,

Et nimium oppressus, contendat ad ardua vitri,

Jam sitiunt herbæ, jam succos flamma feraces

Excoquit, & languent consumto prata virore.

Cū verò tenues nebulas spiracula terræ

Fundunt, & madidi fluitant super æquora Fumi,

Pabula venturæ pluvix; tum fusile pondus

Inferiora petit; nec certior Ardea Cœlos

Indicat humentes, medias quando ætheris Oras

Tranando, crassâ fruitur sublimiùs aurâ,

Discutit & madidis rorantia nubila pennis.

Nunc guttæ agglomerant, dispersas frigora stipant

Particulas, rarusque in nimbū cogitur humor:

Prata virent, segetem fœcundis imbribus æther

Irrigat, & bibulæ radici alimenta ministrat.

Quin



Quin ubi, plus æquo descendens unda metalli  
 Fundum amat, impatiens pluviae, metuensque procellam;  
 Agricolaë caveant; non hoc impunè colonus  
 Aspicit; ostendet mox foeta vaporibus aura  
 Collectas hyemes, tempestatemque sonoram.  
 At licet Argentum mole incumbente levatum  
 Subfidat, penitusque imo se condat in alveo,  
 Cætera quæque tument; everfis flumina ripis  
 Expatiata ruunt, spumantibus æstuat undis  
 Diluvium, rapidique effusa licentia ponti.

Nulla tacet secreta poli mirabile Vitrum,  
 Quin varios cœli vultus & tempora prodit.  
 Antè refert, quando tenui velamine tutus  
 Incedes, quando sperabis frigidus Ignem.

Augurio hoc fretus, quanquam atri nubila cœli  
 Dirumpunt obscura diem, pluviasque minantur;  
 Machina si neget, & sudum promittat apertum,  
 Audax carpat iter nimbo pendente viator;  
 Nec metuens imbrem, poscentes Messor aristas  
 Prosternat: terræ jam bruma incumbit inermis,  
 Frigoraque haud nocitura cadunt, feriuntque paratos.

*Jō. Addison, A. B. è Coll. Magd.*



*Dux* GLOCESTRENSIS 1697.

**R** Aptas Tiaras vertice perfido  
Narrare vellem, signaque *Turcica*,  
Ensesque falcatos, & Istrum  
Sanguine barbarico rubentem.  
Arctoa digno prælia spiritu  
Conarer efferre; ut glacies putri  
Induruit tabo, atque vinclis  
Purpureis riguere pisces;  
Quà torvus alget Sarmata, & hispidos  
Contristat agros perpetuum gelu:  
Sed Musa castigat vagantem,  
Et Patrias celebrare laudes  
Impellit. O Quo læta *Glocestria*  
Superbit! O Quèm tollit Honoribus  
Te Diva sumit non pudendo  
Carmine, degenerique versu  
Ornare; quamvis nec teneras genas,  
Nec enitentem crudior asperet  
Frontem cicatrix, nec venusta  
Vulnus adhuc violarit ora.

At



At mox adulto robore firmior  
Quassabis hastam, vel gladio minax  
Fremes, nec ultrà Fœminarum  
Indecores patieris Artes:  
Seu ritè justis instituant pedes  
Movere gyris, seu doceant comam  
Torquere perplexam, & futura  
Ponere virginibus pericla.  
Jam non Alumni grandis amantior  
Nutrix recenset, fatidicè loquax,  
Quot *Albion* olim videbit,  
Quot pelagus, Domini triumphos.  
Nunc tela fervens poscit, & horridos  
Martis tumultus; nunc in Achaïcas  
Urbes, pharetrataque Thracen,  
Non humiles meditatur iras.  
En! ut ferocem Bucephalum domat,  
Frustra insolentem verberis! ut jubam  
Vexat recurvatam, docetque  
Compositos glomerare gressus!  
At ille nequicquam emicat arduâ  
Cervice in auras, oraque concutit  
Spumantia, obluctansque frænos  
Dente terit malè contumaci.



Verùm quid Arces *Vinsoriæ* tremunt?

Quid læta vano fulmine perstrepunt.

Tormenta, festivasque flammæ

Projiciunt, & inerme fulgur?

Divinus ora, & pulchrior aspici

Incedit Heros; Agmina Principem

Aurata cingunt, & profanæ

Ponè ruunt populi catervæ:

Inter Sodales vertice celsior

*Hoardus* extat, Tuque premis latus,

*Sacville*, quem cuncti Patronum

Sollicitant, Tua cura, Vates.

Atque Ille posthac Te quoque carmine,

Princeps, sonabit, Grandia nobilis

Æquare Versu non caduco,

Et Genio numerosiori:

Seu Te remotis tradere Posteris

Libet, faventem pacificæ Togæ,

Musisque, seu Bello furentem

Intrepidè, ac facilem perire.

Agnosco Pompam: nunc galea aspera

Comptos capillos impedit, & femur

Ornat sinistrum, qui recondi

Respuet, irrequietus Ensis.



En! Qualis auro fulgidus ordinat  
Parvam phalangem, & prælia ludicro  
Furore commiscens, trophæa  
Sicca refert, sine clade Victor.  
Jam densat agmen cautus, ut obvias  
Arcto cohortes proruat impetu;  
Fugamve mentitus, catervas  
Opprimit exitii sequiaces.  
Ut nunc minaci pondere desuper  
Nutasse turres, & malè pendulos  
Hæsisse muros! ut *Seneffam*  
Ambiguâ maduissè cæde  
Accensus audit! mixtaque funera  
Ardet tueri, & sulphure luridos  
Artus, & indiscreta membra  
Per medias agitata flammæ!  
Ut ponè Magni gestit Avunculi  
Urgere gressus, dum furit impiger,  
Qualis *Boandæ*, vel subacti  
Mœnibus intonuit *Namurci*!  
Nunc æra luget rauca quiescere,  
Bellique fulmen; scilicet æmulus  
Sequi Parentem, *Danicamque*  
Non dubiè Sobolem fateri:



Sic parvus Angues comprimit Hercules,

Iras Novercæ, & vividus exerit

Omnem Tonantis vim, asseritque

Se Superis animosus Infans.

*Tho. Jones* è Coll. Magd. Oxon.

Superioris Ordinis Commensalis.

D 2

*Inaugu-*



*Inauguratio Regis GULIELMI &  
Reginæ MARIÆ.*

A D R E G I N A M.

**Q**uid *Britonum* dubiæ detrectant arma cohortes,  
Et figunt tellure hastas, & scuta reclinant?

Quid per *Danorum* tumulos, urnasque *Latinas*,  
*Saxonidumque* pyras, fataliaque hostibus arva,  
Securus graditur *Belga*, & sine Marte triumphat?

Usque adeo *Britonum* bello languescere virtus?  
Degeneresque adeo tibi sunt, *Arthure*, *Nepotes*?

Non illos *Pallas*, non *Belgica* iussit *Enyo*,  
Arma procul jactare, & pacem exposcere dictis,  
Et ramum præferre manu fælicis *Olivæ*:

Tu, *Dea*, quæ longo numeras in stemmate *Reges*,  
Cui *Brutus* primi, cui *Fergus* sanguinis *Author*:  
Quæ sacrum decoras genus, absolvisque *Parentem*;  
Tu fævos animorum æstus, & atrocia mulces  
Pectora, *Brutigenûmque* jubes mitescere corda.

Qualis ubi gelido si forte aspexit in *Hæmo*  
Spirantem bella, & meditantem pectore clades  
*Mavortem* formosa *Venus*; *Deus* horridus hastam



Ponit humi; mollitque iras, vultumque minacem  
 Explicat; & placidis se acclinat mitior ulnis;  
 Nec malit Geticas miscere in prælia gentes.

Sponte tuos ambit pubes Mavortia fasces;  
 Nec quis erit, ferro qui te violaverit Aruns,  
 Nec quis, qui Veneri dederit nova vulnera, miles.

Aspice ut effusos oleâ redimita capillos;  
 Det tibi sponte suas grandæva Britannia palmas!  
 Illa Anglûm fœcunda parens, dilecta Gradivo  
 Nympha; nec assiduis nequicquam exercita pugnis:  
 Olim Nympha potens bello; & Quæ fræna Garumnæ,  
 Fræna Arari posuit Victrix; modo, cardine verso,  
 Marcentes lauros, antiquæ insignia famæ,  
 Mœsta gerit; Celtasque timet, neque terret Hibernos.  
 At nunc in notas iterum se attollere laudes,  
 Fœmineisque ardet se iterum submittere sceptris:  
 O quanta incedit gressu! ut præsaga triumphos  
 Prælibat Nympha! & venturæ conscia famæ  
 Multam in Te *Boadiccæ* & multam agnoscit *Elizæ*.

O dilecta polo Diva; & spes una Britannûm,  
 Magnis orta atavis, atavûm generosior hæres:  
 Accipe fortunam generis: Neu sceptrâ recuses  
 Formosâ gestanda manu: Tibi regius auro  
 Velet honos caput, & crines tibi cingat Iaspis,



Eoisque nitens scintillet purpura gemmis.

Tu decus interea, & sacræ pars optima pompæ,  
Addideris splendorem auro, pretiumque Smaragdis.

Sic ubi, vere novo, violas & lilia passim  
Et niveo myrtos decerpunt pollice nymphæ,  
Et Triviæ agrestem texunt de more coronam:  
Ipse sibi fufos decorat Latonia flores;  
Ipse rofis fuaves, myrtisque inspirat odores.

Hos inter plaufus, Virgo, pars una triumphi  
Heu nimium pars parva tui, tibi grata virentes  
Prætendit *Rhedycina* hederas, *Parnassia* dona;  
Et tibi Pieriis intexit tempora fertis:  
Illam equidem tetigit propiori fulmine strages  
Immeritam; & sacræ intremuerunt Palladis arces:  
Tu, Dea, si puris tibi lucent ignibus aræ,  
Teque pia annumerat Patria inter numina, Virgo,  
Nec flammâ majore umbris adoletur *Elizæ*:  
Tu stabilem firmari arcem, & contemnere ventos  
Auspicio meliore dabis: neu *Tibris* in *Isim*  
Gurgite liventi properet; nec misceat unquam  
Impuras *Lemanus* aquas in virgine lympa.

Hoc tibi, Nympha, datum est; alios restare labores,  
Et nova pensa tuis gaudes superesse Camœnis:  
Nam veluti *Hesperia* regina *Lavinia* terræ.



Dilecto cum Troe suos divisit honores,  
 Et thalami Ænean, solique in parte locavit:  
 Sic nolis tibi, Nympha, uni parere Britannos,  
 Auriacique comas nullo diademate cingi;  
 At magno indulges dotalia sceptrā Marito.  
 Auspiciis paribus Dis & Proserpina Manes;  
 Jupiter æthereas regit, & Saturnia stellas;  
 Æqua suo dat jura Thetis, dat jura profundo  
 Neptunus; madidique tenent consortia regni;  
 Ipsa tuum in tua sceptrā vocas, *Maria*, Tonantem,  
 Immensumque regis non unâ cuspide pontum.

Tho. Newey Ædis Chr. Alumnus,  
 & Acad. Procurator.

ΠΥΓΜΑΙΟ-



ΠΥΓΜΑΙΟ-ΓΕΡΑΝΟΜΑΧΙΑ

SIVE

PRÆLIUM

INTER

*Pygmæos & Grues commissum.*

**P**ennatas acies, & lamentabile bellum  
 Pygmeadum refero : parvas Tu, Musa, cohortes  
 Instrue ; Tu gladios, mortemque minantia rostra,  
 Offensosque Grues, Indignantefque pusillam  
 Militiam celebra ; volucrumque hominumque tumultus.  
 Heroum ingentes animos & tristia bella  
 Pieridum labor exhaustit, versuque sonoro  
 Jussit & æternâ numerorum assurgere pompâ :  
 Quis lectos Grajûm juvenes & torva tuentem  
*Thesæa*, Quis pedibus velocem ignorat *Achillem*?  
 Quem dura *Æneæ* certamina, quem *Gulielmi*



Gesta latent? fratres *Thebani*, & flebile fatum

*Pompeii* quem non delassavêre legentem?

Primus ego intactas acies, gracilemque tubarum

Carmine depingam sonitum, nova castra secutus;

Exiguosque canam pugiles, Gruibusque malignos

Heroas, nigrisque ruentem è nubibus hostem.

Quà folis tepet ortu, primitiisque diei

*India* læta rubet, medium inter inhospita saxa

(Per placidam vallem, & paucis accessâ vireta)

Pygmæum quondam steterat, dum fata finebant,

Imperium. Hîc varias vitam excoluêre per artes

Seduli, & assiduo fervebant arva popello.

Nunc si quis dura evadat per saxa viator,

Desertosque lares, & valles ossibus albas

Exiguus videt, & vestigia parva stupefcit.

Desolata tenet victrix impunè volucris

Regna, & securo crepitat Grus improba nido.

Non sic, dum multos stetit insuperabilis annos

Parvula progenies; tum si quis cominùs Ales

Congredi, & immixtæ auderet se credere pugnæ,

Miles atrox aderat, sumptisque feroculus armis

Sternit humi volucrem moribundam, humerisque reportat

Ingentem prædam; cæsoque epulatur in hoste.

Sæpè improvisas mactabat, sæpè juvabat

Diripere



Diripere aut nidum, aut ulcisci in prole parentem.  
 Nempe larem quoties multâ construxerat arte,  
 Aut uteri posuisset onus, volucremque futuram;  
 Continud vultu spirans immane minaci  
 Omnia vastaret miles, foetusque necaret  
 Immeritos, vitamque abrumperet imperfectam,  
 Cum tepido nondum maturuit hostis in ovo.

Hinc causæ irarum, bella hinc, fatalia bella,  
 Atque acies letho intentæ, Volucrumque virumque  
 Commissæ strages, confusaque mortis imago.

Non tantos motus, nec tam memorabile bellum  
*Macrius* quondam sublimi carmine Vates  
 Lufit; ubi totam strepituque armisque Paludem  
 Miscuit: hinc (visu miserabile!) corpora murum  
 Sparsa jacent juncis transfixa, hic gutture rauco  
 Rana dolet, pedibusque abscisso poplite ternis  
 Reptat humi, solitis nec sese saltibus effert.

Jamque dies Pygmæo aderat, quo tempore cæsi  
 Penituit foetus, intactaque maluit ova.  
 Nam super his accensa graves exarsit in iras  
 Grus stomachans; omnesque simul, quas *Strymonis* undæ,  
 Aut stagnum *Mareotidis*, imi aut uda *Caystri*  
 Prata tenent, adsunt; *Scythicæ*que excita palude,  
 Et conjurato volucris descendit ab *Istra*,



Stragesque immensas & vulnera cogitat absens,  
Exacuitque ungues ictum meditata futurum,  
Et rostrum parat acre, fugæque accommodat alas.

Tantus amor belli, & vindictæ arrecta Cupido.

Ergò ubi ver nactus proprium, suspensus in alto

Aere concussis exercitus obstrepat alis.

Terræque immensos tractus, semotaque longè

Æquora despiciunt, Boreamque & nubila tranant

Innumeri. Crebro circum ingens fluctuat Æther

Flamine, & assiduus miscet Cœlum omne tumultus.

Nec minor in terris motus, dum bella faceffit,

Impiger, instituitque agmen, firmatque phalangas,

Et furit arreptis animosus homuncio telis:

Donec turma duas compōsta excurrat in alas,

Ordinibusque frequens, & marte instructa perito.

Jamque acies inter medias sese arduus infert

Pygmeadum ductor, qui Majestate verendus,

Incessuque gravis, reliquos supereminet omnes

Mole Giganteâ, mediamque assurgit in ulnam.

Torvior aspectu ( Hostilis nam insculpserat unguis

Ore cicatrices ) vultuque ostentat honesta

Rostrorum signa, & crudos in pectore morsus.

Immortali odio, æternisque exercuit iris

Alituum Gentem, non illum impunè volucris



Aut ore, aut pedibus peteret confusus aduncis.  
Fatalem quoties Gruibus distrinxerat ensem,  
Truncavitque alas, celerique fugam abstulit hosti!  
Quot fecit strages! Quæ nudis funera pullis  
Intulit, heu! Quoties implevit *Strymona* fletu!

Jamque procul sonus auditur, piceamque volantum  
Prospectant nubem, bellumque hostesque ferentem.  
Crebrescit tandem, atque oculis se plurimus offert  
Ordinibus structus variis exercitus ingens  
Alituum, motisque eventilat aera pennis.  
Turba Polum replet, specieque immanis obumbrat  
Agmina Pygmæorum, & densa in nubibus hæret:  
Nunc densa, at patriis mox reddita rarior oris.  
Belli ardent studio Pygmæi, & lumine sævo  
Suspiciunt hostem; nec longum tempus, & ingens  
Turba Gruum horrifico sese super agmina lapsu  
Præcipitat gravis, & bellum sperantibus infert.  
Fit fragor; avulsæ volitant circum aera plumæ.  
Mox defessa iterum levibus sese eripit alis,  
Et vires reparata iterum petit impete terras.  
Armorum pendet fortuna, hîc fixa volucris  
Cuspide, sanguineo sese furibunda rotatu  
Torquet agens circum, rostrumque intendit in hostem  
Imbelle, & curvos in morte recolligit ungues.



Pygmæi hîc stillat lentus de vulnere sanguis,  
Singultusque ciet crebros, pedibusque pusillis  
Tundit humum, & moriens unguem execratur acutum.

Æstuat omne solum strepitu, tepidoque vaporat  
Sanguine, sparguntur gladii, sparguntur & alæ,  
Unguesque & digiti, commistaque rostra lacertis.

Pygmeadum sævit, mediisque in millibus ardet,  
Ductor, quem latè hinc atque hinc pereuntia cingunt  
Corpora fusa Gruum; mediâque in morte vagatur,  
Nec plausu alarum, nec rostri concidit ictu.

Ille Gruum terror, Illum densissima circum  
Miscetur pugna, & bellum omne laborat in uno:  
Cum, subito appulsus ( sic Dîi voluere ) tumultu  
Ex inopino ingens & formidabilis Ales  
Comprendit pedibus pugnantem; & ( tristè relatu )  
Sustulit in cœlum; Bellator ab unguibus hæret  
Pendulus, agglomerat strepitu globus undique densus  
Alituum; frustra Pygmæi lumine mæsto  
Regem inter nubes lugent, solitoque minorem  
Heroem aspiciunt gruibus plaudentibus escam.

Jamque recrudescit bellum, Grus desuper urget  
Pygmæum rostro, atque hostem petit ardua morfu;  
Tum fugit alta volans; Is sursùm brachia jactat  
Vulneris impatiens, & inanes sævit in auras.

Talis



Talis erat belli facies, cum Pelion ingens  
 Mitteret in Cœlum Briaretis, folioque Tonantem  
 Præcipitem excuteret; sparguntur in Æthere toto  
 Fulminaque scopulique: flagrantia tela deorsum  
 Torquentur Jovis acta manu, dum vasta Gigantùm  
 Corpora fusa jacent, femiustaque sulphure fumant.

Viribus absumptis penitus Pygmeia tandem  
 Agmina languescunt; ergò pars vertere terga  
 Horribili perculsa metu, pars tollere vocem  
 Exiguam; latè populus Cubitalis oberrat.  
 Instant à tergo volucres, lacerantque trahuntque  
 Immites, certæ gentem extirpare nefandam.

Sic Pygmæa domus multos dominata per annos,  
 Tot bellis defuncta, Gruum tot læta triumphis,  
 Funditus interiit: Nempè exitus omnia tandem  
 Certus Regna manet, sunt certi denique fines,  
 Quos ultra transire nefas: sic corruit olim  
*Assyriæ* Imperium, sic magnæ *Perfidis* imis  
 Sedibus eversum est, & majus utroque *Latium*.

Elysi valles nunc agmine lustrat inani,  
 Et Veterum Heroum miscetur grandibus umbris  
 Plebs parva: aut si quid fidei mereatur anilis  
 Fabula, Pastores per noctis opaca pusillas  
 Sæpè vident umbras, Pygmæos corpore castos.



Dum secura Gruum, & veteres oblita labores,  
 Lætitiæ penitus vacat, indulgetque choreis,  
 Angustosque terit calles, viridesque per orbes  
 Turba levis salit, & Lemurum cognomine gaudet.

*J. Addison A. M. è Coll. Magd.*

AULA



## AULA VINDESORIÆ

D. Georgio

INSTAURATA.

**V** *Insoriæ* augustas arces, Equitumque triumphos,  
Et Procerum vestes stellis fulgentibus aptas,  
*Cappadocis* spatiosam Aulam, multoque superbas  
Marte *Periscelidas*, decus & gestamina Regum,  
Impetus est celebrare: Fave, ò Tritonia Pallas,  
Ægide Diva ferox, studiisque asperrima belli;  
Tuque adsis præsens, vultu metuendus & acri  
Insignis frameâ Mavors, Tuque inclyte *Georgi*,  
Custos Anglorum, qui magnanimos Heroas

Imperio



Imperio regis, & Britonum res Numine firmas;  
Sive novum fidus pigris Te mensibus addas,  
Spicea quâ niveas Virgo tibi porrigit ulnas,  
Attoniti seu Te capiant spatia horrida cœli,  
Lethifer in geminos ubi brachia concavat arcus  
Scorprios, atque Tuæ metuit vicinia dextra.  
Nec minor his, dubias rerum qui flectis habenas  
*Carolide*, & tantos æquus largiris honores,  
Adsis ô, placidusque audacibus annue cœptis.  
Thamesis irriguâ quâ præceps labitur undâ,  
Et superimpositas stupefactus præterit arces;  
T / Stat Domus, ampla, ingens, excelsi in vertice montis,  
Regum divitiis opulenta, & Numine *Georgi*.  
Altâ turrē minax caput est, undè arduus omnes  
*Carolus* aspectat terras, atque æquora lustrat  
Imperio subjecta suo: Sic æthere summo  
Littoraque, Oceanique vagas circumspicit undas  
Jupiter, & Terræ defigit lumina regnis.  
Hîc nasci, superâque hîc primùm vescier aurâ  
*Edvardo* omen erat; multo quem Marte ferocem  
In bellum rapuit Spes famæ, & vivida Virtus.  
Ille (ubi in adversas acies concurrerat Orbis,  
Fraudibus hinc melior Gallus stetit, indè Britannus  
Missilibus fretus telis ac vindice dextrâ )

E

Ille



Ille memor veteres *Arthuri* instaurat honores,  
Heroasque vocat duri ad præludia belli.

Quisquis equos melior domat, & qui viribus audet  
Cominùs aut gladio certare, aut eminùs hastâ,  
Seu valido malit bellum committere pugno :

Cuncti adsint, meritæque expectent præmia palmæ.

Quoscunque accendit peregrini gloria Martis,

Invitat famâ Juvenes, durique laboris

*Cruralem vittam* gemmis ostroque rigentem

Mercedem ponit, pretium par talibus ausis.

Convenêre Duces, & nunc per tela, per hostes  
Haud dubiam in mortem vadunt, & fata futuræ  
Securi famæ non jam metuenda lacesunt.

Ex illo florere *Edvardi*, & crescere laudes;

Gallorum Fortuna retrò sublapsa referri.

Sed Britonum neu fortè ingens decus interrumpat  
Longa dies, tantique abole scat gloria facti.

Perpetuâ serie succedit Martius ordo

Heroum : si quis bello est præclarus & armis,

Sive fide; fidei monumentum & præmia belli,

Aurea Rex lævæ subnectit cingula suræ.

Nunc eadem jactant eadem ad fastigia vecti

Quinque & viginti proceres, quos æquus amavit

*Carolus*, atque ardens instigat ad optima Virtus.



*Vinsoria* Templum est & relligione parentum,  
 Et Bellatorum multis insigne trophæis;  
 Multa ibi figuntur sacris in postibus arma;  
 Et cristæ capitum, & priscorum signa Virorum,  
 Spiculaque, clypeiue, ereptique hostibus Enses.  
 Ordinis hîc primum fumunt insignia lecti  
 Heroes, crebris cumulantque altaria donis.  
 Est *Aula* interior, vastis suffulta columnis,  
 Dædaleâque operâ, multoque insignis Apelle.  
 Hæ sedes epulis, hîc dilabentibus annis,  
 Perpetuis soliti proceres confidere mensis.

Quin etiam veterum effigies in pariete doctus  
 Expressit Pictor, vitasque effinxit in auro.  
 O si quàm doctâ distendit arundine fucum  
*Verrio*, & ingenuo diduxit pollice ceram,  
 Tam pleno ingenio, tamque exundante Camœnâ  
 Magnum opus æternare queam! da, Phœbe, potentem  
 Da Genium: coelos nam Tu quoque murice tingis,  
 Pictam mille potens variare coloribus Irin.  
 Quâ Tu parte oreris, gradibus de marmore quinis  
 Conscendit folium multo intertextum Elephanto  
*Carolus*, & stratum subtèr pede conterit ostrum.

At super aspicias mirâ pictum arte tapetem,  
 Quà longo extendit se margine conopeum,



Atque habili revocat cortinam fibula nodo :  
Hæc ubi Spectator malè fidis lustrat ocellis,  
Textricis miratur acum, laudatque nitenti  
Auro distinctas telas, ac credulus infit,  
Penelope levius, melius nil textit Arachne.  
At qui fortè comes miranti doctior astat,  
Deceptos oculos vanæ sub imagine formæ,  
Artificisque manu depingi aulæa monebit,  
Cui neque par olim Zeuxis, nec Cous Apelles.

Quis verò ille audax cristâ spectandus equinâ,  
Insignis clypeo, loricâque ære decorâ,  
Et solidâ argento galeâ, & calcaribus aureis !  
Ecce indignanti similem, similemque tonanti  
*Cappadocis* vultum ! Toto ut ferventis ab ore  
Scintillæ absistunt ! en quantum è naribus efflat  
Irarum, quantusque oculis micat acribus ignis !  
Anguem expirantem rabido de pectore flammæ  
Desuper altus equo graviter ferit impiger Heros ;  
Usque premens monstrum, & vires super ipse secutus  
Usque suas, pendet validos reclinis in armos ;  
Lapsurum sternacis equi cervice putares,  
Lora tenet tamen, & jam vibratâ arduus hastâ  
Attollenti iras, & cærule colla tumentis  
Occupat os ferro, & fauces mucrone cruentat :



Iste dolore ferox totas jam colligit iras,  
Et frustra fævus, frustrâque hostile tenaci  
Dente terens linguâ nequicquam mordet inani.  
Nec minùs impatiens frænorum, & fervidus irâ  
Tollit se arrectum quadrupes: calx altera cœlum  
Verberat, ignivomi pectus premit altera monstri.

Major pompa vocat, major propè panditur ordo;  
Sive opus aspicias, sive ingens Argumentum.  
*Carolus* en Equitum solennem indutus amictum,  
Stellamque, trabeamque, periscelidemque decoram  
Iride sublimis vehitur! Cui tempora circum  
Inter honoratas fundit se laurea gemmas.  
*Pax* lævum tegit alma latus, *Victoria* dextrum;  
Ambæ florentes, formosæ frondibus ambæ;  
Frondenti hæc palmâ, ramo illa virentis olivæ.  
Ad Regale caput junctâ diadema tenent vi  
*Religio* hinc tabulis nota, indè *Britannia* sceptris,  
*Religio* nebulâ vultus obducta pudicâ,  
At clara, & nudo manifesta *Britannia* vultu.  
Undique *Virtutum* circumstat magna Caterva:  
Ore verecundo insignis, facieque modestâ  
*Temperies*, at sollicitâ *Prudentia* fronte  
Egregia, & non mutato *Constantia* vultu.  
Haud procul ante pedes flexo tres poplite Divæ



Et *Juvena* parens, & *Thule*, & pulchrior illis  
Fœcundisque magis spectabilis *Anglia* mammis.  
At torvâ facie Divas supereminet omnes  
*Astræa*, ancipitem cui vibrat læva bilancem,  
Dextra manus validum magnâ vi concutit ensẽ;  
Inque novas cædes crescentem demetit Hydram,  
Monstrum, horrendum, ingens, & quo non tetrior ulla  
Pestis & ira Dei *Scoticis* sese extulit oris!  
Illam Principibus nunquam non noxia *Thule*  
Extremam Enceladoque, *Ægæonique* sororem  
Progenuit, fœtam exitio, nigrique veneni  
Fœcundam rabie, cui dira *Rebellio* nomen,  
Saga gravis paci, Regumque inimica quieti.  
Huic si quando putri fortè halitus exit ab ore,  
Triste malum populi vitiatas inficit Aures,  
Poscere mox ferrum cives, rapere arma Juventus,  
Et ruere unanimes adversa in prælia Fratres.  
Nec sterilis Furia est: Spatiosas aspice mammas,  
Pectoraque, gravidumque armato Milite ventrem!  
Non Albana olim tam fœdis uberibus Sus  
Terruit aspectus, uterove enixa feraci est  
Tot capitum fœtus: Quam prodigiosa propago  
Monstrorum eliciunt atro de pectore virus,  
Maternosque sinus jejunâ fauce lacerant!



Fallor? an agnosco permistum Te quoque Turbæ,  
*Shaftsburi*, ô Anglis caput horum & Causa malorum!  
Agnosco vultus, nec quenquam conscia falli  
*Fistula* permittit, pendensque sub ilia *Siphon*.  
Quin etiam anguiculos inhonesto vulnere nasci  
Et quâ rima patet, tubulo manare colubros  
Conspicor, & latitans subter præcordia virus.  
Ille pavens structusque dolis huc turbidus atque huc  
Inclinat vultus, & partem versat in omnem.  
Nusquam recta acies: vigil omnia circumspicit  
Omnia formidat; pallorque per ora fatetur  
Invidiamque, odiumque simul, gelidumque timorem.  
His porrò accedit, subito quod forte tumultu  
Excussæ manibus tabulæ, revolutaque charta  
ASSOCIATORUM diros testata furores:  
Labitur ille in humum velox, properatque libellos  
Colligere in gremium, tacitâque recondere veste:  
At rapit oppressum, & conanti plurima frustra  
Erecto jamjam vulnus meditatur ab ense  
*Astræa*; ille ictum venientem à vertice cautus  
Prævidet, & celeri dilapsus corpore cedit.

Parte aliâ duxit distincta per atria Pictor  
*Cressiacasque* acies, & nigri Principis arma,  
Captivos currus, Regesque ad fræna sequentes,

Et



Et partum à Gallis repetito Marte triumphum.  
Talibus Exemplis monitus dum singula lustrat  
*Carolus*, haud unquam tantorum indignus Avorum  
Angliacas laudes simul & miratur, & implet.

T. Spark, Ædis Christi Alumnus.



## In OBITUM

*Augustissimi & Desideratissimi**Regis CAROLI II.*

**A**ugustos Manes, & non reparabile vulnus  
 Angligenûm, raptumque hostilis crimine Fati  
*Caroliden*, memorare jubet Dolor: Ille doloris  
 Nunc primum causa est; non præbuit ante querelis  
 Materiam; sed in hanc suspiria distulit horam.

Nunc quæ *Scotorum* rabies, torvusque *Genevæ*  
 Incola, triste neget madidi vectigal ocelli?  
 Cum fractâ Gracchorum irâ, vulgique tumultu  
 Composito, optatum pax extulit aurea vultum;  
 Cum jam securâ veheretur *Carolus* aulâ,  
 Et tandem emeritis promitteret otia curis:  
 Spem vanam elusit Lachesis, mediosque triumphos  
 Abrupit,



Abrupit, pacisque auctori sustulit usum.

Sic olim incerti post longa decennia belli,  
Pelides fato occubuit; capitique paratam  
Amisit laurum, & pendentem in vertice palmam.

Quis non suspiret? cum tu, pars altera fratris,  
Pars magna ille tui, extremo junxistis amore  
Pectora: cum fugitivæ animæ suprema *Jacobus*  
Frigora captavit; gelidâque in morte natantes  
(Ad Fratrem tamen erectos,) compressit ocellos.

Hinc lachrymæ; hinc procerum mistæ vulgiq; querelæ,  
Hinc luctûs pompa, & pullati nœnia mundi.

Sic infana olim cum te procul egit Erinnyes,  
Et patriis vulgi furor impius expulit oris,  
Absentem flevit Thamesis; flere Camœnæ.  
At, quamvis procul exul eras; te, *Carole*, vivo,  
Non desperatum est tandem mortalia vinci  
Et potuisse arma, & frangi potuisse rebelles.  
Eheu! nunc longo sejungeris intervallo:  
Nunc reditum prohibet claustris & gurgite vasto  
Styx atra, & major Libitina rebellibus armis.

Sola viget magna umbra tui, memorandaque fastis  
Gloria, quæ æternæ monumentis insita famæ,  
Usque manet, semper mansura: Hæc sola superstes,  
Hæc pars una tui; relevatque hæc vita dolorem.

Namque



Namque olim longi feros post temporis orbes,  
 Cum balbus puer, & linguâ titubante puella  
 Multa super *Caroli* pugnâ, *Carolique* triumphis,  
 Multa super fato rogitabunt; ore senili  
 Sic pater excipiet, feriemque evolvat honorum:

‘ Quis non *Annales* tantos, ludumque jocosæ  
 Fortunæ referet? cum densa per arma, per ignes,  
 Contra omnem fatorum ictum, fortisque novercæ  
 Vulnera, *Carolides* pede fixo immobilis hæsit.

‘ Imberbem vidit *Vigornia*; primus in arma  
 Cum rueret, fidæ dux idem & gloria turmæ,  
 Longam edens stragem: mediâ sic *Phœbus* in *Ossa*  
 ( *Phœbus* adhuc juvenis ) solium defendit avitum,  
 Immanemque *Otum*, vastumque *Typhoea* fudit.

Cum nigra adversi malè cederet alea belli,  
 Quot volvit casus? quam longos ille labores?  
 Quot sævi invictus sensit discrimina fati?  
 Quam bene solliciti favit clementia cœli?  
 Quam bene defendit Dominum suus æquore *Nereus*?  
*Nereus*, quem tanti non muneris immemor, armis  
 Afferuit, *Batavique* injustâ compede solvit:

Testis adhuc *Hollandus*, adhuc ostendit hiantes  
 Ore cicatrices, & acerbi insignia belli.

An memorem, *Augustæ* quis, adhuc spirante favillâ,

Æter-



Æternum posuit murum? quisve æmula cœlo  
Templa suo, & claras, pulsâ fuligine, turres?

Dum manet in terris feros hæc fama nepotes,  
*Carole*, Tu patrio exultans incedis Olympo.

Te Divus genitor securâ amplectitur ulnâ,  
Non metuens iterum hostilis divortia ferri:

Ecce! tibi gremio *Glovernius* instat aperto,  
Immaturum orci spoliū, viridisque rapina

Immitis Fati; æterni qui jungit amoris

Desuetos nexus, cœlestiaque oscula figit.

Fælices animæ! vestri pars una moratur,

(Eheu! tantum una) innumerosque moretur in annos

*Jacobus*: claudat Lachesis regale sepulchrum,

Raraque Cæsareo exultet Libitina trophæo.

*Jacobus Harrington, Ædis Chr. Alumnus.*



*In FUNUS**Viri Clarissimi*

JACOBI HARRINGTON,

*Egregii Poetæ, & Jurisconsulti peritissimi.*

**E**Heu! gementum quis sonus undique  
Invadit aures? quem sequitur Patrum  
Pullatus ordo? cui dolendam

Instituit Libitina pompam?

Eheu! quis heros, quis Deus occidit?

Invisit Orcum num malè belliger

Ormondus? an torquet furentes

*Aldricius* moriens Camœnas?

Non dura tantum sæviit Atropos,

Non ausa tantum; sed tamen inclytam

Ploramus umbram, sed decoro

*Aldricius* rigat ora fletu.

Rapta



Rapta est *Jacobi* funere lugubri

Ingens juvenus, germinibus bene

Matura primis: O novenæ

Deliciæ, dolor O catervæ!

Hic cùm sonanti carmine diceret

Reges in ipsos imperium necis,

Marone magno digna scripsit,

Digna suo cecinit sepulcro.

Quid mugit altâ voce *Sophos* forum?

En explicantem gnaviter audio

Abstrusa legum! En molientem

Magniloqui grave fulmen oris!

Nunc ora cerno pallida conscii,

Nunc fixa cerno lumina *Judicis*

Stupore, nunc primùm loquacem

Causidicos, reticere turbam.

Sed ille legum grande decus tacet,

Sed jam perenni docta silentio

Damnata vox est: O caducas

Spes hominum, facilesque tolli!

O quem futurum pectore finxeram,

Qui purpuratis cinctus honoribus

Exponeret leges, peritus

Attonitæ moderator *Aulæ*;



Qui voce solus Concilium Patrum

Olim moveret! sed rapit invidum

*Jacobe* Te fatum, sed ingens

Elyfios petis umbra manes.

Non arma posthac splendida Tullii

Vibrabit æquè, durave pectora

Emolliet quisquam, decorâ

Barbarie teres, & forenfis.

Utcunque circum gens petulantior

Strepant amantes, non alium Virum

Æquè fovebit seu Minerva,

Sive Themis, Tibi vix superstes.

Sic nymphæ Eoæ per morientium

Agmen procorum; per juvenum manus

Ruunt tenaces, & perempti

Sponte rogos fubeunt mariti.

*G. Adams, Ædis Christi Alumnus.*

TAU.



---

*TAURUS in CIRCO.*

**C**ommissas in bella feras, Hostique latranti  
Adversum memoro Taurum, atq; immania membra,  
Roboraque, rabiemque, & propugnacula frontis.

Et nunc arrectis spectanda in prælia vulgus  
Accurrunt animis; mihi nauta adnexus inhæret,  
Et cubitum impungit, piceosque exhalat odores:  
Hic lanius Turbæ obluctans pinguedine stillat,  
Multâ cæde rubens, & funere, Taure, tuorum;  
Hic nitidus collum terit acri pollice scissor:  
Ille Canum rabiem tacitâ gravitate revolvit;  
Hic Tauri stomachum ingentem, spumantiaque ora  
Miratur, geminâque armatam Cuspide Frontem.

Continuò ingentem, duplicatâ incude coactum,  
Infigunt terris vallum; Taurique tenaci  
Colla ligant vinclo, tortoque volumine stringunt.  
Arduus hic graditur circum, tardèque verendo  
Incedit passu, atque instantes despicit hostes  
Indignans, capitisque minaces quatit honores;

Quales



Quales non jactat Cervus, dum Cornua vibrat,  
Mille vibrat tela, & surgentem in vertice sylvam.

Circumstant fremitu populi; torvusque videri  
Taurophylax Circo spatatur, Robora crispans  
Rasa manu; Tauro semper fidissimus inter  
Luctumque, clademque, & iniqui opprobria Martis.

Hic, si quando hæret virtus, belloque frequenti  
Mens comiti defervet, amico Robore terga

Demulcens nodosa fricat, Caudamque vibrantem  
Spiris intorquet subitis, atque orbibus orbes

Implicat, hinc membris languentibus emicat ardor.

Lignum terga foveat magicum, viresque animosque

Sufficit ingentes, & ineluctabile Robur;

Et contorta novos inspirat Cauda furores.

Sic, quoties puero flaccescit pingue Cerebrum,

Crudeli tremulus laceratur vimine Clunis;

Dant animos plagæ, Cerebrumque cœstrumque vacanti

Suppeditant capiti, subitusque Poeta venustos

Excudit numeros, & lætus disticha pangit.

Jam Canis impatiens luctatur, grata Tubarum

Signa manens: oculis scintillat flammeus ardor;

Cor micat exultans bello; percurrit honestus

Membra tremor, magnisque vocat latratibus hostem.

Exiliens tandem irrumpit, sed cautior obstat



Ardenti Taurus, pronusque in prælia pendens  
 Luctantem, & frustra conantem plura, molossum  
 Cornibus attollit; volat ille rotatibus actus,  
 Subjectamque stupet turbam, plebemque minorem.  
 Concurrunt vulgi clamantes; stat globus infrà,  
 Et prono spatiosa inclinant ordine dorfa:  
 Decidit, & plebem titubantem pondere pulsat.  
 Inflat atrox pugnae Lanius, rapidoque Molosso  
 Succurrens, en ipse sub auras, pondus iniquum,  
 Turbatur rapidè, (dum plebs malè falsa caducum  
 Ridet) & ostendit Cornu femoralia rupta.

Interea nullo se continet ordine vulgus,  
 Nec jam Circus erat; Senior cum dira rudebat,  
*Heu Quianam vos tantopere* (num auditis?) Amici  
 Hinc atque hinc premitis? sic Fatus fuisse ruebat  
 Crudo, collisi subito sonuere bacilli,  
 Multaque sub rigido crepitârunt verbere Crura;  
 Cedit, & immenso plebs circumfunditur orbe.

Haud mora, corripunt spatium; ruit alter & alter  
 Dente minax, plausuque sequaci provocat hostem.  
 Ille breves iras, atque horrida dentibus ora  
 Contemnit securus, & ingens mole sua stat.  
 Hunc subita vertigine corripit; atterit illum  
 Mole pedum; stillant pendentia sanguine Crura,



Et pede contusæ crepitant per tergora costæ.

Ecquis erit finis Belli? Imperterritus alter  
Emicat indignans, trepidatque cupidine pugnæ.  
Quis furor, ô Catuli? quæ tanta licentia dentis  
Innocui? Satis, ô fatis atri vulneris, ecce  
Instaurare nefas, Hastatis frontibus instat  
Corniger-inconcussus, agitque impunè Triumphum.  
Eheu, nil moniti terret quos numine lævo  
Impellit malefuadus honos! prorumpit anhelus,  
Assultatque ruitque simul, labensque comanti  
Excutitur Capiti, & patulo frustra ore laceffit:  
Dentibus heu, quacunque locum virtute petivit,  
Successum Dea dira negat!

Arma duo tandem Comites socialia jungunt,  
Præcipitantque simul: miles veteranus uterque;  
Ille dolo valet, & pellacis acumine mentis;  
Hic vires, dentisque tenacia robora jactat  
Intrepidus: Populus se fundit prælia circum  
Multùm hærens animis, & hianti conticet ore.  
Tandem rauca canunt hinc illinc signa, canûmque  
Prorumpunt fraterna Phalanx:  
Hic ardens rictu ter hiulco insultat, inani  
Ter morfu crepitant dentes; at subdolus alter  
Membra movet contracta, soloque adnexus inhæret;



Ista dolus suadet, fallax dolus omnibus olim,  
 Nunc primum Domino : Taurus cervice reflexâ  
 Erigit obluçantem, & turbine torquet ad auras  
 Dimidium belli ; Comes ociùs impete fertur  
 In Taurum frustrâ victorem, & vindice saltu  
 Emicat ad nares, prensatque, & pendulus hæret.  
 Ter mugit, quassatque caput, rapidoque rotatu  
 Corpus agit circum furibundus, ter sonat auras,  
 Ter frustrâ planctu montes, sua regna, resultant :  
 Spuma rubet, stillantque undanti sanguine nares.

Sic, ut *Roma* refert, *Sanctus Dunstanus* olim  
 Candenti magnum prensavit forcipe nasum  
*Luciferi* ; Hic vasto prorumpit ab ore tenebras  
 Turbidus, inque atrâ livescunt Sulphura nube :  
 Ter mugit, ter dira rudit, vocemque profundam  
 Cum gemitu attollit ; ter frustrâ squallida regna  
 Respondent Domino, planctumque retorquet Avernus ;  
 Stridet olens, fumatque ingens semiûsta Proboscis.

*Fr. Knapp, è Coll. Magd.*



## PUGNA

*Gallorum Gallinaceorum.*

CUM patrias peterem sedes ( sicut meus est mos,  
Urbani siquando movet fastidia fumi  
Non ità gratus odor ) quà duxit semita, planum  
Introii campum, quem frondea scena supini  
Cingebat nemoris, mediâque in valle *Theatri*  
Circus erat: confusam illic coiisse catervam  
Invenio, admirans numerum, puerosque, senesque,  
Et lectam pagi pubem, atque ignobile vulgus.  
Qualis ad *Alphei* ripas atque *Elidis* urbem  
*Graiûm* turba ruit, cùm jam solennia Regi  
Coelicolum instaurat certamina; magnus ubique  
Concurfus, lætoque implentur littora cœtu.

Talia cernentem cunctandi insueta cupido  
Captat, & ignoti accendunt spectacula ludi.  
Tum Præco ( roseum cui crassi fœcula potûs  
Inflabat vultum; atque olidi suffimine pæti  
Halabat barba, & pinguem spirabat odorem, )



Imperii magnâ gaudens diuione, bacillum  
Huc, illuc quatit, atque omnem decedere Circo  
Infusum populum, & campos jubet esse patentes.  
Ociùs in cuneos glomerant, caveamque *Theatri*  
Ingentem complent, latumque sedetur in orbem.

His actis, duo, deposito qui pignore certant,  
Emittunt geminos texto de vimine Gallos;  
Ambo pares, ambo Heroum de stemmate longo  
Demissos; quorum cantantur bella per orbem,  
Materies fastorum, ævi & documenta futuri.  
Hos dominus fociis exemit uterque catervis,  
Nec per agros sivit, dulcesve errare per hortos;  
Nè Venere absument natas ad prælia vires,  
Aut alvo nimium pleni turgente laborent.  
Sed rerum prudens penetrali in sede locavit,  
Et falicis circum virgas dedit; insuper ipsos  
Cortibus inclusos tenero nutrimine fovit;  
Et panem, mulsamque, genusque leguminis omne,  
Atque exorta suâ de conjugè præbuit ova,  
Ut validas firment vires, pugnæque parent se.  
Nequicquam jejuni urgent vestigia nati,  
Poscentes lacrymis tenerisque amplexibus escam:  
Vincit amor gallorum, & avitæ gloria gentis.  
Quinetiam cristas ipsis, caudasque fluentes,



Et colli impexas fecuit pulchro ordine plumas;  
Ut rapido magis adversum, quasi veles, in hostem  
Impete procurrat Gallus. Mox arte Magister  
Juvit avem; quâque alma fatis natura negavit  
Roboris, ut tantis æquus se conferat ausis,  
Arma dedit calci; chalybemque aptavit acutum  
Ad talos, graviore queat quò surgere plagâ.

His armis instructi ambo, jam corbe patenti,  
Quâ data porta, ruunt, atque obvia pectora flictu  
Committunt. Hæret pede pes, & vulnera crebri  
Accipiunt redduntque, & terram sanguine foedant.  
Nam modò sanguineam cristam, rostroque prehensum  
Percutiunt caput; immani modò verberare tundunt  
Urgentes utrumque latus, collumque fatigant,  
Alter in alterius jactantes pectora ferrum.  
Succumbunt pariter, pariter surguntque ruuntque;  
Dant redduntque vices; nam cruribus addidit ingens  
Vis animi robur, pugnaeque arrecta Cupido.  
Magnus utrinque virum fremitus: sed amara fidelem  
Custodem, à teneris Gallo qui præfuit annis,  
Cura movet, priscæque subit pietatis imago.  
Multa super formâ recolens, super indole multa,  
Ut lateri comes & plausis accurreret alis  
Deque manu solitam libaret molliter escam;

Tam



Tam chari capitis plagas faniemque fluentem  
Ferre nequit : contorto humeros & brachia motu  
Corripit, & durum perſentit Conſcius iſtum.

Tandem, cū toto manarat corpore ſudor,  
Et graciles labor immenſus laſſaverat artus,  
Alter ab inſtanti paulū ſe ſubtrahit hoſte,  
Effugium ſimulans; multumque agitatus in orbem,  
Eludit gyro interior : ſubitusque ſequentem  
Devitat; fugit, ecce fugit de ſtercore natus  
Ad charam properans Venerem & Tua bella, Cupido,  
Vulguſ ait : non ſic iratis paſſibus alter.

Ecce decem pono libras : Quis pignore certat  
Dimidio ? hunc alter tranſverſo lumine ſpectat  
Gallorum mores multorum expertus & artes;  
Tecum inquit, contendam : ingens, illo auſpice, turba  
Conſpirat, ſpretæque audet ſe jungere parti.

Interea vario Galli veſtigia flexu  
Impediunt, texuntque fugas. Premit ille per orbem  
Uſque inſtans, calcemque terit jam calce ſuburgens,  
Et lateri incumbit; quin vires convocat alter  
Interea, atque ardens redit in præcordia virtus.  
Tum demū ſubito ſe proripit impete, & hoſtem  
Evadit longè prior; at mox involat acer,  
Convertitque vias, & verbere fervidus inſtat.



Ceu Parthus dans terga fugæ versâque pharetrâ  
Hostibus improvisus adest; turbata retorto  
Agmina agit jaculo, & victor cedendo triumphat.  
Confligunt iterum, totisque in prælia nervis  
Itur; & effuso crudescit sanguine pugna.  
Tollunt se arrectos, & densis pectora plagis  
Perfodiunt, pulchramque petunt per vulnera mortem,  
Immiscetque pedes pedibus, bellumque laceffunt.  
Non cladem illius pugnæ, non vulnera dictis  
Commemorare ausim; non, si mihi lingua fuisset  
Mæonidæ atque os magna sonans; qui, Maxime Murum,  
*Psicharpax*, grandi cecinit tua prælia versu,  
Ingentes animos & vitæ prodiga corda.

Jamque ferè spatio extremo, finemque sub ipsum  
Adventant; fessos tum creber anhelitus artus  
Concutit; at quanquàm in mediâ jam morte tenentur,  
Non tamen absistunt, Martemve iramve remittunt  
Magnanimi: impatiens vinci simul advocat omnes  
Nequicquam vires, & inania vulnera miscet  
Nobile par Gallorum: hîc lassis arida sensim  
Genua labant, nervi languent, & victus uterque  
In mediâ pariter jacuit resupinus arenâ.  
Ac veluti *Brutus*, sobolesque infensa *Superbi*  
*Acer Aruns*, solos sese in certamina Martis

Posce-



Poscebant, & multa urgentes vulnera collo  
Infixêre, humerisque, & pectoribus hirsutis :  
Jam loca vulneribus deerant, pariterque cadebant  
Confossi, placidâque ibi demum morte quiêrunt.  
Sic plagis fessi atque æquo certamine Galli,  
Demissâ simul ad terram cervice feruntur ;  
*Vitaque cum gemitu fugit indignata sub umbras.*

*Jo. Friend, Ædis Christi Alumnus.*



## GIVETTA ARDENS.

*B.* **D**UM Bellona furit, dubioque in cardine rerum  
Hærent suspensi Reges, passimque per urbes  
Nuncia fama ruit; cur non ( quoniam hoc datur otî,  
Colloquiisque vacat, cur non ) sermone vicissim  
Ludimus innocui, & labentes fallimus horas?

*L.* Recta mones; tamen unde novæ argumenta loquelæ  
Sumamus? Tu, si quid habes, profer. *L.* Novitatem,  
Polleo ego; nam hanc semper amavi, & plurima legi  
Scripta viri insignis, qui alternis præla diebus  
Exercet, variâque implet novitate popinas;  
Hunc multosque alios semper lego. *S.* Totus in illis.

*L.* Totus in his fateor; quis enim tam divite venâ  
Eloquii præpollet, & æquat prælia scriptis?  
Ut meminisse juvat bellum exitiale *Namurci*,  
Et fusas *Turcarum* acies ad mœnia *Budæ*,  
Rubras *Hungariæque* acies, ubi turbidus *Ister*  
Veloci cursu flaventes torquet arenas;  
Ingentes etiam memini *Rheno* duce pugnas.

*B.*



*B.* O lepidum caput, atque insulso sidere natum !  
 Siccine cuncta notas, ut *Rheni* molle fluentum  
 Esse virum credas ? *L.* Tu, si quid rectius istis  
 Noveris, imperti. *S.* Mitte hæc, & ad altera transi :  
 En Conjuratos in regia fata latrones ! [quo.

*L.* Res horrenda. *B.* At carnifici hæc tractanda relin-  
*S.* Tu quoque carnificem caveas. *L.* Hunc fama recenset  
 Insignem pietate virum, & super omnia justum  
 Servantemque æqui ; at notum mihi nomine tantum.

*L.* Sitque ignotus adhuc moneo. *B.* Quid in hisce mo-  
 ramur ?

Altera res agitur, jactatque per oppida rumor  
 Moenia *Caletana*, exardentemque *Givettam*.

*L.* *Caletum* novi ; jampridem audita *Givetta* est :  
 Singula scire velim, & rem totam ex ordine gestam.

*B.* Sit meus iste labor cupio ; namque omnia ad unguem  
 Nota mihi, memorique manent in mente reposta.

Hic firmo *Lodoix* fretus munimine valli,  
 Fœcundam posuit messem, Cerealìa dona,  
 Hordea, frumentumque, & equorum pabula, fœnum,  
 Terræ incrementum, bellicque alimenta futuri.  
 Sed frustra impletur flavo teres area culmo,  
 Et plenâ conferta gemunt granaria messe.

*Wilhelmi* auspiciis *Athlonius* advolat Heros,



Ultricemque jacet flammam, & spem ludit inanem.

L. Quis tamen ille Heros? anne è nostratibus unus,  
Strenuus aut *Rhodani* potator, an accola *Rheni*?

B. Quæ regio in terrâ illius non plena laborum?

Siccine nota tibi, rerum sic lecta novarum

Scripta? hic est miseris notus *Ginklæus Hibernis*,

Quo ducente, rubros hostili sanguine campos

Fugère attoniti *Celtæ*; atque ultricibus armis

Contemptor Divûm *Ruthrus* (infatiabile monstrum)

Occidit: ille etiam clausos in mœnibus hostes

Fudit, cognomenque evictâ ex urbe recepit.

S. Fas mihi nota loqui, seriemque evolvere rerum;

Fas bella ordiri, quæ cuncta miserrima vidi,

Et quorum pars magna fui. L. Quis funera tanta

Explicet, aut possit verbis æquare laborem?

S. Vidimus attonitis jaculantem mœnibus ignem

Milem, & ardentes immisto sulphure glandes:

Vidimus ad summa exurgentes culmina flammæ,

Dum simul ignis equos, & equorum pabula torret;

Una domos dominosque, bovesque boûmque labores,

Pulverulenta rapit flamma, & furit æstus ad auras.

Plebs confusa ruit, fugiuntque per oppida cives,

Vitantes ignem; mox corripit acrior ignis;

Undique terribiles flammæ, exitiumque coruscum,

Splenden-



Splendentesque ruinæ, & latè fulgidus horror.  
 Nota petunt miseri, sed vana, levamina cives,  
 Amotas tegulas, sublataque culmina tectis,  
 Avulsumque pavimentum, nudataque terræ  
 Viscera conspexi, ut violentum ponderis ictum  
 Excipiat molli amplexu, gremioque recondat.

*L.* Sic *Parthus* bellum devitans opprimit hostes  
 Incautos prudente fugâ, & cedendo triumphat.  
 Unde tamen jactat distantes machina flammæ  
 Edoceas, & qui tantos vigor excitat ignes.

*B.* Ferrata imposito volat ardens sulphure concha,  
 Longum syrma trahens, scindensque in nubibus arcum,  
 It furiale rubens. *L.* Pavidum sic territat orbem  
 Stella minax, volitatque accenso crine Cometes.

*S.* Sed nec stella magis fatali exæstuat igne.

*B.* Illa cadens tremulam vasto quatit impete terram,  
 Ingentique boatu dirupta evomit ignes,  
 Et quassa elidit solido fundamine tecta,  
 Evertitque domos: nunc mortis mille figuras,  
 Semivivosque artus, & singultantia corda,  
 Et gemitus morientum audires: cuspide miles  
 Depositâ tremit, & cæcam penetrare cavernam  
 Secretosque locos quærit: quin protinus altas  
 Machina perrumpit latebras, & terra dehiscens

Involvi



Involvit trepidantem, avidoque absorbet hiatu.

*S.* Surgentem ad flammam paleæ volvuntur inanes,  
Flavescentesque rubent segetes, stipulæque volantes  
Ardent, & crepitant victricibus hordea flammis.

*B.* Sævus ubique furor, regnatque per oppida luctus  
Tristia, virgineisque choris gravis incubat horror.  
Undique diffugiunt tremulæ per compita nymphæ,  
Pulchra cohors, nec jam versato mollia fuso  
Pensa trahunt, agilique manu subtemina ducunt.  
Territa quin refugit subitâ formidine virgo,  
Inque proci gremio jam primum blanda recumbit.

*L.* Crudeles flammæ saltem violare puellas  
Parcite; non istis meruerunt ignibus uri.

*S.* Vidi ego per vicos trepidum genus omne virorum,  
Hinc natum exanimem deflet Pater, inde maritus  
Languentem tenet uxorem; charique colonus  
Spem gregis amissam luget, vacuosque labores.

*B.* Ingenti mox templa ruunt collapsa ruinâ,  
Reliquiæque, cruceque ardent, & sacra supellex  
Ignatâ, fumantque novis altaria flammis  
Everfa, & juxtâ pinguis jacet hostia Flamen.

*S.* Hinc Monachum vidi abdentem timida ora cucullo,  
Signantemque manu pectus, tremulâque libelli  
Exciderant pavitanti, & sancta rosaria, dextrâ.

*L.*



*L.* Mira refert. *B.* Haud vera refert. *L.* Ficta, omni  
ficta ;

Nam certum est nil tale meos memorare libellos.

*S.* Mene putas curare tuos ignare libellos ?

Improbis iste Author nunquam vel nomine tantum  
Me notat, aut narrat, quæ gessi, ingentia bella.

*B.* Parcius ingenuis obtrudas ista memento.

*S.* Sed vidi majora ; ambabus Belga diotam  
Dum tollit palmis (heu lamentabile fatum!)

Excutitur patera, & fusus liquor omnis, & ipsa.

*L.* Heu ! quantus lacrymarum imber jam proluit ora  
Maluit hic altas rapuisse incendia turre,  
Regalesque domos, quàm sic violare Falernum.

*B.* Ut fervet calicem, proprium caput offeret igni.

*S.* Quin aliud, dictuque oritur mirabile, monstrum:  
*Helvetius* graditur dum circum compita miles,  
Torva tuens, fumosque leves eructat in auras ;  
En ! accensa volat fax, & stridente favillâ  
Excudit ore tubum ; furit atrox flamma per ora,  
Cæsariemque plicatam urit, barbamque micantem.  
Hic furibundus alit vesano in corde dolorem,  
Solamenque recusât, & ultrò trajicit ense  
Pectora, nec poterat barbæ superesse crematæ.

*B.* O frontis perfrictæ hominem ! non te pudet horum ?

Non



Non hæc *Ferdinandus* habet, nec talia fingit

Pagina *Mandevilli*. L. An *Mandevillius* ille est,

Qui varios hominum mores describit, & urbes?

Hunc ego perlegi, miratus sæpe virorum

Ingentesque pedes, summoque in vertice ocellum.

Certè hic nil fingit. S. Nec ego; tamen invidus ille

Rumpitur invidiâ. L. Et rumpatur. Nonne aliud quid

Vidisti? nam audire juvat; fas visa referre.

S. Dum gladium femori, atque aurata monilia collo

Accingit, pyrioque refertas pulvere thecas

Circùm humeros jactat *Gallus*, victorque pererrat;

Scintilla exiguo suscepta foramine thecæ

Sulphureum accendit globulum; furit ilicet ignis,

Horrendumque tonat; rapitur sublimis in auras

Fumantes, nigroque levis volat æthere *Gallus*.

Mox cadit in terram discerptus membra; revulfus

Hic humerus jacet, inde caput, sparsumque cerebrum;

Extremaque petunt vel adhuc spirantia truncum.

Vidi — B. Quin parce auriculis; Tibi copia fandi

Sat concessa diu. Dum tot spectacula fingit,

Res ipsa est dubia, & minuunt mendacia verum.

L. Quales ille locos, & quæ miracula vidit?

Quin vos ite leves nugæ, chartæque novorum

Repletæ, & rapiant numerosa volumina flammæ.



Tu mihi solus eris liber, & tibi talia gesta  
Narranti, totis gaudebo vacare diebus.

*S.* Ast ego, quàm vellem præsentia cuncta tueri!  
Quàm cupio spectare iterum galeasque nitentes,  
Armaque sanguinea, & fulgentes ære catervas,  
Oppidaque everfa, atque undantem pulvere fumum.

*B.* Pergite vos Juvenes, & nobilis excitet ardor  
Ingentes animos: ite & per bella ruentes  
Igneus impellat vigor, atque interrita virtus:  
Atque hūc detulerit varios ubi fama labores,  
Magnanimosque ausus, celebrabunt prælia Musæ,  
Et vestra hoc olim resonabit facta \* *Theatrum.*

\* *Ubi hoc poema publicè proferebatur.*

Honorat.

{ *Car. Bertie,*  
*Rich. Stewart,*  
*Steph. Lennard,*  
*Baronetti fil.*

} *Ædis Christi Alumni.*



*In NATALEM*  
*Principis WALLIÆ.*

**O** Surgens Britonum decus! O animosa ferocis  
*Rinaldi* foboles! O spes Extrema Stuartum!

Te tandem tardo fudans molimine finxit,  
Te tandem teneræ indulgit Lucina Parenti  
Solamen, pretiumque moræ: Tu Fata Tuorum  
Pendula, lapsuramque domum, dubiosque penates  
Æternum firmas; & avitum extendis honorem;  
Tu tristes fratrum Cunas, Urnamque frequentem,  
Et cineri aggestos cineres; generisque rependis  
Cæsarei clades, & iniquum absolvis Olympum.

Non etenim frustra plorat Berecynthia Mater  
Triste puerperium; Natosque in patre sepultos:  
Cum tandem vacuis succedat Jupiter ulnis  
Fataque venturo præludant sæva Tonanti.

Tu, dilecte Puer, meliori conjicis urnâ  
Adversas Britonum fortes; niveasque refundis:



Te Mavors veniente filet : filet horrida late  
Seditio ; & , vanæ metuens se credere pugnae,  
Victa fedet, Puerumque timet Civilis Enyo :  
Aspice compositam Tethyn, requiemque Profundi ;  
Nulla Caledonio Tempestas surgit ab axe,  
Nec lenes iterum Sabrina exasperat undas :  
Pax belli immemores Brutos, Gracchosque silentes,  
Pax Cinnae, Mariosque tenet ; Pax omnia circum  
Temperat ; & placidam cunis prætexit olivam.

Sic ubi terræ ignis, ponto se subjicit aer,  
Nec servant Elementa fidem, nec fœdere certo  
Se male dispositæ sociant vaga femina Deli ;  
Firmat Apollo lares, & nati Conscia Phœbi  
Insula dediscit bellum, & solidata quiescit.

Non Auguste Infans, non tantum limina Jani  
Clausa colis, Pacisque studes inglorius arti ;  
Te primis etiam finget Bellona sub annis,  
Et teneram accendet mentem, Martisque docebit  
Dura rudimenta, & rigidi studia aspera belli.

O animose Puer, Quo Te per inhospita saxa,  
Trans Rhodani fluctus rapiet, trans ostia Rheni  
Famæ dulcis amor, dubiisque interrita virtus ?

Cressiacas iterum lauros, Britonumque sepultam  
Extendes famam ; Tecum numerosa Garumnæ



Tranabit fluctus; aut scandet jussa Pyrenen  
 Anglorum pubes; & fors numerabor in illis.  
 Tu modo, Cura poli, & Gentis spes una Britannæ,  
 Alme Puer: si fida tuis Majoribus olim,  
 Si semper Rhedycina fuit; si adversa rebelli  
 Se turmæ opposuit; si præbuit ubera Patri;  
 Et tua solenni Canit incunabula versu:  
 Tu sacras tutare arces, immotaque Phœbi  
 Mœnia, Musarumque domos, Arasque perennes.

*Vincentius Corbet*

Baronett. ex Æde Chr.

Carmin excerptum ex Strenis Natalitiis  
 Acad. Oxon. è Theatro 1688.



*In NATALEM*  
*Principis WALLIÆ*  
 ODE:

*Excerpt. ex Strenis Natalitiis Acad. Oxon. è Theatro 1688.*

**N**ON ære rauco facta Tonitrua,  
 Non Ordinatae per laquearia  
 Festæ Lucernæ, non renidens  
 Ignibus innumeris Platea,  
 Bono Diei tam memorabilem  
 Addunt honorem, quam brevis arbitræ  
 Plausus Camœnæ, nec Latinâ  
 Arte carens genioque Versus.  
 Tuos labores, magna puerpera,  
 Novamque Prolem non morientibus  
 Mandabo chartis, quas futuro  
 Posteritas leget omnis ævo.  
 En, auspicati murmura Barbiti  
 Audis? O Tu, iusta superbia  
 Parentis Augustæ! O Beati  
 Mascula progenies Jacobi!

Quando



Quando innocentes corpore firmior

Cunas relinques? quando minoribus

Exibis annis, & virile

Ingenium capies ab ævo?

Tunc forte Nostras nobilis incola

Intrabis Ædes; ut teneram indolem

Paulisper apponas togatæ.

Ingenuis studiis Minervæ:

Hîc, civitatem quis deceat status;

Hîc disputabis, quem teneat locum

Romana virtus; quos crearet

Sparta viros, faciles perire:

Quid Marte Pyrrhus, quid Fabius morâ

Possêt, quid Urbi proximus Hannibal,

Disces: Et evolves Tuorum,

Facta Patrum, bene nota Famæ.

Vacante quodam tempore, forsitan

Hæc ipsa de Te carmina publica,

Hæc ipsa lecturus requires:

Ah, quid ab hoc calamo profectum,

Meisque Musis & tenui lyrâ,

Placere tanti judicio viri

Valebit? ah, quantum pudorem

Exiguæ facies Camœnæ?

Nec



Nec Tu Poetas, gloria seculi,

Contemne, Princeps, aut Citharæ sonum:

Per quam tot Heroes repositi

Sedibus æthereis quiescunt.

Theron, & Alcon, & Chromius vagæ

Doctus quadrigæ, & Diagoras pugil

Omnes in æternum jacerent

Sub tenebris, & honore casti;

Ni digna cœlo nomina Pindarus

Versu fideli munierat fatis,

Misertus illustres Amicos

Atque dati breve tempus ævi.

*Geo. Dixon, Ædis Christi*

*Superioris Ordinis Commendatarius*

*Fus*



*Jus* PILEI  
OXONIENSIS.

*A.* **Q**uid nos O socii ignaros conscendere rostra  
Impulit, aut quorsum cum tanto Vulgus hiatu  
Intenti ora tenent, arrectisque auribus astant?

Nescio ego prorsus rem omnem. (*C.*) concedimus ultro.

*B.* Carmina sunt dicenda, sed O quis carmine pollet?

*A.* Polleo ego; mihi nam dulces ante omnia Musæ,  
Et patriâ quoties jacuit neglectus in aula

*Quarlus*, & ingentis carmen sublime *Witheri*,

Arripui fervens, & pernox sæpe relegi,

Exhausique acri studio sacrata puellis

Carmina Pieriis, & multâ digna lucernâ.

*C.* Digna quidem; sed quæ tantum lychni graveolen-

tem

Involvant adipem; At multum tibi debet Apollo

Qui stupidum memoras tantâ cum laude *Witherum*:

Ve-



Verùm age quale potes cudas miserabile carmen.

*A. Salve O magna cohors; mihi Vos nunc contemplan  
Major lætitia est in pectore, quàm fuit ante.*

*C. Audis? (ad B.) Musa redit multùm irridend*

*Cuculli,*

Atque iterum rhythmo tinnit Romana poësis.

*I (ad A) miserande Gradum ad Parnassum confule, ven*

*Ut discas comptum meliori educere carmen.*

*A. Tune mihi gnaro præcepta hæc ingeris? istum*

*Tune jubes volvendo librum renovare labores?*

*O mihi post nullos unquam memorande poetas*

*Magne Gradus! non Te valet exuperare canendo*

*Flaccus, non vincit divinæ Æneidos autor.*

*C. Nimirum hic isti par est sapientùm Octavo,*

*Judice quo FINIS præclara volumina scripsit.*

*A. Sed quid me numeros quid versus fundere coget,*

*Narret Apollo mihi. (C) Fiet tibi verus Apollo,*

*Dicere qui versus coget; nam pectora circum*

*Serpit torpor iners, & nubila tempora lambit.*

*A. At Tu (ad B.) qui spondes mirâ gravitate Cato*

*nem,*

*Dic precor. Hic (ad C) tantum nugas effutit inanes*

*Ludicrus, & captat jocularis scurra cachinnos.*

*E. Pileus invitat, merces ea carmine digna est.*



*A. Pileus?* (*B.*) & versus quia res & tempora  
poscunt,

Dicite materiam quam fumitis? (*C.*) Id Tibi (ad *A.*)  
dicam,

Si paulum auscultes, Tua Phyllis decantanda est,  
Phyllis, quæ niveo vultu, quæ lumine molli  
Scintillas jaculata, accendit nuper amantem.

*A.* Heu! mea rure procul Phyllis suspiria ducit;  
Me vocat absentem Corydona, auditque videtque.  
Sed quid si major surgat mihi carminis ordo,  
Et magni aggrediar *Gulielmi* pangere laudes.

*C.* Ingenium *Batavum* non æquat *Cæsaris* acta,  
Aut animum invictum *Gulielmi*, & nobile robur.  
Te potius *Mævi* (ad *A.*) satyrâ stringemus amarâ,  
Qui miserum in rostris audes disperdere carmen.

*B.* At nunc materies me Judice versibus apta est  
*Pileus*, & cristæ non enarrabile textum.

*A. Pileus?* Hem quid vult sibi *Pileus*? Estne poeta  
Hic, aut *Mecænas* qui Vati præmia ponit?

*B.* O cæcas hominum mentes quas devius error  
Implicat! At Te (ad *A.*) si advertas, meliora docebo.

*C.* Hei mihi! *Baxterus* sermonem orditur ineptum.

*A. Pileus* ex tenui compacta est fabrica ligno,

Quam



Quam nigro indutam panno, formâque quadratâ  
 Insignem, exornat mediam bombycinus orbis,  
 Grande decus capitis. ( *C.* ) Sic nugis addere pondus  
 Assuetus quondam pinxit cochleare *Zacutus*  
 Concavo-convexum, cui cauda oblongula, per quam  
 Dextra tenax aliquod liquidum patulo inserat ori;  
 Mirum instrumentum ! ( *A. ad B.* ) Quis Dædalus ar  
 peritus

Egregium hoc confinxit opus ? terrarum ubi vivit ?

*B.* Est locus oppositus sedi, quæ surgit ad auras  
 Auspiciis *Alurede* tuis sacrata Camœnis ;

Plurimus hîc protenso in stipite pendulus hæret

*Pileus* ; hîc plenus rimis, curtusque galeri

Circulus, atque brevis ligno vix prominet Orbis ;

Quæque genas vetulæ effœtas frigentis obumbrat

Pyramis assurgit ; nec non ludibria ventis

Fasciculi pendent spirarum, & serica fila.

Hîc opifex sedet, & magno molimine fudat,

Nunc rotat in teretes orbes priûs igne paratum

Vellus, nunc lignum molitur futile, quod mox

*Pileus* evadit. ( *A.* ) memini, nec plura requiro ;

Sæpe equidem vidi artifices, & *Pilea* vidi ;

Sed non fronte geram. Tali me tempora cinctum

Tegmine, si procul aspiciat, mox turba boabit



En *pecus Ignatî* ! correptaque protinus œstro

*Romanæ* infamem avellet *Meretricis* amictum.

Præterea indignè patior dictæria vulgi

Ridentis juvenes *Quadras* in fronte gerentes.

C. Unde tibi *quadra* displicuit quem semper edendi

Urget amor, fartumque juvat, taurinaque costa ?

Quem sæpe in morem Trojanum, absumere mensam

Et violare manu penuria adegit edendi

Dulcis crusti Orbem, patulis nec parcere quadris ?

A. Quisque dapes amat : At major me cura fatigat,

Me pretium movet, & species formosa galeri,

Cui nitor egregius, quem circum argentea spira

Ludit, & ardenti subnectit fibula gemmâ :

Tale decus capitis mihi mens gestare superbit.

B. Heu quantum nescit fatum, sortemque futuram

Mens hominum, quoties fastu turgescit inani !

At Tibi tempus erit cum nunquam emisse galerum

Optaris, quo jam frueris gaudesque potitus.

A. Dii prohibete minas quale omen præscius au-  
gur

Quod tempus fatale canit ? (C.) *Gadburius* alter

Mœsti Carolidæ reditum, Auriaciue ruinam

Præfagus miseram cantat. (B. ad A.) Dum forte ga-  
lero

Tectus,



Tectus, nocte domum petis, & non amplius ingens  
 Campana attonitas tinnitu verberat aures;  
 Occurrit subito facies invisa *Magistri*  
 Cui manicas villosa exornant vellera Serum;  
 Hunc fugis, hic sequitur, dextrâ jam jamque tenaci  
 A tergo prensat, dictis simul increpat ultrò,  
 Et licet invitum, nomenque domumque fateri  
 Et manè accitum nummos deponere cogit;  
 Plurimus haud tanti constabit Pileus, anno  
 Emenso, quanti pretiosi multa galeri.

*A.* Hunc olim ut memini jussit vitare *Magistrum*  
 Me Pater; At quid? non aliâ ratione parandus  
 Carminibus solis debetur Pileus? (*B.*) haud fas  
 Nobis *Aoniæ* leges mutare *Catervæ*;  
 Sic statuunt Musæ. (*A.*) Ergo omnes quos undique  
 cerno

Tali apice insignes, recitârunt carmina rostris  
 Doctoresque, magistrique, atque his proximus ordo?

*B.* Paucos Musa beat, sed queis non dexter Apollo  
 Dat citharam & numeros, Gradus his dat *Pilei* h  
 nores.

*A.* Quid meus ille *Gradus* qui Phæbi numine co  
 plet.

Lectorem, & gemina ad *Parnassi* culmina ducit?



B. Non tuus ille *Gradus* qui vatum fragmina pro-  
fert,

Sed doctrina ingens, sed longi temporis ordo  
*Pilea* concedit, frontisque insigne decorum.

A. Nullo igitur fas est mihi tegmine cingere crines?

C. Tegmine non opus est; solido confide cerebro.

B. Ordo ut se variat, variatur *Pileus*; est cui

Plana superficies, quem non teres ornamentum

Distinguit medium; capiti alter flexilis hæret

Qui tibi debetur; sed turba jocosa placentæ

Assimilat. (C.) Quid si? non huic odiosa placenta est.

B. Alter adhuc restat rigido subtemine crassus,

Qui pinguis nitet, & ventos contemnit & imbres;

Talem haud gestabis. (A.) Talem nec forcipe tangam,

C. Sed tanges olim, cum legum ænigmata disces,

Tum teget hic crinum vibratos fordidus orbes

*Pileus*. (B.) At diverticulo sat lusimus omnes,

Eia agite ingenti celebremus *Pilea* laude.

A. Opportuna mones; quin tanto lemmate dignum

Sublime incipiam carmen; narrate puellæ

Qualia Musa suo largitur præmia vati.

Posthac non vulgaris honor mea tempora cinget,

Nec meritâ meliora galeri inglorius orbis

Fronte super surget; decorat me insigne poetæ

*Pileus*,



Pileus, & cono undanti par sericus orbis :  
 Hunc gerit indutus Tyrio velamine Præful ;  
 Et Judex quoties vitas & crimina discens,  
 Quæfitor movet urnam, & librat fata reorum.  
 Quin licet arripere hinc omen ; labentibus annis  
 Forte dies veniet, cum Judicis ora gerentem  
 Me videas ; mihi namque olim carissima mater  
 Demulcens caput, atque attollens lumina cœlo  
 Det tibi felices det multos Jupiter annos  
 Inquit, forte olim ni me præfagia fallant  
 Æquis eris Judex, Tyrioque nitebis in Ostro,

*C.* Tu Judex ? potius Tu coram Judice stabis  
 Consciis. (*A.*) At Tu (ad *C.*) Si sapias, compesce  
 bellum,

Si pergas insanire, haud me impune laceffes.

*B.* Ne bilem moveat quicquid tibi dixerit ille ; (ad *C.*)  
 Perge opus exigere. (*A.*) Ipse libens mandata capeffam  
 Est mihi quod soli docto gestare licebit :  
 Sæpe togâ indutus pinguis stupet *Aldermannus*,  
 Et verrit longo *Bollanus* fymate terram :  
 At tales cerebro vacuos ut Pileus ornet,  
 Non Dii non homines, non concessere Camœnæ.  
 Me potius decet hic, Me tali dignor honore,  
 Carmina qui fundens Helicone undantia pleno



Præripui cunctis palmam, meruique coronam.

C. Sic Corydon cū nemo audet se credere pugnæ,  
Victor ovat, magnos artus, magna ossa, lacertosque  
Ventilat, & baculum, capulumque, & cingula tollit.

Sed novi quantum dabit hæc victoria factum :

Per vicos videor gradientem cernere, ocello  
Phyllidas obliquo stringis, siqua obvia nympa,  
*Pileus* exuitur, deflexo corpore, dextrâ  
Tangis humum; rursumque caput tectum arduus effers,  
Mox dominam accedis ( siqua est quæ torret amantem )  
Huic postquam frustra effudisti mollia verba  
Ostentas tumidus quadratum frontis honorem,  
Et miseram lassas versus recitando puellam;  
Illa tamen raucum medio in sermone relinquit,  
Et ridet *Cottæ* surgentem in vertice cristam.

B. Parciùs hæc : nocuere jocosæ scommata linguæ;  
Quin me jam finite huic sermoni ponere finem.  
Non nobis favor, aut annorum inglorius ordo  
Sed vis ingenii exortes concessit honores.  
Post vigiles curas, & tædia longa laborum,  
Et pene erosos repetitis morsibus ungues,  
Dum rudis excolitur magno conamine versus;  
Donamur tandem dignâ mercede laborum  
Et mox qui fluitat congestâ vulgus arenâ



Ingenti unanimes quatient subfellia versu :

Sic ducis egregii victricia tempora laurus

Cingit, dum læto celebrat clamore triumphum

Vulgus, & herois laudes ad fidera jactat.

*G. Adams, Ædis Christi Alumnus*



*In THOMAM CLUSIUM,*

S I V E

*Campanam magnam Ædis Chr.*

**S** Umme Deûm, armatâ qui torques fulmina dextrâ,  
 Et quô pressa gemit subjecti Regia cœli,  
 Si, quem concussæ timuerunt Elidis arces,  
 (Cùm latè quondam toti convitia cœlo  
 Fecerunt majus mentita tonitrua Numen )  
 Cernis adhuc meritas dantem Salmonea pœnas  
 Sis bonus ô, facilisque aspira ingentibus ausis,  
 Dum tibi rivalem celebrat mea Musa *Tonantem*,  
 Qualis in umbrosæ Dictæis vallibus Idæ  
 Vagitus pressisse tuos, primasque querelas  
 Possêt, & in latebras pavitantem egisse Parentem,  
 Ultra Curetum plausus, Corybantiæque æra.  
 Nam neque ( Natorum quamvis commune sepulchrum )  
 Os vastum tanto pandit Saturnus hiatu.  
 Te quoque, quem cœlo profugum charissima Lemnos  
 Excepit, solusque Jovi sua tela ministras



(Ferrea seu nigris vis sit vincenda caminis,  
Sive tibi fuso melius quid ducitur ære)  
In partes, Vulcane, voco: tua Numina posco  
Dum nova mirandæ molimina persequor Artis;  
Dic age (nevè Deum pudeat cessisse minorem)  
Num tale ardentis coctum fornacibus Ætnæ  
Movit opus multo madidus sudore Pyracmon,  
Brontesve, Steropesve, quibus tosto horrida mento  
It barba, & densâ nigrantes nube capilli  
Latos inficiunt humerosque, torosaque colla.

Æquali primùm se porrigit area campo  
Lævis, & in varias mox convertenda figuras.  
Namque tibi effossæ caveam dabit agger arenæ  
Quæ longè terrarum imos petitura recessus  
Immani quondam ruituram pondere molem,  
Excipiet gremio, vastaque voragine condet.  
Indè triplex totidem surgit fornacibus Ordo,  
Et sæpè impositis veluti cessura metallis  
Saxa gemunt, & divulsâ compage laborant.  
Tum verò (horrendum!) cæcis injecta caminis  
Sylva furit flammis, piceique volumina fumi,  
Obducuntque diem, & cœlo nova Nubila mittunt.  
Quà data porta, ruit passim Vulcanius ignis,  
Et multâ gravidas fuligine nixus in auras



Infectisque tremit radiis, & luce malignâ.

Jamque ubi pervasit totam vis ignea molem,  
 Æreus effundit flavo se gurgite rivus,  
 Et ducit ternos ardenti tramite fulcos;  
 Ut primùm patuere viæ, resoluta Metalla  
 Circum claustra fremunt, atque indignata teneri  
 Attollunt sese, laterique illisa resultant.  
 Ceu quondam pelago immugit, ripisque profundis  
 Intonat Ægei decimæ tumor arduus Undæ:  
 Sub pedibus trepidare solum, totisque moveri  
 Sedibus, & sparsum latè increbescere murmur.  
 Protinùs attonitum stupet ad spectacula vulgus,  
 Liventesque genas, & pallida protinùs ora  
 Cernere erat, sive hoc infueti audacia cœpti  
 Et dubii fecere metus, animique labantes,  
 Seu simili vultus ducant ex ære colores.  
 Ante omnes Faber ipse tremit, similisque furenti  
 Huc illuc oculos torquet, si fortè corusci  
 Exundent latices, & pleno margine surgant.  
 Cærulea effulsit Lux tandem, atque omine læto  
 Flamma ter accensa est, apicemque per aera duxit.  
 Mixta metu ancipitem percellunt gaudia Mentem  
 Et signi suspecta fides, animoque recurrant  
 Tristia decepti toties Exempla laboris,



Cum quondam prono subter labentia rivo  
 Fusa sibi insolitos aperirent æra meatus,  
 Nativæ tanquam reditura in viscera terræ.  
 Ter prius extructis arsit fornacibus ignis,  
 Explorata focus ter Massa incanduit æstu,  
 Ter superas sese tulit indigesta per auras;  
 Quales sæpè parit tellus Nilotica fœtus,  
 Quorum prima viget motu pars, altera terram  
 Ponè legit, certâ vix agnoscenda figurâ.

Expectata diu tandem Nos hora revisit,  
 Inceptumque urget longo jam doctior usu  
 Artificis manus, & fallendi nescia dextra.  
 Ecce oritur, nitidoque emergit *Clusius* ore,  
 (Horrendum populo Nomen, gentique Togatæ)  
 Jane pater, socios tecum partitus honores,  
 Sive diem nostro referet, seu claudat Olympo.  
 Quà sonat, impulsus validis tremit ictibus aer,  
 Atque in mille agitur rapidâ vertigine gyros.  
 Quà sonat, incautas quos usu ceperit error  
 (Fallere seu malint hibernæ tœdia noctis,  
 Seu juvet æstivos Umbrâ distinguere Soles)  
 Idem omnes simul ardor agit, mora nulla, vocati  
 Diffugiunt, seseque intra sua limina condunt.  
 Sic quoties campis ludos instaurat apertis,



Diductisque erret spatiis Trojana juvenus,  
Jam comites, jam ponè videns post terga Magistros,  
Intereà tuba si dederit Mavortia signum,  
Dispersa coeunt acies, & castra revifunt.

Jamque ingens lento procedit Machina passu  
Implens mole vias; tanto pars territa monstro  
Metitur spatiosum orbem, pars agmine facto  
Obnixi trudunt humeris, facilesque rotarum  
Subjiciunt lapsus, & stupea vincula tendunt.  
Prosequitur longè clamorque & plausus ovantûm.  
Ceu quondam Phrygias vehitur spectanda per Urbes,  
Festivo comitata choro Berecynthia Mater,  
Dum ferit adversas sublimi vertice portas;  
Haud secûs augustas conscendit *Clusius* arces,  
Quales nec sacrâ Divam cervice tulisse,  
Crediderim, licèt ipsa pari componat amictu,  
Excelsum caput, & cœlo turrita minetur.  
Ecce procul niveis effulget porta columnis  
Clarior ignavâ tandem emerfura ruinâ,  
Fronte micat totâ, geminoque ad sidera cono  
Aspirans longas jaculatur Pyramis Umbras:  
Hinc olim æthereos radio describere cursus  
Et circum cœli dabitur secreta tueri,  
Quali tardus agat sese temone Bootes,



Quæve illum farraca ferant, quo fulminet ense  
Orion, rutili quo vibrent igne Cometæ.

Hic & marmoreus primas in limine sedes  
Occupat, angustoque renidet Carolus ore,  
Ipse novæ tutela arcis —

Tu quoque majorem sentis, Henrice nepotem,  
Præreptosque tibi non indignaris honores.

Gestit & æthereâ spectans Wolſeius ab arce  
Ac miratur opus, quoties it nuncius astris  
*Clusius* ingeminans sonitum, cœlumque laceſſens,  
Dum procul attonitos vocat ad spectacula Divos.  
Responsura sonos famæ tuba sparget in orbem,  
Fama feret longè, nostro par sola *Tonanti*.

*Tho. Spark, Æd. Christ. Alumnus.*



DESIDERIUM  
GULIELMI.

*Horatius, Virgilius, Fannius.*

H. **Q**UO Maro? quas tacito tecum sub corde agi-  
tas res

Plus solito tristis? fidam deponere in aurem

Ne metuas, seu Te pulcherrima Nisa tenet jam

Devinctum, seu formosus fastidit Alexis.

Fare age, quod doctâ meditaris arundine carmen?

V. Hæc olim, dum tempus erat Venusine; canentem

Dum fovit, studiisque dedit bonus otia Cæsar;

Nunc abiit meus ignis, abit simul omnis avenæ

Cura Syracosæ, vel quicquid, Amice, facetum

Quicquid molle meæ poterant, te iudice, Musæ.

H. Quid castris agitur, quo res Romana loco stat,

Et fatis audiui, & novi te valdius; at me

Solli-



Sollicitum curis solvit generosior uvæ  
 Confitor, atque alacres animo spes pascere jussit.  
 Ac Tu, dulcis Amice, potes si cedere Flacci  
 Lenibus Imperiis, accedas ficcus ad unctum,  
 Et mecum argumenta doloris seria fallas.

*V.* Ah tecum faciles habitant sub pectore risus,  
 Et levior micant agiles tibi sanguine venæ.

*H.* Quinetiam nos & sapiens horti ille magister  
 Edocuit, ne forte animo quid triste federet,  
 Quæque ferat cras negligere, & præsentibus uti.

*V.* At me, Natura indulgit cui parcus ignem,  
 Quemque infelici Saturnus temperat astro,  
 Ingemere, & tristes animo sine volvere casus.

*H.* Quos casus? quod regna tuus jam barbara Cæsar  
 Invadat, superet quod inhospita faxa Niphatis  
 Armenios Romana daturus sub juga victor,  
 Tonfores inquam norunt; jampridem ego fidens  
 In reditum Domini perituram pasco juvencam.  
 Imo etiam faustum signavi carmine votum,  
*Divis orte bonis*, & quæ tu cætera, si mox  
 Lætior explicuit frontem tibi Bacchus, habebis.  
 Tu tamen interea tua sobria, quamque secas spem,  
 Et quid pro charo vovisti Cæsare profer.

*F.* Nobile par Vatum, quos large flumine sacro



Bellerophonteis fovit Thymbræus in antris,  
 Gratulor, & fociis commendo χαῖρε poetis :  
 Nam me Phæbus amat, me irroravere liquores  
 Fontis Dirçæi, & miranda poemata pango.

*H.* Imo fatis miranda. (*V.*) Quid hic molitur hiator?  
 Nosti hominem? (*H.*) Nimium novi ex quo numine lævo  
 Ibam forte viâ sacrâ (*F.*) Me, Vir bone, dicis  
 Ignoras? ergo ignotus tu vivere Romæ  
 Argueris; mea late effulsit gloria, cum Te  
 Villula celavit miseræ vicina Cremonæ.  
 Piso me Variusque colunt, nam non modo versus  
 Sed Vates facio, & me jam vox publica cotem  
 Proclamat scriptorum (*V.*) Alios quia reddit acutos?

*H.* O minime, tantum quoniam exfors ipse secandi.  
 Fannius hic est, quem vano conamine dixi  
 Conclusas imitari hircinis follibus auras.  
 Sed fatue libros alienos increpat, audet  
 Et Mæcenati nugas offerre sonoras.

*F.* Quas chorus observare per interludia leges  
 Debeat, ostendi Latio, quo errore laboret  
 Pacuvius, clarique, tragœdia grandior Acci:  
 Et Sophocleum unus doceo, scriboque cothurnum.

*H.* Metra nimis producta: tuæ tamen, inclyte Fanni,  
 Constringi nequeunt breviori limite laudes.



Virgilio sed cede parumper ; Cæsaris ille  
 Orditur laudes, & jamjam mente volutat  
 Quæ pugnantis erit, vel quæ redeuntis imago.

*V.* Nec reges, Venusine, meis, nec prælia regum  
 Sunt Musis tentanda, ex quo mihi Cynthius aurem  
 Vellit, arundineâ nugari & jussit avenâ.

*H.* Non fatis hæc, nec tu sic excusatus abibis,  
 Usque tenebo, rogandus adhuc si sæpius esses  
 Quam meus Hermogenes oranti furdus Amico.

*V.* Cæsare nil dignum nostræ potuere Camænæ,  
 Pauca quidem lusi (*H.*) Referas tamen illa rogamus:  
 Nam neque nos numerare solemus carmina, nec te  
 Vel Laberî censum, vel Fannî scrinia posco.

*F.* Quid vero hoc? num me poscis? cupio omnia  
 quæ vis.

*H.* Non ego (*F.*) Seu poscis seu non, Nos Cæsare digna  
 Carmina condidimus quæ non celabimus ultra.

Quo, furibunde ruis Nabathæas Cæsar, in oras,  
 Perque nivis montes, per tesqua immania Tauri  
 Cogis iter durum impavidus, non te inde profundo  
 Pigra lacu Tonitis, & hinc Artaxata terrent?  
 Et bene barbaricos referentia nomina mores?  
 Martis amans nimium jam sub Jove vivis aperto,  
 Et vultum indomito torret tibi Sirius astro;

Teque



Teque Palatinâ non contemplabimur aulâ  
 Donec tristis hyems canâ nive conspuat Alpes,  
 Urnigeri & Phœbus contingens limina signi  
 Imbellem è radiis spargat crinalibus ignem.

*H.* Siste parum Stentor, cavè ne subsellia frangas ;  
 Æquus jam sua Virgilio permitte vicissim.

*V.* Pauca inquam lusi, quæ nondum parte polita  
 In Flacci metuunt descendere judicis aures.

*F.* Sentio quid dicas, Jovis auribus omnia fervas.

*H.* Et Tu servasses utinam. (*V.*) Tibi cum bene, Fanni,  
 Cesserit, & nobis aliquid sperare licebit.

Cæsar abis ; quos non ardens in vota laceffit  
 Roma Deos ? quæ non donis altaria fumant ?  
 Aula gemit vidua, & mœsti, tua turba, Poetæ  
 Te veniente die, Te decedente requirunt.

Tu tamen interea, quâ sese plurima lethi  
 Obvertit facies, medios contendis in hostes,  
 Nec laurum sine vulnere amas : desiste triumphis,  
 Si tanti nobis Asiæ victoria constat.

Hanc tibi pro charis curam mandabo Latinis  
 Præcipuam, illorum ut paulo Tibi cura recedat,  
 Cautius & sævo velles te credere Marti.

Hæret adhuc animo pugnam intentantis imago,  
 Cum lectos bello comites classemque parares ;

Cum



Cum monitis precibusque ferocem inflectere mentem  
Certarent procures, studioque avertere belli:  
Consiliis frustra Mæcenæ lenibus instat,  
Et nullo Messala bonus sermone movebat.  
Talis Sidonias ultro rediturus ad oras  
Regulus, obstantes durus dimovit amicos;  
Nec soror affatu molli, lachrymisque decoris,  
Nec moritura super crudeli funere conjux  
Detinuit, blandis humeros amplexa lacertis;  
Vincit amor Patriæ. Non illo seignior ibas,  
Et tanta in torvo fedit constantia vultu.

Dique Deæque omnes, quorum sub numine falsæ  
Augusti à primis adolevit gloria cunis,  
Vos queis Cæsareâ præclarum à stirpe Nepotem  
Cura fuit servare, atque alte attollere famâ  
Magnanimum Heroa, indigno dum cæca tumultu  
Plebs furit, imbellique tumescit Cassius irâ;  
Si vestris etiam auspiciis sub jura volentem  
Accepit populum, palmam per tempora victor  
Si gessit, patruisque cadentem à vertice laurum,  
Extremum hunc oro, Dii, fortunate laborem,  
Securumque Ducem per bella per æquora Romæ  
Reddite, nec miseris nova condite fata Latinis.  
Hæc ego: Dii firment. (H.) Equidem nil triste verebo



Si tuus illorum cantus referatur ad aures.

Me quoque vota eadem exercent, hæc vespere fero,

Hæc ego mane recenti, hæc ficcus & uvidus opto.

*V.* Quin age, Flacce, lyram suspensaque fila resumas,  
Cæteraque expedias. (*H.*) Quos ergo incuria fudit  
Versiculos, quoniam ad mea me promissa vocasti,  
Incipiam, patiarque vel inconsultus haberi.

*F.* Expectare tamen, meliori & cedere debes,  
Nam mihi corda calent, nequeo cohibere furorem  
Phœbeum, & dominantem intus compescere Musam.

Ergo sacros Romæ parat ultima terra triumphos,  
Jamdudum prono nutare cacumine Taurum  
Cerno, & captivos Euphratem advolvere fluctus.  
Fallor an accepit domitus tua fræna Phraates?  
Ecce pharetratus reddit vexilla Tonanti  
Parthus, & Eois fulgent Capitolia signis.  
Jam dominos terrarum optatæ secula pacis  
Longa beant, dum vincta manus civilis Enyo  
Dente fremit, clauditque immota repagula Janus.

*H.* O Fanni, quicquid prædicas aut erit aut non,  
Eventum superis permitte, & define plura:  
Nam ut verum fatear, nunquam donavit Apollo  
Divinare mihi, vel credere divinanti.

*V.* Cæsar, in Armeniis potius sis finibus exul,

Quam



Quam Romam redeas, illo cantante triumphos.

*H.* Nempe inter Parthosque sagittiferosque Gelon  
Tutus erat, nullumque accepit pectore vulnus;  
Quorsum? quid refert ferro pereatne poetis?

*F.* Carpere grandiloquum, quem novit fama, poeta  
Definat, ac solido lassare in marmore dentes  
Rusticus hic; (ad *H.*) & Tu vini somnique benignus  
Si libet insanire tibi, mecum accipe chartas  
Et calamos, videamus uter plus scribere possit.

*H.* Cedo; animi nam me finxit Natura pusilli  
Exiguique (*V.*) Nec hæc arrident tempora musis,  
Carmina tum melius, cum venerit Ipse, canemus.

*Georgius Duncomb,*  
*Tho. Ingram,*  
*Tho. Benner,* } Armm. fill. ex Æde Ch



*In PALUDES*

A B

ORMONDO Duce

*SICCATA S,**Et Indigenas inde depulsos.*

**P** Hoebe decus cœli puro qui lumine nubes  
Disjicis & tenebras ; admotoque igne vapores  
Eliciens, ægro prohibes contagia mundo :  
Huc ades O Thymbræ, levi seu pollice plectrum  
Concutis, illimem Cephisi acclinis ad undam ;  
Seu potior te Delphos habet quàm cœrula stagni  
Progenies Python squalentibus occubat arvis,  
Testaturque dei vires victoris & arcus :  
*Ormondum* celebra, terris qui peste solutis  
Eluit Immistas sordes, atque aera nimbis



Purgat, & Indigenas (immania monstra) fugavit.

Heu quantis modo fœta vadis, quibus arva natare  
Vorticibus vultu mœrens spectabat Iërne!

Cum fœdâ illuvie vastâque voragine campos  
Impleret gurges Circumfluus, obruta tellus  
Delituit multâque pudens caput occulit ulvâ.

Hæc loca ( seu rerum Genitor cum fræna profundo  
Injiceret, pelagusque suo jam clauderet alveo,

Ambiguum terræ liquit certamen & undis;

Seu duri si quando soli pars una stetitset,

Neptuni incubuit latè furor arvaque & urbes

Stagnantesque agros immisso interluit æstu: )

Anceps forma tegit campique incerta marisque

Usque suum nescit Dominum, cui fœdere certo

Pareat instabilis tellus, innabilis unda.

Haud aliam terræ faciem squalentibus ulvis

Explicat Asphalti stagnum, Sodomæaque rura,

Dum populi scelus infandum, dirosque furores

Arva luunt, Stygiæ pariter demissa paludi,

Sæpe tamen viridi florentem cespite glebam

Aspicias, glauco salices insurgere Campo

Gramineosque toros & prata virentia musco;

Fronti nulla fides, sordenti plurima cœno

Colluvies, subtus latet, atque inmane Barathrum.

Cœlu



Cœlum torpet iners & multam turbidus aer  
 Cogitur in nubem; fœdo spiramine tellus  
 Humentes efflat nebulas, fumosque volucres,  
 Triste mali augurium pestique alimenta futuræ.  
 Huc vagus incertusque viæ, si forte viator  
 Errat & ignoto ponit vestigia saltu;  
 Si subito nox atra cavâ circumvolet umbrâ,  
 Eripiens palanti oculis cœlumque diemque  
 Sæpe videt *fatuum* splendere paludibus *Ignem*,  
 (Sulphure vivaci prognatum atque unguine terræ)  
 Nocturnamque putans tædam, quam rustica conjux  
 Æthere jam clauso, succenderat uda per arva,  
 Saxa per & tribulos, rectus ruit; Illa volantem  
 Effugit & longo cita deferit intervallo:  
 Mentitæ tandem deceptus imagine flammæ  
 Igni fata subit contraria, præcipitanisque  
 Incidit in fossas, animamque relinquit in undis.

Quin age, dira palus aliam intra viscera pestem  
 Nutrit, triste genus; quo non feralius ullum  
 Tænareis irâ superûm sese extulit undis.  
 Indigenum cuncti præcharo nomine gaudent  
 Rhiphæo quondam gens subdita *Bartholano*:  
 Ille novas quærens sedes atque extera regna,  
 Ductor Hyperboreas hyemes, Tanaimque nivalem



Linguit, & immani late jam plebe tumentem  
Exoneraturus Scythiam deduxit in oras  
Has secum comites, nostrumque effudit in orbem.  
Antiqui memor illa soli gens vivit, & absens  
Indulget patriæ, Juvat usque abrupta viarum  
Vincere & aëreos Plantis transcendere montes  
Præpetibus : nec adhuc Mæotidis immemor undæ  
Stagna colit, patulosque lacus. Non oppida muris  
Cingere cura subit, burive invertere terram,  
Non sanas habuisse dapes, sed more ferino  
Immundos sorbent latices, passimque vagantes  
Indomitum nullis agitant sub legibus ævum.  
Terribili os squallore riget ; sedet intus abactis  
Ferreæ lux oculis ; turpi stat plurima mento  
Sylva minax totoque horrent in corpore setæ.  
Usque adeo *Hybernæ* timor, atque infamia sylvæ  
Turba stetit, non huic se quisquam impune tulisset  
Obvius erranti ; circum ruit agmine vasto  
Cuncta premens, lateque neces & vulnera spargit.

Dum videt ergo pius lugetque *Ormondus* Iërnen  
Limoque immundo obsessam turbaque profanâ ;  
Haud passus torpere gravi sua regna veterno  
Informi bellum, stagnoque indicit & hosti.  
Nunc scatebras juvat innumeras, fulcosque cavatos



Effodere, & putres scrobibus concidere campos :  
 Aspiceres multo spumantem humore lacunam,  
 Effusasque vagis manare canalibus undas,  
 In pingues Boinæ latices, Moadique fluenta.  
 Omne foli excoquitur vitium; fœlicior agros  
 Aura fovet, Zephyrusque tepens vivacia mulcet  
 Semina submersosque jubet revirescere saltus.  
 Sic ubi Lagæis Nilotica flumina campis  
 Detumuerè, suo jam subsidentia in alveo,  
 Ferventique recens induruit æthere limus;  
 Ridet flava Ceres, sylvæque & amœna vireta,  
 Jam splendent flores, jam formosissimus annus.

Majus opus movet *Ormondus*, vocat altera magnum  
 Palma ducem potiori incingens tempora lauro.  
 En ficcò gravis Indigenum furit undique campo  
 Coetus, & immani teneram pede deprimit herbam  
 Ingentesque notas calcataë infigit arenæ,  
 Ereptum indignans limum lususque priores.  
 Tunc aliquis: Nobis libertas excidit olim  
 Vi *Britonum*, patriæque domus, dilecta que jura :  
 Quin putrem invideant glebam, crassasque paludes !  
 Immundis prohibemur aquis, cœnoque vetusto !  
 At non amisso cessit fiducia stagno  
 Omnis, adhuc animus restat, virtusque superstes.



Ergo agite O focii — Conantem plura manipulus  
Conspectus de monte jubet desiltere verbis  
Et truncos rapere & sese tutarier armis.

At nunc Connachii miscentur pulvere saltus,  
Immensæque volant per prata Momonia nubes,  
Æra micant, strepitusque armorum territat hostes  
Jam propior, dirique canit præfagia belli.

Indigenæ primo obsistunt conamine latis  
Fisi humeris Veterique odio : Mox Angla cohortes  
Perrumpit legio, & turbatis fundit in arvis.

Pars nemorum tenebras & nota cubilia quærit,  
Et vitam pedibus mandat, Cædem ulta suorum  
Pars melior cadit, & moriens animam eripit hosti.

In Vicos alii passim volvuntur apertos  
Sortiti effugium, sedes ubi sacra quietas  
*Ormondi* indulget pietas, si forte subacti  
Silvestrem exuerint animum, cultusque nefandos :  
Nec vanum ducis augurium, Furor omnis & atrox  
Bilis abest, solitæque ex irâ corda residunt :  
Mitior incedit populus, blandusque videri  
Municipes gaudens amat *Ormondumque* vereatur..

Quæ tantum quæ digna canat pro laudibus istis  
Fama virum ! Priscos taceat jam victa triumphos  
*Henricique* manus, Fæliciaque arma *Johannis*



Et quæ Strongbovii commendant nomina palmas ;  
 Everfis illi tecta eripuerè solumque  
 Indigenis ; rabiem & mores *Ormondus* ademit  
 Feraleſque animos & non tractabile pectus.

*Fr. Hickman, Ædis Ch. Alumnus.*

**P R Æ**



## PRÆLIUM NAVALI

O Qui indignatus sævum, *Gulielme*, tyrannum  
 Fregisti Lodoici iras, animumque superbum  
 Imperium mundi meditantem: O Inclyte, belli  
 Artibus horrendis assuete, assuete triumphis,  
 Pone animos tandem, & munus, non Asper, egenum  
 Accipe, quod ducunt placidæ, pia turba, Camenæ.

Te duce jamdudum impositas Europa catenas  
 Detrectare ausa est: O Quæ prima omina belli  
 Ipse olim dederas! O Qualem *Boynia* vidit  
 ( *Boynia* ab Angliacis toties celebrata Camenis )  
 Armis exultantem, atque inter prima frementem!  
 Dum laceros artus, atque ære rigentia membra,  
 Fumantemque cruore lacum, spumamque rubentem  
 Mirantur pisces; & mixtus fluctuat humor.

Quin humeros violatum, & concussum impete gland  
 Fulminæ, virtus (heu magnæ prodiga vitæ)  
 Cautior impellat; vicini sibila plumbi



Fatorumque memento minas, compesce furores  
 Immodicos, animoque assurgant parcius Iræ:  
 Cætera jam permitte tuis, *Gulielme*, Britannis;  
 Exemplo rediviva tuo tandem Anglica pubes  
 Torpescens requie, & dudum desueta Trophæis,  
 Victrices captat laurus, Martemque fatigat  
 Infolitum, atque iterum incendit præcordia virtus.

Jam vetus Anglorum robur, Geniumque priorem  
 Æquora testantur, Gallorum infecta cruore,  
 Quassatæque rates, & adhuc fluitantia membra.  
 En! cerno ut belli horrendus sese explicat ordo:  
 Longa ratum series utrinque excurrit in æquor,  
 Fœta viris, subterlabenti plurima Quercus  
 Incumbit late pelago, ingentesque carinæ,  
 Sylvarum spolia: exploso Tormenta metallo  
 Continuo furere, & gravidæ concurrere turre,  
 Ventorum labor: & tota æquora fervere bello.

Una super reliquis Gallorum puppibus ingens  
 Eminent, ipsa nemus; subjectos pondere fluctus  
 Opprimit ignoto, velisque tumentibus omnem  
 Includit Boream, & centeno fulminat ore.  
 Hanc petit uncta pice, & fœcunda bitumine puppis,  
 Cui flagrans onus, & flammaram dira supellex  
 Ventre latent, nigrisque furit tota Ætna cavernis;

Frustra



Frustra instant Galli, & longè detrudere certant  
 Hærentem lateri pestem, circum ignea sævit  
 Tempestas, spargitque incendia, & evomit atrox  
 Undantes fumos, & olentem Sulphura nubem;  
 Mox totam involvit classem, torretque ululantem  
 Turbam, & fumantes misere depascitur artus.

Sic flammæ irrodunt, & inextricabilis ardor  
 Multa recusantem & convicia dira vomentem  
 Enceladum; frustra imposito sub monte resurgit  
 Obluctans, tostosque humeros, semiustaque membra  
 Erigit indignatus, & ingens vincula quassat.

Jam maria effractis late confusa ruinis,  
 Truncatosque artus, & vasto turbine plumbi  
 Nutantem videas classem; freta lucida flammis  
 Ardescunt, stridentque immerfis ignibus undæ:  
 Sed Galli glomerare fugam, sed spumea latè  
 Æquora subverti, crebrisque albescere fulcis.

Jam, pelagus quacunque udis amplexibus orbem  
 Circuit, & falsos producunt æquora tractus,  
 Neptunus tibi pandit iter, tibi serviet omnis  
 Æolus, & domino tibi subjicit Amphitrite  
 Imperium maris instabile, atque natantia regna.  
 Mox quoque tota tuis cedit, *Gulielme*, triumphis  
 Gallia, qua multo passim fœcunda Lyæo,



Nobilior gravidas vindemia turget in uvas,  
 Purpureasque coquit Solis vicinia menses.  
 Ad Bellum Lodoix minus ardet, numina Pacem  
 Exorat timidus; jam vota capacia mundi  
 Demisere fitim, dum *Luxenvorgius* iras  
 Anglorum tremit, & munimina vasta, minasque  
 Armorum objiciens, petit interfusa fluenta,  
 Fossarumque moras, & inextinguibile vallum.

*Hugo Parker, Armig. fil. è Coll. Magd.*



---

# BRITANNIA

**D**UM *Mosa* torpet sanguine *Gallico*,  
Humique fumant oppida diruta ;  
Dum decolori *Rhenus* undâ

Scuta virûm galeasque volvit :

Quid nos loquacem tendere barbitum?

Et bella mensis pingere ludicra?

Quid inter armorum tumultus

Pacificam renovare pompam ?

En! tuta vastis classibus *Albion*

Circumfluenti cingitur æquore ;

Regnatque victrix inter undas,

Et liquido dominatur orbi :

Spargens frequentem lata per æquora

Classis ruinam, præsidium suis



Affert *Britannis*, navigatque

Attonito metuenda Ponto.

Testor perempti sanguine navitæ

Undas rubentes, & laceras trabes :

\* Testor *Britannum* Gallicanis

Oceanum spoliis onustum.

En ! picta velis æquora conspikor :

En ! sævientes in fera prælia

Ruunt carinæ, mutuâque

Exitium meditantur irâ :

En ! mugienti fulmina machinâ

Exire, certi nuntia funeris ;

Ignesque & undæ dissonantes

Perniciem dubiam minari.

Jam dissipatos impiger ordines

*Carterus* urget, non timidus mori ;

Fugatque classẽ multa luso

Pollicitam meliora Regi.

Frustrâ. Imminentem non prohibet necem

Aptata laurus jam capiti Ducis ;

Quin victor effundit cruorem,

Et mediis moritur triumphis.

---

\* Intel. prælium navale 1692.



Gens Angla, semper pube potens suâ,

Heroas almis jaçtat adoreis

Ubique claros, & paratos

Oppositas cohibere gentes :

Nec si reposcat Parca malignior

Unum, potentes deficient viri,

Virtute qui instaurent hiantem

Et reparent simili ruinam.

Suis remoti finibus *Albion*

Frænare Martis noverit impetum ;

Potenſque duplas, sive pacis,

Sive gravis per acuta belli

Miscere laudes, arma vel obviis

Opponit armis, vel celer ingenti

Intentat artes, bellicasque

Alma regit sine Marte gentes :

Sed nec Camœnis deficit indoles

Apta excolendis, nec gravis obruit

Bellator artes : utriusque

Fervet opus proprium Minervæ :

Superba claris Anglia vatibus,

Insigniores quæis neque *Græcia*,

Nec *Roma* jaçtat, neve cedit

Ingenuis *Rhedycina Athenis* ;



Quam mite Cœlum, quam Genius loci  
Fecêre Musis aptam habitantibus :

O sola cunctas præter urbes

Chara Tuo *Rhedycina* Phœbo !

Phœbus novenis grande sororibus

Decus, tuetur præsidio suam

Turbam poetarum, quibusque

Præfidet, ipse colit Camœnas.

Gens Angla tali prole superbiat,

Et Diva lætis plausibus infremat ;

Secura despeçtetque belli

Et pelagi pariter ruinas :

Hæc ingruentes undique conspicit

Martis procellas, bellaque non sua

Audit, tumultusque ; & Camœnis

Innocuis vacat inter arma.

Sic orbe quondam fluctibus obruto,

*Pindi* repostus *Deucalion* jugo

Speçtabat undas, fluctuantis

*Deucalion* reparator orbis.

O Qui Britannos fluctibus eripis,

Et fata firmas pendula ; qui tuo

Tutos reponis nos periculo,

Atque paras requiem labore :

I nunc



I nunc phalanges prorue Gallicas,

Et tinge fuso lilia sanguine ;

Ornetque devinctus catenis

Egregium *Lodoix* triumphum.

*Sam. Lennard*, Equ. Aur. fil.  
ex Æde Christi



## CURSUS GLACIALIS,

Anglicè,

## SCATING.

**Q**UÆ nova Naturæ facies, qui lumina terrent  
 Prospectus Nivei, & camporum Pallidus horror!  
 Ut dispersa ruunt, & toto se æthere miscent  
 Frigora, & hyberni tenuissima spicula Cauri!  
 Flumina stricta silent, cursusque oblita priores  
 Lucida per longos producunt stagna canales.  
 Ipse riget mediis, nova passus vincula, Proteus  
 Fluctibus, ipse suo Neptunus in æquore clausus  
 Miratur stabiles undas, solidataque regna.

Quin & hyems proprios novit tristissima ludos,  
 Qui rigidos laxare artus torpore soluto,  
 Et membris habilem poterunt inferre vigorem.

Ergo cui firmæ contingit gloria plantæ  
 Ad ripas effusa ruit, totamque juvenus  
 Calce terit glaciem, seu longum tramite lævi



Pergit iter volucris, soleamque fatigat inermem;  
 Seu cursum meditata vagum, pedibusque nitentes  
 Subjiciens lapsus, totum sibi vendicat æquor.

Aspicias in fragilem quali se proripit ictu  
 Planitiem! vitreas quo turbine fertur in undas!  
 Ut fluctus petit irriguos, glaciemque supremam  
 Perstringit levis, ut subitâ vertigine cursum  
 Abrumpit cautus medium! pede stridet acuto  
 Rasa superficies; facili volat ille recurso,  
 Itque reditque viam, & circum undique lubricus errat.

Hinc tristis defævit hyems, brumamque rigentem  
 Corpora contemnunt, hinc crebro Mobile saltu  
 Cor micat, inque genis lætissima purpura ferver.

Quin si casu aliquo glacies infirma dehiscat,  
 Evertatve pedes, ubi crebris aspera nodis  
 Perpetuum prohibet cursum, gressusque fluentes;  
 Exoritur clamor, resonant circum omnia risu:  
 Illudunt misero vulgus, salibusque malignis  
 Excipiunt vestes madidas, plantamque caducam.

At quoties juncto plures in marmora lapsu  
 Profiliunt simul obnixi, tum corpore prono  
 In cursum pendent, tum jactant brachia utrinque,  
 Vimque addunt pedibus; dubiisque erroribus acta  
 Ducit iter perplexum, atque orbibus implicat orbes



Æmula turba; vagi passim vestigia ferri  
 Apparent, variisque inscribitur area gyris.

Sic ubi circuitu incerto lascivit Hirundo  
 Plurima per fudum crepitans, humilique volatu  
 Floriferos nunc stringit agros, nunc flumina verrit  
 Summa levis; crebros miramur in aere flexus,  
 Confusasque vias, & inextricabile textum.

Artibus his fretus, si vera est fama, Batavus  
 Firmatam nactus glaciem, soleasque ferentes,  
 Ripam odit tritasque vias; tardosque relinquens  
 Terrarum tractus, plantâ fugiente viator  
 Lubricus, aut longe semotum invisit amicum,  
 Aut petit ignotus peregrinam Villicus urbem.

Sæpe etiam plenis apportans ova canistris,  
 Nil fragili metuens oneri, se impune fideli  
 Committit Mulier pelago, securaque tranat  
 Frigora constricta, & quæsitæ allabitur oræ.  
 Insculptum videas callem, & tota æquora passim  
 Proscindi ferro, longisque albescere sulcis.

*Phil. Frowde, Coll. Magd.*

*Superioris Ordinis Commens.*



PUGNA  
BOYNIACA,

Anno 1690.

Qualis in antiquas sedes patriosque Penates  
*Edwardus* rediit domitis jam Victor ab oris;  
Gallorum spolia indutus, populique frequentis  
Exceptus plausu; talem, *fortissime Princeps*,  
Talem oculis, animoque parem Te fata reponunt;  
Nec minus horrendum Gallis, seu mœnibus hostem  
Inclusum oppugnas, seu Marte laceffis aperto.

Cur Phœbus Musæque silent? cur nulla *Theatri*  
Copia? nec faustas referunt spectacula pugnas?  
O si quis varios doctus miscere colores,  
Innocuo valeas fera prælia ludere fuco,  
Hic habilem ostenta dextram, monumentaque Belli  
Erige *Boyniaci*; & memori suspende Tabellâ

Depicta



Depictas acies & tela minantia telis.

Ergo age, felices fuccos tractusque perennes  
Finge potens calami, primoque in limine chartæ  
Castra inimica color signet; juxtaque Juventus  
*Gallica*, degeneresque fremant, foedum agmen, *Hyberni*.

Flecte dehinc digitos alið, & tentoria magni  
Exsurgant *Gulielmi*, atque hinc Heroas & illinc  
Magnanimos describe; sed ô quæ dextra labores  
Regis, & ardentes pugnas ad Flumina *Boynæ*  
Sperabit simulare? quis atro in sanguine *Gallos*,  
Singultusque Virûm morientûm, ignesque sonantes  
Per medias undas, & mortis mille figuras  
Ostendet? tamen hoc aude, & totum induc *Zeuxin*.

*Nassovius* fremat ante acies, & qualis in armis  
Intonuit quondam, & prostravit cuspide *Gallos*  
Per *Mosæ* ripas; talis nunc fervidus ensem  
Corripiat, turmasque instiget ad arma volentes.  
Qua se cunque ferat, terror comitetur euntem,  
Et juxta lætis plaudat *Victoria* pennis.

Hunc circum depinge Duces, & primus in hostes  
Irruat *Ormondus*, Gallorumque agmina ferro  
Proterat; *Ormondî* quoties inamabile nomen  
Attingit *Lodoici* aures, tremor occupat artus,  
*Ossoriique* subit campos vastantis imago.



En! iterum furit *Ille*, & adhuc in *prole* superstes  
 Tela quatit *Genitor*: nam vires *Natus* easdem  
 Et similes in bella animos & pectora ducit  
 Æmula, Virtutis patriæ non degener *Hæres*.  
 Salve Atavis & Avis magnoque simillime *Patri*,  
 Salve Heros invicte; tuæ gratantur *Athenæ*  
 Te reducem, tibi perpetuas *Rhedycina* corollas  
 Nectit, Pieriæque ornat tua tempora lauro.  
 Fælix ante alias! tali suffulta *Patrono*,  
 In quantum sese *Rhedycinæ* Gloria tollet!  
 Perge Heros, seu pax niveis circumvolat alis,  
 Seu Te bella juvant, stimulent exempla *Parentis*,  
 Et magni *Gulielmi*.

Parce, tuos si jam neglexi, *Zeuxi*, colores,  
 Immemoremque Erato vastum me immisit in æquor,  
 Sume iterum Tabulas, & fida reponat arundo  
*Schombergum*, & capitis canos ostendat honores.  
 Ille auro insignis properet per flumina *Boynæ*,  
 Vectus equo niveo; fugiat perterritus *Hostis*  
 Per campum, & nimium notos exhorreat enses:  
 At circum *Senior* flammæ & vulnera mille,  
 Mille neces spargat, sed mox tamen occidat *Ipsè*  
 Averfis fatis, & iniquo vulnere victus.

Heu! miserande *Senex*, hic, *Pictor*, pone tabellas,

Pone



Pone tuos paulum calamos; crudelia lapsi  
 Fata Ducis ploremus, humi jacet inclytus Heros  
 Pallidus, exanimis; non talem *Guardia* vidit  
 Scandentem muros & vastâ strage furentem.

Purpureas hîc funde Rosas, hîc Lilia tristi  
 Sparge manu, & saltem lachrymas impende favillis.

Et nunc si voces gemitusque effingere possis,  
*Zeuxi* memor, varias luctûs molire figuras,  
 Ploret tota cohors, & versis lugeat armis;  
 Jamque tubæ lugubre sonent, multoque ululatu  
 Heu frustra ingeminet planctus, raptumque requirat  
 Turba Ducem; quin Tu *Gulielmi* ponere fletus  
 Neu speres impar, sed velum obtende dolenti.

Non tamen *Ille* adeo volvat sub pectore luctus,  
 Quin animo generosam iram, justosque furores  
 Concipiat, casusque graves miseratus *Amici*  
 Defuncto paret inferias. Ergo æquore Gallos  
 Ultor agat toto indignans, & vindice ferro  
 (Heu nimium viles animas!) sub Tartara mittat,  
 Celtasque, Senonasque, paludicolasque Juvernos.  
 Fœcundet novus imber humum, sub gurgite volvat  
*Boyna* viros atque arma simul galeasque cruentas,  
 Et lentos tabo protrudat in æquora fluctus.

Mox pia *Nassovio* portas *Eblana* repandat,

Instau-



Instauretque novos Regi servata triumphos.

*Ille* caput nitidum veteris jam oblita doloris

Attollat, totoque sinu gratissima magnum

Accipiat Dominum, placidis & inhæreat ulnis.

Hæc ubi reddideris, argutior omnia terge

Subtili digito, finemque impone labori.

Et velut *Aneas Libycâ* securus in aulâ

Se comitesque suos pugnantes parjete vidit,

Hic bellum Heroasque acri certamine *Cæsar*

Aspiciat mixtos, & se miretur in illis.

Quid tamen ô dulces prodest tetigisse Penates

Si rursus in cades rapitur, nova regna per undas

Quærat, & adversis iterum ruat obviis armis?

Quin bello abstineas, *Cæsar*, nec rursus iniquis

Tantam crede animam ventis; En! ipsa *Maria*

Orat, & extendit tibi tota *Britannia* palmas.

Parce tuis, *Gulielme*, sat ô sat fama per orbem

Jampridem emicuit; sat novit Gallia quantus

In clypeum assurgas, quo mittas turbine ferrum;

Tectis *Luxemburgus*, & atro occultus in antro

*Condæus*, fususque tuis *Turrennius* armis.

Te tamen urget adhuc *Lodoix*, belloque laceffit,

Teque putat pejorem Atavo, qui contudit *Alvam*,

Dimovitque jugum Batavis crudele *Philippi*.



Fallitur: *Auriacâ* nemo de gente *Sicambros*  
 In tantum evexit Proavos, nec *Belgica* quondam  
 Ullo se tantum tellus jactavit Alumno.  
 Te quantum nuper perterrita sensit *Ierne*,  
 Cum Senonum multâ turbâsti strage Phalanges!  
 Num talis *Fredericus* erat? num tantus in armis  
*Mauritius* Batavo *Spinolam* milite fudit?  
 Heu, *Lodovice*, tuos jam corpora sparsa per agros,  
 Et *Ligerim* multo spumantem sanguine cerno.  
 Nempe iterum Anglorum Regem *Parifina* videbunt  
 Mœnia, flagrantisque faces & tela minantem,  
*Cressiacique* iterum pinguescent sanguine campi.

W. Percivale, Ædis Chr. Alumnus.

Descriptio



Descriptio Spectaculi  
QUOD EXHIBET  
*Templum HARLEMIANUM*

**D**UM citharam argutus digitis salientibus urg  
Amphion, circum crebras se attollere turre  
Aspicit attonitus, faxisque volentibus urbem  
Surgere sponte suâ, & subitas coalescere Thebas.  
Nunc tamen Antiquæ superat Miracula famæ  
*Harlemiana Aedes*, ubi nullo structa labore  
Ostia se pandunt; templum inspicientia condunt  
Lumina, & ipse Sibi spectacula præbet Ocellus.

Quin age, quâ minimum tenui datur ore foramen  
Pone oculum, parva imprimis tibi scena patebit  
Et vicina brevem claudent confinia visum,  
Exiguumque larem cernes angustaque claustra;  
Continuo aspectu se subtrahit, atque sequentes  
Templum oculos fugit, & subito (Mirabile visu!)



Altius assurgit Tectum, Murique recedunt,  
 Longa Columnarum series jam moenia utrinque  
 Deserit, & medio sese erigit ardua Templo.  
 Has inter depictus Homuncio Marmora lustrans  
 Amplior incedit, miratur inania membra  
 Augeri, & sensim instabilem sibi crescere formam.  
 Rostra extant, crasso constructa sedilia furo  
 Apparent, & Mensa verendæ conscia cœnæ,  
 Lychnique, & calices, & cætera sacra supellex.  
 Nec meliore Senex vitreos contraxerat arte  
 Cœlos, cum fragiles passim discurrere stellas  
 Pinxerat, & totum retulit Minor Orbis Olympum.  
 Organa, quæ summis primò laquearibus hærent,  
 Mox variis distincta tubis declivia pendent  
 Ad latera, & pronus Fidium demittitur Ordo;  
 Ecce tamen supra, qui horas, & tempora narrat  
 Discum! dum latè circum ædes tota movetur,  
 Ipse sibi solum constat, spatioque priori  
 Contentus, Formam cautè tutatur eandem.  
 Obstupet ipse suæ Phœbus Miracula lucis,  
 Vimque datam radiis, atque unde potentia scenam  
 Orta sit Augendi petit, Admiransque fatetur,  
 Nil tale in toto occurri, quem circuit, Orbe.  
 At dum per pictos spatiantur lumina muros,



Stat juxta Interpres doctus spectacula passim  
 Exponens, & ubique oculos per singula ducit;  
 Sic templi custos, cui divûm ornare penates  
 Cura, & portarum cecidit custodia forti,  
 Affert ingentem, si quis venit advena, clavem,  
 Atque intûs spectantem admittit, & omnia circum,  
 Cultusque, & tumulos, opera, & monumenta repand  
 Si tamen aspiceres quo sese limite fucus  
 Sistat, neve ultrà elusos juvat error Ocellos.  
 Hinc aciem amoveas, jubeasque patere fenestram;  
 Quà spatio majori aditus se pandit apertus,  
 Atria vanescunt, subitò se contrahit ingens  
 Machina, jamque abit in formam revoluta priorem.  
 Decrescunt arcus fracti, & penetrale profundum.  
 Jam muri apparent humiles, & mœnia fugo  
 Sordent, immensumque latet sub pyxide Templum.

*Steph. Clay, Coll. Magd. D.*

*R E S U*



## RESURRECTIO

DELINEATA

*ad Altare Col. Magd. Oxon.*

**E** Gregios fuci tractus, calamique labores,  
Surgentesque hominum formas, ardentiaque ora  
Judicis, & simulacra modis pallentia miris  
Terribilem visu pompam, Tu Carmine Musa  
Pande novo, vatique sacros accende furores.  
Olim Planitiem (quam nunc fœcunda Colorum  
Insignit Pictura) inhonesto & simplice cultu  
Vestiit albedo, sed nè rima ulla priorem  
Agnoscat faciem, mox fundamenta futuræ  
Substravit Pictor tabulæ, humoremque sequacem  
Per muros traxit; velamine mœnia crasso  
Squallent obducta, & rudioribus illita fucis.  
Utque (polo nondum stellis fulgentibus apto)  
Nè spatio moles immensa dehiscat inani,

Per



Per cava cœlorum, & convexa patentia latè  
Hinc atque hinc interfusus fluitaverat Æther;  
Mox radiante novum torrebat lumine mundum  
Titan, & pallens alienos mitiùs ignes  
Cynthia vibrabat; crebris nunc confitus astris  
Scintillare polus, nuuc fulgor Læteus omne  
Diffluere in Cœlum, longoque albescere tractu.

Sic, operis postquam lufit primordia Pictor,  
Dum fordet paries, nullumque fatetur Apellem,  
Cautius exercet calamos, atque arte tenacem  
Confundit viscum, succosque attemperat, omnes  
Inducit tandem formas; apparet ubique  
Muta cohors, & Picturarum vulgus inane.

Aligeris muri vacat ora suprema Ministris,  
Sparſaque per totam Cœlestis turba Tabellam  
Raucos inspirat lituos, buccasque tumentes  
Inflat, & attonitum replet clangoribus orbem.  
Defunctis sonus auditur, tabulamque per imam  
Picta gravescit humus, terris emergit apertis  
Progenies rediviva, & plurima surgit imago.

Sic, dum fœcundiſ *Cadmus* dat semina fulcis,  
Terra tumet prægnans, animataque gleba laborat,  
Luxuriatur ager fegete spirante, caleſcit  
Omne solum, crescitque virorum prodiga messis.



Jam pulvis varias terræ dispersa per oras,  
 Sive inter venas teneri concreta metalli,  
 Sensim dirigit, seu sese immiscuit herbis,  
 Explicita est; molem rursus coalescit in unam  
 Divisum funus, sparsos prior alligat artus  
 Junctura, aptanturque iterum coeuntia membra.  
 Hic nondum specie perfecta resurgit imago,  
 Vultum truncata, atque inhonesto vulnere nares  
 Manca, & adhuc deest informi de Corpore multum.  
 Paulatim in rigidum hic vita insinuata cadaver  
 Motu ægro vix dum redivivos erigit artus.  
 Inficit his horror vultus, & imagine totâ  
 Fusa per attonitam pallet formido figuram.  
 Detrahe quin oculos Spectator, & ora nitentem  
 Si poterint perferre diem, medium inspice murum,  
 Quâ sedet orta Deo proles, Deus ipse, sereno  
 Lumine perfusus, radiisque inspersus acutis.  
 Circum tranquillæ funduntur tempora flammæ,  
 Regius ore vigor spirat, nitet Ignis ocellis,  
 Plurimaque effulget Majestas Numine toto.  
 Quantum dissimilis, quantum ô! mutatus ab illo,  
 Qui peccata luit cruciatus non sua, vitam  
 Quando luctantem cunctatâ morte trahebat!  
 Sed frustra voluit defunctum Golgotha numen

Condere,



Condere, dum victâ fatorum lege triumphans  
Nativum petiit cœlum, & super æthera vectus  
Despexit Lunam exiguam, Solemque minorem.

Jam latus effossus, & palmas ostendit utrasque,  
Vulnusque infixum pede, clavorumque recepta  
Signa, & transacti quondam vestigia ferri.  
Umbrae hûc felices tendunt, numerosaque cœlos  
Turba petunt, atque immortalia dona capessunt.  
Matres, & longæ nunc reddita Corpora vitæ  
Infantûm, Juvenes, Fieri, innuptæque Puellæ  
Stant circûm, atque avidos jubar immortale bibentes  
Affigunt oculos in Numine; Laudibus æther  
Intonat, & læto ridet Cœlum omne triumpho.  
His Amor impatiens conceptaque gaudia mentem  
Funditûs exagitant, imoque in pectore fervent.  
Non æquè exultat flagranti corde *Sibylla*,  
Hospite cûm tumet incluso, & præcordia sentit  
Mota Dei stimulis, nimioque calentia Phœbo.

Quis tamen ille novus perstringit lumina fulgor?  
Quam Mitrà effigiem distinxit Pictor, honesto  
Surgentem è tumulo, Alatoque Satellite fultam?  
Agnosco faciem, vultu latet alter in illo  
*Wainfletus*, sic ille oculos, sic ora ferebat:  
Eheu quando animi par invenietur Imago!



Quando alium similem virtus habitura! —

Irati innocuas securus Numinis iras

Aspicit, impavidosque in Judice figit ocellos.

Quin age, & horrentem commixtis Igne tenebris

Jam videas scenam, multo hîc stagnantia fuco

Mœnia flagrantem liquefacto Sulphure rivum

Fingunt, & falsus tantâ arte accenditur Ignis,

Ut toti metuas tabulæ, ne flamma per omne

Livida serpat opus, tenuisque absumpta recedat

Pictura in cineres, propriis peritura favillis.

Hûc turba infelix agitur, turpisque videri

Infrendet dentes, & rugis contrahit ora.

Vindex à tergo implacabile sævit, & ensen

Fulmineum vibrans acie flagrante scelestos

Jam Paradiseis iterum depellit ab oris.

Heu! quid agat tristis? quò se cœlestibus iris

Subtrahat? ô! quantùm vellet nunc æthere in alto

Virtutem colere! at tandem suspiria ducit

Nequicquam, & serò in lacrymas effunditur; obstant

Sortes non revocandæ, & inexorabile Numen.

Quàm varias aperit veneres Pictura! periti

Quot calami legimus vestigia! quanta colorum

Gratia se profert! tales non discolor Iris

Ostendat, vario cùm lumine floridus imber



Rore nitet toto, & guttâ scintillat in omni.

O fuci nitor, ô pulchri durate Colores!

Nec, Pictura, tuæ languescat gloria formæ,

Dum lucem videas, qualem exprimis ipsa, supremam.

*Jo. Addison, è Coll. Mag.*

**MICROSC**



## MICROSCOPIUM.

**A**Rtes naturæ varias, quas dædala rebus  
 Pandit in exiguis, quales animalibus artus  
 Ossaque concessit, quæ serica texuit alis,  
 Quos mores & quæ pugnacibus addidit arma,  
 Loricas, galeasque, & non imitabile tergum,  
 Expediam: hæc latuere oculos, semperque laterent,  
 Vitrea ni per septa tubo transmissa sereno  
 Induerant magnos artus & vix sua membra.

Ecce! Animal — quid si versu intractabile nomen?  
 Notior haud sua cuique coma est; tantum illud inerrat  
 Crinibus: induitur testâ, quæ pressa fatiscit  
 Cum crepitu: mediâ surgunt duo cornua fronte;  
 Hæc præeunt, interque comas immissa sonantes  
 Ante parant aditum, via ne sylvestris eunti  
 Impediat gressus, oculos aut radat inermes.  
 Interior femora ad pectus subnexa revincit  
 Musculus; hinc crurum series dimittitur æquos  
 Juncta per articulos, tum se versatilis unguis



Complicat in pugnum, complexuque obvia prensat:  
Inde larem interdum linquens & opaca comarum,  
Summa petit capitis, pedibusque tenacibus hærens  
Pendula per tremulum firmat vestigia crinem.  
Sin digiti dociles venandi aut lethifer instat  
Admonitus morfu pollex, petit ocyus umbram  
In præceps lapsus per crinem, artusque repente  
Colligit in nodos, & inextricabilis hæret:  
Aut patriam linquens ignota per avia colli  
Tendit iter, tergique errat vagus exul in oris.

Proxima sese oculis dat aranea: dorfa tumere  
Incipiunt; crescit membris crescentibus horror.  
Sed caput angustum, nec in ullam mobile partem  
Natura inseruit cervici, at lumina summum  
Transtulit in tergum, & numero sex undique fixit  
Ordine, quæ latè speculentur, siqua feratur  
Musca sub occultæ stridens confinia telæ.  
Aspice juncturas crurum per mutua nexas,  
Quæ gracilis genuum facit internodia poples:  
Utitur his, quando sub noctem egressa videtur  
Et sarcire dolos, & hiantia cogere fila,  
Aut radios centro projectos jungere linis  
Transversè impositis, atque omnia figere nodo,  
In spem prædarum, & miseris fata ultima muscis.



Cum simul illapsam prædam trepidantia longè  
 Fila monent, progressa specu ocyus illa propinquat  
 Corpore multiplici, membrisque frequentibus instat:  
 Namque ita prospectum muscis (corpuscula ne quid  
 Illapsu obrueret subito aut inopinus adesset  
 Hostis) ut in varias oculorum objecta figuras  
 Inciderent, rerumque haud una daretur imago.  
 Qualis enim ad cœli lucem cum obvertit iaspis  
 Quadratas facies, cuncta hinc divisa resultant,  
 Et totidem effigies reddunt, numerusque fenestris  
 Accedit: muscæ tales (si credere vitro  
 Fas) oculos natura dedit, sectosque polivit  
 In varias facies; vnde illa tuetur arachnen  
 Corpore divisam, & crebrâ sub imagine stantem;  
 Quò tremit, & plures objectis cruribus hostes  
 Expectat: frustra: hæc vi prensat & implicat uncus  
 Circumfusa pedes; nequicquam viribus impar  
 Multa reluctatur, nequicquam vincula quassat  
 Sæpius assurgens, toties revoluta recumbit  
 Hoste sub innumero, longâque ita morte laborat:  
 Exuviasque domum & spolia aurea portat arachne,  
 Et caput & truncas alas infixaque filo  
 Speluncæ in foribus suspendit inania crura.

Quid memorem urticæ non enarrabile textum?



Mordacis tactu quis enim non confcius herbæ?  
 Per vitrum riguas valles, clivosque tumentes  
 Hirsuto aspicias folio, quibus aspera sylva  
 Confurgit, parvosque tegunt hastilia colles.  
 Horum apices tactu siquis percurrere molli  
 Audeat, ultrices inspirat acumine succos  
 Herba venenata, & refilit cum vulnere pollex.

Jam glandis semen sublati pelliculis astat,  
 Primitiæ quercûs: ut parvæ brachia frondes  
 Parva tegunt, glandesque minores frondibus extant!  
 Aspice quantum humeros in latum exporrigit, umbram  
 Affectans, cœli & jam provocat arma, futurum  
 Et Jovis oraculum, & fessis solamina capris!

Neve tuam, licet antra foves, Formica, recondes  
 Effigiem: admiror vultus: sed quid caput istam  
 Fert galeam? nec pugnae habilis, nec idonea bello es;  
 Ire laboratum, subque horrea cogere farra  
 Hic amor est: agnosco humeros, queis ferre solebas  
 Aut viciæ granum, aut curtæ grave pondus avenæ,  
 Dimidium messis: ferratos ordine dentes  
 Comprimit os, onera ut cunctorum in frustula morfu  
 Æqua secet, statuaturque humeris versatile pondus.

Ecce! acarus trajectus acu per squamea texta  
 Loricæ & validas crates laterum: ut furit! ut se

Erigit



Erigit indignans! pedibus contingere ferrum  
 Aggreditur, jam jamque tenens crura undique circum  
 Figere, nec medium nitens complectitur orbem.

Aspice ut articulos genuum mors frigida solvit,  
 Unguicunque micant graciles! dehinc colla reponens

Fossum in caseolo moriens reminiscitur antrum:

Scilicet in mediâ patuit si caseus alvo,

Subjacuitque cadis, descendit Bacchus, & ova

Hic inventa cavis fœcundat: nec mora, patris

Conscia perrumpunt tenues animalcula crustas

Nata Deo, quamvis Epicuri turba negabit

Improba, sed massâ fingit coalescere putri.

Forte & sint illis sua prælia, forte sub antris

Gens struat oppidula, & graveolentes excavet urbes,

Forte etiam leges condant, parvumque senatum.

Felix heu nimium felix! dum cuspide favâ

Inscius in partes media inter talia culter

Dividat imperium: frustra per proxima quærunt

Effugium, & crebro trepidant pede tecta subire;

Nam cum dimidio regno cumque urbibus amplis

Tota in jejunum fertur Respublica ventrem.

Cætera quis versu comprehendat? multa cavarunt

In foliis nidos animalia: nonne tumentes

Sæpe vides nodos, scabiemque aut ulcera frondi

Inscius



Inscius increvisse putes? gens tota sub istis  
Speluncis habitat, foliique inclusa minutas  
Et venas bibit, & cunabula concava rodit.  
Sin tibi parca fides, fœcundos excute nodos,  
Carceris atque aufer tunicam: tunc agmina cernes  
Luce intus trepidare novâ, sibi visa renasci,  
Ocyus exportare fugâ regem, ova, pedumque  
Truncam jam sobolem, & patriæ plorare ruinam;  
Tum fata in folii diverso tramite quærunt.

*Tho. Bisse, C. C. C.*

DECRETUM



DECRETUM  
OXONIENSE,  
Anno 1683.

O Lycio dilecta Deo *Rhydicina*, potentem,  
Cui cytharam, nervosque dedit Thymbræus  
Apollo;

Ipse suas artes: Te carmine, Diva, quotannis  
Insequimur festo, Tibi nos solennia semper  
Votaque & æternos læti instauramus honores.

En! & nunc laudum surgit fœcunda Tuarum  
Materies, nunc arrepto Te dicere plectro  
Musa jubet, *Carolumque* loquacibus addere chordis.  
Salve, sancta Parens, Tuque, ô certissima Divûm  
Progenies, dubias regni qui flectis habenas,  
*Carolide*, salve, Lethi Te plurima cingit  
Nequicquàm facies, nequicquàm mille laceffunt  
Agmina, juratæque horrenda in fœdera dextræ:  
Dùm viget illa Tuum *Rhydicina* haud immemor unquàm  
Tutari caput, & sceleratas pandere fraudes.

Illa



Illa Tibi tereti frontem circumdat olivâ,  
 Et viridem nectit circum pia tempora laurum,  
 Attonitas quatiens non bruto fulmine Turmas.  
 Jam regi devota Fides, sub funere languens,  
 Pressâ malis circum, atque indignis cincta catenis,  
 Lumina (quod poterat) longo liventia luctu  
 Sustulit ad cœlum; & quis nunc me (voce vocavit  
 Extremâ) eripiat tantis è cladibus ultor?  
 Audiit has secura mali *Rhydicina* querelas,  
 Auxiliumque tulit: tùm protinùs, auspice Divâ,  
 Seditio (fœdum, ac visu mirabile monstrum.)  
 Procubnit, terramque indignanti ore momordit.  
 Qualis ubi Andromedam Perseus materna luentem  
 Crimina, & ad duras religatam in littore cautes  
 Aspexit miserans; clypeo confusus & ense,  
 Pone metum, Virgo, non es sine vindice, dixit:  
 Nec mora, congreditur, Cætique per ilia ferrum  
 Exigit, ille vomens tumidum de pectore virus  
 Volvitur, & mediâ jacuit resupinus arenâ.

Haud jam ultrâ vulgi bibulas illapsâ per aures  
 Dogmata, Principibus multùm funesta ciebunt,  
 Irasque, insidiasque, & duri semina belli:  
 Ardet enim fufis circum undique noxia flammis  
 Pagina, damnatæque inhonesto funere chartæ.



Quanquàm ô si simili, quicunque hæc scripserit Author  
 Fato succubuiſſet, eodemque arſerit ignis  
 In medio videas flammâ crepitante cremari  
*Miltonum*, ( terris cœloque inamabile nomen )  
 Qui contemptorem regum, populique patronum  
 Se tulit Angliaci, ſpecioſas texere fraudes  
 Doctus, & impuris leges obtendere cœptis.  
 Sed tamen huic magnas animoſa in carmina vires  
 Diva dedit, geniumque implevit dexter Apollo.  
 Seù bello accingat metuendâ cominûs hæſtâ  
 Luciferum gradientem, & vix Michaelæ minorem :  
 Seù dicat primum temerè jacuiſſe Parentem  
 Acclinem violis, & ſuavè rubenti hyacintho.  
 O ! *Caroli* laudes tali ſi dicere verſu  
 Maluerit, non jam periſſet vindice flammâ :  
 Sed ſeram famam æternum miſiſſet in ævum,  
 Unam paſſurus, mundo flagrante, ruinam.  
 His etiam accedit Diti ſacer *Hobbius* aris,  
*Hobbius* inviſum ventura in ſæcula nomen,  
 Qui ſtabiles rerum leges immiſcuit audax,  
 Et veteres penitùs Naturæ excuſſit habenas.  
 Sed fruſtrâ lævas molitur pectore curas,  
 Inſudat fruſtrâ, atque animi ferale venenum  
 Evomit in chartas : juncti fidiffima contrâ



Stat vox *Oxonij*, valido par argumento.

\* Ille etiam *Scoticâ* qui quondam turbidus Aulâ  
Jus regum angusti contraxit limite gyri,  
Qui toties populos immisit in arma furentes,  
Multaque subjecit gliscenti incendia bello,  
Nunc ignem subit, & flammis ultricibus ardet.

Hæ Tibi sunt laudes, immortalesque triumphi,  
O Dea, Bellositi sacras quæ protegis arces  
Hæc Tu monstra domas : nec Te ( si quando ruentis  
Posceret imperii casus ) Temploque futurum  
Et Sibi præsidium, *Carolus* spes vana fefellit.  
Scilicet hoc sperare Patrum dedit & sua Virtus,  
Regi certa fides, & nescia foedera rumpi.  
Tu, cum vesani, ruerent in mutua cives  
Vulnera, sæviretque animis ignobile vulgus,  
Ausâ *Caledoniæ* speciosa ænigmata L I G Æ  
Sublatis aperire dolis, communia Plebis  
Damnasti scelera, & suffragia Poplicolarum.  
O *Caroli* vindex ! ô Relligionis honorem  
Antiquæ, puramque fidem non immemor unquam  
Asserere ! & si qua possent Regalia Jura  
Defendi virtute tuâ hæc defensa fuissent.  
At non, si quondam succumberet irrita virtus,  
Et nunc fors eadem fidis conatibus obstat.

\* *Buchananus.*

Fallor ?



Fallor? an incipiunt læti procedere menses?

Seculorumque novus fufis evolvier ordo?

Stat legi fua vis: vetitos plebecula cœtus

Deferit: unanimes redeunt in priftina turmæ:

Subfidunt animi: nufquam Fanaticus ardor

Apparet, nufquam veteris veltigia flammæ.

— ex Æde Chr.

HIRCO.



## HIRCOCERVUS.

**E** Sse quid hoc dicam? certè hæc nil tale tulerunt  
Sæcula; nec memini veteres cecinisse poetas:  
Hoc nusquam Flaccum sublimi prodere cantu  
Mens iussit congesta: Maro surgente Camœnâ  
Arma virumque canit, sed non canit *Hircocervum*.

Sed quid me impellit non convenientia Musæ  
Dicere? quid sacri canonem diffringere *Smeti*?  
Nempe fugit doctas metri vox barbara leges,  
Aversata artes placidisque inimica Camœnis.  
Prodigium hoc variæ (ut quondam Cretense) recondunt  
Ambages Labyrinthi & inextricabilis error:  
Ducenti quis cæca reget vestigia filo?  
Quis dubio expediet latitans ænigmate monstrum,  
Monstrum horrendum informe ingens cui *Lumen* ad-  
emptum.

Plaudite io! præsto est quod quærimus: en! vetulum  
istum

Contractâ quem fronte habituque atque indice barbâ

Philoso-



Philosophum reor esse, illi nam plurima in ore

Scoti squallet imago, & docto pulvere fardet:

At mihi quærenti biferi incunabula monstri

Hic quassans caput, & protenso pollice; inepte,

Quod quæris solâ est in mente; & plurima narrat

Fictitiæ de *impossibilitate* chimæaræ.

Nil tamen hoc; ultrâ quærendum est; undique lustrò

Ipsum hominem, qui utcunque severus dogmate mores

Non æquè rigidos colit; at tegit aspera mentem

Vestis molliculam: en! hic est quem quæro, biformis

Philosophus, vultu, scriptis, & moribus, omni ex

Parte sibi discors; quamque explicat ipse Chimæra est.

Quin Tu qui multo incedis spectabilis auro,

Et Tyrio indutus distinctam murice vestem

Philosophi pannos rimosaque pallia rides,

Profer, Cotta, caput: nitido tu in tramite passus

Metiris curtos, Tu flabrum imitante galero

Ora foves, motosque reponis in ordine crines,

Idque unum exoptas nitidus bellusque videri:

Bellus homo es fateor; sed cur tibi lintea defunt?

Cur nulla interula est, quin callosam hispida pellem

Vestis arat? subtùs squallentes aurea celat

Panniculos tunica; & fragranti in vertice spirant

Pastilli, tamen intùs oles teterrimus hircum.

At



At quæ se dubiis pictura ostentat ocellis,  
 Semiferum referens hominem, formosa supernè  
 Pectus & ora gerens & membra decora juventæ?  
 Altera post tergum species; at parte supremâ  
 Exit equus, Dominique nates sua cauda flagellat.  
 Hic equus & præceptor erat Centaurus Achilli,  
 Idem equitare docet juvenem, portatque equitantem.  
 Huic similes hunc qui toties cecinere poetæ,  
 Descriptas variare vices, operumque colorem  
 Aflueti, absimilesque sibi procudere versus.  
 Sæpe levis tragicos audet Comoedia bombos,  
 Semideumque aggressa obtrudit pagina monstrum:  
 Sæpe cothurnatus tragicam subit histrio scenam  
 Torva tuens, tumidoque inflatus carmine buccas  
 Evomit ampullas, spumoso & turgidus ore  
 Fulminat, ingentique boatu verberat auras.  
 Spectator, metuis nè obtusæ protinùs aures  
 Surdescant, tremulumve ruat clamore theatrum.  
 Quin Tu pone metum: huic totus mox excidit ardor,  
 Mox insulsa humili jactat dictèria versu  
 Innocuè, & sonitu verborum tinnit inani.  
 Nil tragicum spirat, lepidis sed hiantia circum  
 Ora modis distorquet, at iracundus Achilles  
 Therfites evadit, & Exit Comicus Heros.



Fingere nec mirum est adeo sibi dissona vates,  
 Nam gemino ostentat Parnassus vertice monstrum,  
 Et primus monstravit equinas Pegasus alas.  
 Talis qui tumidè resonanti ebuccinat aulâ  
 Jurgia caufidicus, multum de jure boatu  
 Eructans patulo, talis venerabilis aurei  
 Imperii labor & luctus, curæque nitentes,  
 Anxia majestas atque ingens pompa malorum.  
 Tale est Imperium, Sceptrum, Regnumque, Forumque, &  
*Omne quod exit in Um, seu Græcum sive Latinum.*

Dicite ( nam nôstis ) Parnassia Numina, Musæ,  
 Dicite, quo titulo mirum hoc, quo nomine, gaudet?  
 Parvum animal dubiæ juxta confinia lucis  
 Egressum, vitans pariter noctemque diemque :  
 Lenta huic porrigitur parvos membrana per artus  
 Et tenui protensa inducit brachia pennâ,  
 Quâ suspensum agili fertur per inane volatu :  
 Quin nullâ tegitur ( nativâ veste volucrum )  
 Plumâ ; ast incerti generis circumvolat erro,  
 Aut implumis avis, vestita aut bestia pennis.  
 Digna quidem exultet quæ per pallatia Regum,  
 Perfidaque in cæci splendescat Cæsaris aulâ,  
 Et lectos inter procures det jura Senator.  
 Multus ibi huic similis sublimi insignis honore



Transfuga, qui variis dubius pro partibus astat,  
 Omnibus infidus, mores cum tempore mutat;  
 Susceptam linquit causam, repetitque relictam;  
 Inque vices sumptam ponit, positamque resumit;  
 Omnibus ex æquo fit amicus, & omnibus hostis.  
 Sic plebs inconstans nunc huc nunc flectitur illuc,  
 Bellua multorum capitum: mutabile partes  
 Scinditur in varias *neutrum modò mas modò vulgus.*  
 Sic dubii generis forex nunc incolit undam,  
 Nunc terram amphibius repetit, saltatque per herbas.

Cùm tamen hæc subeunt generis discrimina mentem;  
 Dicite Grammatici (nam vos narrare soletis  
 Plurima de vocum consensu) dicite discors  
 Quid sibi vult Genus hoc Epicœnum? fœmina dici  
 Nec mas ritè potest; sed repræsentat utrumque  
 Ex æquo sexum: certè Genus Hermaphroditum.

En! hilari multùm Rhedycinæ nota, popelli  
 Plurima in ore, vagæ notissima bellua famæ;  
 Cornutum vocitamus: ubi sed cornua? nusquam  
 Apparent: anne ille igitur (limacis ad instar)  
 Cornua pro libitu emittit retrahitque vicissim?  
 An nos cum populo seducti vera putamus  
 Cornua, quæ lepidi finxerunt scommata vulgi?  
 Quicquid id est sanè ignoro; metuo tamen olim



Nè me etiam populus surgentem in cornua monstret,  
Et nota evadam ridentis fabula vulgi.

Hinc multa occurrunt animo portenta, supellex  
*Ashmoleæ* veneranda domûs ( ubi marmore manco  
Fictos Heroum vultus, & ludicra monstra,  
Et luscus Phariam stupet antiquarius urnam )  
Materies miranda & nostris digna Camœnis :  
Scilicet hæc rerum mixtâ ex farragine constant  
Carmina, conveniuntque suo sibi dissona monstro.

*Ant. Alsop, Ædis Chr. Alumnus.*



IN

Historiam Nativitatis

DELINEATAM

In FENESTRA Orientali

*Eccles. Cathedr.* CHRISTI

OXON.

*Ex munificentia Rev. D. Petri Birch S. T. D.  
Eccles. Westmonast. Præbend.*

**L**Ufus inanes, & tenues jocos  
Linquam profanis. O strepitum aureæ  
Testudinis, facunda *Clio*,  
Quæ regis, & fide grandiori  
Heroas acres nubibus arduis  
Cœloque donas, quæ pretium arrogas  
Vitamque virtuti, nec horres  
Invidiam fugientis ævi;

Vides



Vides quid audax finxerit in *Vitro*

Ritè ordinatis dextra coloribus

*Apellis*, ut cunas *Tonantis*

Non humili referat tabellâ.

Huic quippe visum est tramite fortiter

Exire noto, vimque potentium

Haurire succorum, nec usque

Indecori simulare fuco

Genas Puellarum & veneres breves;

Quin ipsa pandit sidera, & aureum

Coeli lacunar, Incolasque

Lumine perpetuo decoros

Describit. O nunc fas mihi *Lesbias*

Æquare chordas; fas *Opus* integrum

Percurrere, & clarum superbo

Artificem celebrare cantu.

Portis reclusis, Ecce *Boum domus*!

En! plena stant *Præsepia*, & hospites

Mugire post longum videntur

Cornigeri graciles laborem.

Doloris expers, *Mater* amabilem

Enixa *Prolem*, gramineo in toro

Deponit immortale pignus,

Arma timens pecorumque vultus.



Ast Ille cunas fortiter occupat,  
 Fassusque Numen, & jubare aureo  
 Perfusus, absterret paventes

Quadrupedes animosus *Infans*.

Incerta *Maria*, an *Pueri* oscula  
 Libet jacentis Mater, an agnitum  
 Submissa adoret Conditorem

Ætheris, Officiis utrisque  
 Divisa pendet. Stat prope conjugem  
*Josephus*, eventu attonitus novo:

Vix Ille *Christi* nascituri

Conscius, æthereique partûs.  
 Ast huic futuri Nuntius aliger  
 Venit supremi de folio Patris,  
 Castamque felix liberavit

Suspicionem malâ *Puellam*,  
 Foetu gravescentem. Hoc nisi fecerat,  
 Heu! *Virgo*, tristem connubii vicem  
 Experta plorares, a vitâ

Pulsa domo; neque profuisset  
 Aut casta mens, aut virgineo in sinu  
 Gestasse proni fulminis Arbitrum:

Quin exul egisses per arva  
 Excubias, & acuta saxa.



Nec Te imputato crimine fordidam  
Curaret hospes quilibet, ut Tibi  
Tectum fatigatæ, vel Umbram  
Præbeat, aut Stabulum dolenti.

Hic tuta procumbe: haud *Puerum* Boves  
Dulci repellent Matris ab ubere,  
Tristive mugitu quietem  
Excutient, placidosque somnos.

At ecce! robusta *Isacidum* manus  
Transcurrit agros, cultaque pinguis;  
Errare permittæ bidentes,

Dum vacui per aprica rura  
Festum Magistri concelebrant diem;  
Nec grata parcunt deripere horreo,  
Quæis Te, *Maria*, munerentur,  
Dona, *salutiferumque Natum*.

Hic *Poma*, pendentium spolia arborum,  
Texto reponit candida vimine;  
Hic portat, aris destinatum,  
Innocuæ leve pondus *Agnæ*.

Eheu! malorum nuntia munera!  
Cui, Pastor, *Agnam*? — En! Illa jacet *Bidens*  
Devota cultris, Illa dudum  
Victima nil miserantis Orci.

Alter,



Alter, modorumque & fidium sciens,  
 Seu molli avenâ ludat agrestium  
 Nympharum amores, five lætam  
*Bethlemios* vocet ad choream:  
 Nunc acriori carmina tibiâ  
 Procudit audax, nunc temerè in melôs  
 Non usitatum surgit, ipso  
 Vimque petens animumque Cœlo.  
 Te, *Christe*, cantat, Te, Dominum Ætheris,  
 Clausum tenelli corporis ambitu;  
 Te Matre pulcrâ pulcriorem  
 Progeniem: sonat ic̃ta Tellus  
 Clamore sacro. Desuper emicat  
 Cohors refulgentûm alta Satellitum;  
 En! dissipatas clara nubes  
 Ala fecat, liquidusque vocum  
 Discurrit error grata sonantium:  
 At pervicax plectrum, O mea *Pieri*,  
 Compesce, nec divina parvis  
 Verba velis fociare chordis.  
 Quin cerne tandem, quâ superam *Vitri*  
 Illustrat oram *Luminis* aurei  
 Orbis coruscans, En! stupendum  
 Ardet Opus radiante flammâ!

Videtis?



Videtis? an me *Pictor* amabili

Eludit umbrâ? Jam videor sacras

Errare per sedes *Piorum*,

Et rutili spatia ampla Cœli.

Quâ Lucis almæ copia fertilis,

Ceu lympa puris vitrea fontibus,

Manans, inexhaustos perenni

Dat radios fluitare rivo.

Quem, *Pictor*, Artis difficilem gradum

Timebis? aut quos non calamus tuus

Felix vel in Vitro colores

Expediet, teretive panno;

Qui clara cœli lumina per Sacram

Fudit *Fenestram*? Nunc minùs indigent

*Phæbi* renascentis, minufque

Templa nigras metuunt procellas.

Nunc & decoro *Sancta Domus* nitet

Ornata cultu, & grandia *Birchij*

Stant dona, vicinifque honorem

Conciliant capiuntque ab *Aris*.

Ille Ille succos & calamos leves

Direxit, & doctam Artificis manum;

Nec Templa ( ut olim ) *discolori*

Abstinet decorare *Vitro*;

Quamquam



Quamquam sciebat quæ sibi contumax  
 Vulgus pararet; quot fera prælia  
 Ursi, minarenturque Vulpes,  
 Atque Luporum inimica Sacris  
 Gens, quæ nefastis ebria cladibus,  
 Olim inquinatis polluit unguibus  
*Delubra*, divinamque pompam  
 Impia diripuit, nec ipsis  
 Pepercit *Aris*. Heu! Scelerum pudet!  
 Heu! ne revertatur grave Seculum!  
 Nec *Fana* rursus, nec *Fenestram*  
*Caucasiæ* hanc maculent Volucres!  
 Tuque O, venusto munere nobilis,  
 Scribère, *Birchi*, Tu memor atque amans  
 Parentis almæ, Te reponet  
 Perpetuis *Domus* Illa fastis;  
 Dum scandet *Aras* non tacitus *Chorus*,  
 Cœlique ritu lumina patrio  
 Spectabit *Eoa*, & refulgens  
 Suspiciet, Tua dona, *Vitrum*.

*P. Foulkes, Ædis Chr. Alumnus.*



## SPHÆRISTERIUM.

**H**IC, ubi graminea in latum sese explicat æquor  
 Planities, vacuoque ingens patet area Campo,  
 Cum solem nondum Fumantia prata fatentur  
 Exortum, & tumidæ pendent in gramine guttæ,  
 Improba falx noctis parva incrementa prioris  
 Desecat, exiguam radens à Cespite messem:  
 Tum motu assiduo saxum versatile terram  
 Deprimit extantem, & surgentes atterit herbas.  
 Ligna percurrunt vernantem turba palæstram  
 Unctæ, nitens oleo, formæ quibus esse Rotundæ  
 Artificis ferrum dederat, facilisque moveri.  
 Nè tamen offendant incauti errore globorum,  
 Quæque suis incisa notis stat sphaera; sed unus  
 Hanc vult, quæ infuso multum inclinata metallo  
 Vertitur in gyros, & iniquo tramite currit;  
 Quin alii diversa placet, quam parcius urget  
 Plumbea vis, motuque finit procedere recto.

Postquam idem in partes turbam distinxerat æquas  
 Consilium, aut fors; quisque suis accingitur armis.

Evolat



Evolat Orbiculus, quæ cursum meta futurum  
Designat; jactique legens vestigia, primam,  
Qui certamen init, sphaeram demittit, at illa  
Leniter effusa, exiguum quod ducit in Orbem,  
Radit iter, donec sensim primo Impete fesso  
Subsistat; subitò Globus emicat alter & alter.

Mox ubi funduntur latè agmina crebra minorem  
Sparsa per Orbiculum, stipantque frequentia metam,  
Atque negant faciles aditus; jam cautiùs exit,  
Et leviter sese insinuat revolubile lignum.  
At si fortè globum, qui misit, spectat inertem  
Serpere, & impressum subitò languescere motum,  
Ponè urget Sphaeræ vestigia, & anxius instat,  
Objurgatque moras, currentique imminet orbi.  
Atque ut segnis honos dextræ fervetur, iniquam  
Incusat terram, ac surgentem in Marmore nodum.

Nec Ritus tacuere, globus cùm volvitur actus  
Infami jactu, aut nimium vestigia Plumbum  
Allicit, & Sphaeram à recto trahit insita virtus.  
Tum qui projecit, strepitus effundit inanes,  
Et, variam in speciem distorto Corpore, falsos  
Increpat errores, & dat convitia ligno.  
Sphaera sed Irarum temnens ludibria, cœptum  
Pergit iter, nullisque movetur furda querelis.



Illa tamen laudes summumque meretur honorem,  
 Quæ non dirumpit cursum, absistitque moveri,  
 Donec turbam inter, crebram dilapsa supremum  
 Perfecit stadium, & metæ inclinata recumbit.  
 Hostis at hærentem Orbiculo detrudere Sphæram  
 Certat, luminibusque viam signantibus omnes  
 Intendit vires, & missile fortiter urget:  
 Evolat adducto non fegnis Sphæra lacerto.

Haud ita profiliens Elëo carcere pernix  
 Auriga invehitur, cùm raptus ab axe citato  
 Currentesque domos videt, & fugientia tecta.

Si tamen in duros, obstructa Satellite multo,  
 Impingat focios, confundatque orbibus orbes;  
 Tum fervet bilis, fortunam damnat acerbam,  
 Atque Deos atque astra vocat crudelia. —

Si verò incurfus faciles, aditumque patentem  
 Inveniat, partoque hostis spoliatur honore:  
 Turba fremit confusa, sonisque frequentibus, Euge,  
 Exclamant Socii; plausu strepit omne Viretum.

Interea fessos inimico Sirius astro  
 Corripit, & falsas exudant Corpora guttas;  
 Lenia jam Zephyri spirantes frigora, & umbræ  
 Captantur, vultuque fluens abstergitur humor.

*Jo. Addison, è Coll. Magd.*

GLORIÆ



## GLORIÆ VIS;

*Sive Certamen Navale inter —  
HARMANNUM Anglū & Præ-  
fectum quendam Belgicum, Honoris  
ergo, commissum.*

**T**E sequar, *Alcide*; non Te fera bellua Lernæ  
Tergeminique canis rictus, non vasta ter ampli  
Geryonis terret moles: Acheronte subactō  
Perdomitâ terrâ, & quod monstro immanius omni  
Irâ foemineâ, patrium conscendis Olympum,  
Quod tuleras pressurus onus, pars magna futurus  
Ponderis ipse Tui. Merces ô maxima Divûm  
Gloria! proh quantum mortalia pectora cogis  
Sacra sitis famæ, laudumque immensa cupido?  
Terrestres facis una Deos; hâc Arte *Quirinus*  
Hâc proles *Ledæa* polos; hâc ipse *Gradivus*  
Commeruit: Superos videas Aulamque Deorum,  
Undique bellanti collucet sydere Cœlum.

Qualis erat magni ad tumulum cùm staret Achillis  
*Pellæus* Juvenis! quantas tùm pectore flammæ  
Concipit! ut mundum spatio superare minori



Urbs quam Troja capi potuit, vovet! æstuat arcto  
Limite terrarum: domitos post Seras & Indos  
Extremi stat fine orbis: jam deficit hostis,  
Nec quod vincat, habet: tandem cessante triumpho,  
Majus in imperium Natum Pater excipit Hammon.

Quid memorem ignotas Virtus quò bellica Gentes  
Extulit: exiguum Romam modò fecit Asylum.

Nunc quæ subjectum septenis collibus orbem  
Regia despectas, famæ cui sydera Limes,  
Imperii Oceanus, Divum cui templa resurgunt  
Aurea, sydereæque arces; tum Roma minantes  
Fidenas metuisti, humilis tunc Æde Quirinus  
Stramineâ jacuit, tum cannâ tecta palustri  
Tarpejamque domum & Capitolia parva videres.

Tu decus Hesperiaë, Tu gloria Gentis Iulæ,  
Cæsar, ab ingrata patriâ nunc addite Coelo,  
Tu licet astrifero præcinctus tempora ferto  
Et lauro stellante mices, licet ipse Tonanti  
Proximus, Iliacâ porrectaque pocula dextrâ  
Purpureo ore bibas; non hæc Tibi gaudia tanti  
Quanti erat excelso Capitolia scandere curru  
Victori, & Romæ lætos egisse Triumphos.

O mihi si talem dederint mea Numina lucem,  
Una dies mihi vita foret, lux una triumpho



Vel feclo potior: pretium quodcunque placeret  
 Letho emerem; mihi non ignava silentia cordi,  
 Et Pylæ ætates, nigræque fimillima morti  
 Tempora, sed longæ ventura in secula famæ  
 Immortalis honor, qualem fortita Britannum  
 Gens fœta Heroum, quos fama immiscuit astris.

Non antiqua cano, quantus *Caractacus* olim,  
*Arviragus*que ferox, animi aut *Bonduca* virilis,  
 Nec toties pulsam Rutupino à littore Romam,  
 Et sua quæsitis vertentem terga Britannis.

Quin *Brutum* sacro longævi Carmine Bardi  
*Arturum*que Ducesque sonent; cantu efferat alter  
*Cressiacam*que fugam, atque exutos *Pictonas* armis  
*Henricique* animos & nomina magna, *Edoardos*;  
 Territa queis victas submisit Gallia dextras  
 Anglorum vi fracta rubro cum vortice inundans  
 Discolor in trepidos fugiebat Sequana fontes.

Nos quoque Belgarum terrorem & fulmina Belli  
 Angligenas, *Sandvicum* acrem, invictumque *Rupertum*  
 Dicet qui totas olim Permessidis undas  
 Hauferit, æternumque dabit per secula nomen:  
 Teque etiam, *Jacobe*, ingens Patris incrementum,  
 Civica cui frontem decoravit fronde Corona  
*Ultrajectinas* cum *Mosæ* ad flumina primus



Intraſti portas, inſtaurans prælia Gallis.

At Tu qui nuper Virtutis magna Britannæ  
Argumenta dabas, tunc & redimite coronâ  
Navali felix, & adhuc in fronte virenti,  
Hoſtica cùm Bugiæ ad portus incendia latè  
Sparſeris Argeriæ in claſſem, qui terror Iberis  
Hesperios Batavo tinxisti ſanguine fluctus;  
Tu noſtrâ dicende venis *Harmanne* Camœnâ.

Littus ad Occiduum, feſſique cubilia Phœbi,  
Quâ pater Oceanus, ſua regnâ, Atlantica volvit  
Æquora, in antiquo mundi ſtant limite Gades.  
Hos inſtructa armis, & multo milite portus  
Appulerat puppis Batavûm, ſociasque requirens,  
Invenit Hiſpanâ tutas ſtatione Carinas.  
Fortè ignara mali longum delata per æquor  
Feſſa viâ, Batavæ ſucceſſit bellica navis  
Angliaca; hoſtilemque inter jacet Unica claſſem.  
Dux *Harmannus* erat, fremit exitiumque minatur  
Belga ferox; prohibet tuti reverentia portûs,  
Hoſpitii ſacra jura vetant: nam foedus utriſque  
Tum commune habuit, pacemque colebat Iberus.  
Pronior in Batavum favor eſt; & fraudis avitæ  
Jam memor atque odii, ſtat prædæ exponere navem,  
Nec violare fidem, & pacem ſervâſſe videri.



Spargere tùm famam in vulgus, fugisse trementem  
Oceano Belgam, detrectantemque Britanni  
Prælia, securo pavidum confidere portu,  
Victoremque sequi, atque imbelli insistere prædæ.

Accensi Batavorum animi Martemque requirunt,  
Dux etiam puppis modò quem fugisse ferebant,  
Deposcit pugnam, atque in prælia provocat Anglum.  
Olli conditio accepta, exemplumque daturus  
Virtutis patriæ lætus sese ingerit hosti.  
Protinus armari navem, & se accingere Marti  
Ductor uterque parat; tùm vela capacia ventos  
Collectura omnes, curvataque suppara tendunt.  
Transstra per antennasque alii, durosque rudentes  
Transcurrunt celeres, summoque aplustria malo  
Bellica suspendunt, utriusque insignia Gentis.  
Arma locant alii, longèque minantia lethum  
Liventi nitro tormenta & glandibus implent.  
Pars alia acclamat, connixaque viribus instat,  
Unaque laxato diducitur anchora fundo.

At non Belga sibi fesus, numeroque ratiq̃ue,  
Instruit atque novo complebat milite puppim.  
Quinetiam infidas metuens agit arte dolosâ  
Insidias; latuere sinu nam forte propinquo  
Tres Batavûm naves, inque altum exire jubentur,

Auditæ-



Auditæque procul celeres succedere pugnæ.

Dux etiam antiquo Gentis de more poposcit

Spumantem vino pateram, fociisque propinat

Pocula plena mero; litat hoc libamine Marti;

Illi inter sese multâ vi brachia tollunt,

Exiccantque cados, it plus quam nauticus omni

Tùm clamor Cœlo: nec prælia iusta parari

Sed Lapitharum Epulas credas aut Orgia Bacchi.

Sobrius interea Ductor multumque priori

Diffimilis, postquam belloque operique paratum

Esse videt Nautam; aptatamque in prælia puppim;

O Socii, potior Batavûm virtusve Britanna

Exeriemur, ait, Me sic nunquam hoste protervo

Ante laceffitum, jactanter in arma vocare

Pœniteat Belgam: Patriæ fortuna decusque

Nobiscum hâc unâ vehitur rate, cernet Iberus

Littore, *Greenvillumque* iterum *Dracumque* timebit.

Nec longo nobis opus est certamine, pulchram

Aut mortem hora mihi dabit, aut dabit una triumphum;

Et victos condet fluctu, aut feret æquor ovantes.

At verò Hispanus, cùm decertare paratas

Esse videt, portus extra jubet ire carinas,

Amplus quâ pugnæ pateat lato æquore campus;

Securus juxta & lætus navale duellum.



Littore visurus, totâ stat vulgus arenâ  
Confertum, vacuas urbes & rura relinquens.  
Talia non olim vidit spectacula Roma,  
Nec talem tulit ipsa Virum, portu ire priores  
Cernuntur Batavi, atque iterum deposcere Bellum;  
Et canere ingenti clamore, ante arma, triumphos.  
Angliaca insequitur puppis, cursuque silenti  
Scindit aquas, audax facinus, temerariaque arma  
Irrident alii, pars & miseratur euntem  
Damnatam letho, & nimiâ virtute cadentem.

Jamque altum tenuere rates, & classica pugnae  
Signa dabant, inflant lituos, & tympana pulsan,  
Insonuitque fragor latè Siphonis aheni  
Fulmineus; tonitruque novo cœlum omne remugit.  
Scilicet is pugnae Batavum modus, eminus arma  
Projicit, & vanos jaculatur longius ignes.  
Tela fluunt velis, aut fixa rudentibus hærent  
Incaustum, aut fessæ recidunt in marmore glandes.  
Interea ignarum miratur littore vulgus  
Flammas excipere & parcè torquere Britannos;  
Inque hostem intrepidus per tela minantia & Ignes  
Tendere iter propius, Batavæque accedere puppi.  
Utque ubi torvus aper Calydonia liquerit arva  
Thessalicos populatus agros, immittit in hostem



Pastor Amyclæumque canem, grandemque Molossium;

Accurrunt circa, & fugiunt prædamque timentes

Stant longè, & vacuum latratibus aëra replent:

Illi indignanti fetis terga asperat ira,

Frendet & exacuit dentem, sternitque rotatque

Obstantes, multoque cruentat sanguine terram.

Sic *Brito* ut hostilem tandem est delatus in alnum

Acrior accelerat cursum, prorâque minanti

Irruit in proram, atque implexis funibus hæsit,

Vinculaque iniecit, ferratoque alligat unco,

Ne fugiant, illud metuit fortissimus unum.

Nec mora, quâ puppi protenditur area rostro,

Sulphureo secat igne viam, latumque per hostem

Findit iter; ventis & fulminis ocyor ictu

Plumbeus imber agit mortes, tabulata, trabesque,

Malique, antennæque, novâ gemuere procellâ.

Insiluit Dux ipse rati, focique sequuntur,

Cominus hinc atque inde neces, & vulnera fortis

Spargit, & obstantum jugulos petit, & fodit ense.

Jamque super strages & densa cadavera Victor

Quærit adhuc hostem; laceræ pars ima carinæ

Claustra petit, cæcisque pavens evellitur umbris;

Cum Duce pars veniam supplex, vitamque precatur:

Ille ubi prostratosve sibi, vel morte jacentes



Conspexit; nimioque madentem sanguine dextram:  
 Reliquias Batavum tristes, stragemque misertus  
 Infandam, ignoscit facilis, vultuque sereno;  
 Nec vicisse adeò placuit quàm parcere victo.

Et jam Victor ovans resonantia littora plausu  
 Intrat adoratus populis, & vulnus honestum  
 Fronte gerens, proprioque hostisque cruore decorus.

Subsequitur captiva ratis, devincta catenis  
 Angliacæ puppis veteris de more triumphî;  
 Cærule descendunt malis, rutilæque Britannûm  
 Signa cruces toto fluitant victricia cœlo.

Tu verò antiquam Dux invictissime Calpen  
 Transgredere, Herculeasque ultrà spatia columnas,  
 Nec Gades Tibi limes erunt; dùm littus Iberum  
 Æquora perpetuo pulsant Atlantica fluctu:  
 Albionemque tuam complectitur Amphitrite.  
 Te pennâ stridente vehat per sydera fama,  
 Heroasque ferens, tua Cœlis innatet Argo.

*Phil. Fell, Omn. Anim. Soc.*



AD

D. D. HANNES

INSIGNISSIMUM

*Medicum & Poetam.*

**O** Qui canoro blandiùs Orpheo  
Vocale ducis carmen, & exitu  
Fæliciori luctuosis

Sæpe Animam revocas ab umbris,  
Jam seu solutos in numerum pedes  
Cogis, vel ægrum & vix animæ tenax  
Corpus tueris, seu cadaver  
Luminibus penetras acutis;  
Opus relinquens eripe Te moræ,  
Frontemque curis sollicitam explica,  
Scyphumque jucundus require  
Purpureo gravidum Lyæo.

Nunc



Nunc plena magni pocula postules  
Memor *Wilhelmi*, nunc moveat sitim  
Minister ingens, Imperique  
Præsidium haud leve, *Montacutus*.  
Omitte tandem triste negotium  
Gravesque curas, heu nimium pius!  
Nec cæteros cautus mederi  
Ipse Tuam minuas salutem.  
Frustra cruorem pulsibus incitis  
Ebullientem pollice comprimis,  
Attentus explorare venam  
Quæ febris exagitet tumentem:  
Frustra liquores quot Chymica expedit  
Fornax, & Error sanguinis, & vigor  
Innatus herbis Te fatigant:  
Seriùs aut citiùs sepulchro  
Debemur omnes, vitæque deferet  
Expulsa morbis Corpus inhospitum,  
Lentumque deflebunt nepotes  
( Reliquias Animæ ) Cadaver.  
Manes videbis Tu quoque Fabulas,  
Quos pauciores fecerit Ars Tua;  
Suumque victorem vicissim  
Subjiciet Libitina victrix.

Decurrit



Decurrit Illi vita beatior  
Quicumque Lucem non nimis anxius  
Reddit molestam, urgetve curas  
Sponte suâ fatis ingruentes;  
Et quem Dierum lene fluentium  
Delectat ordo, vitæque mutuis  
Felix Amicis, gaudiisque  
Innocuis benè Temperata.

*Jo. Addison, è Coll. Magd.*

*JACO.*



## JACOBUS II.

**D**UM capiti lætos Regali innectit honores  
 Turba favens studiis, dum circum compita fervent  
 Plausuque fremituque; quid ô Parnassia Diva  
 Quid Tu sola taces? est & fœlicis Olivæ  
 Atque hederæ tibi vis & quæ per tempora Regum  
 Laurus eat victrix: age multo Numine foetos  
 Annales ordire, & non ignobile carmen.

Angliacos late jam desolaverat agros  
 Civilis rabies: populus jam victor avitis  
 Depulerat *Carolus* sceptris: & ne quid inausum  
 Linqueret, indignâ statuit fœdare securi  
 (Siqua fidem tanto est sceleri latura vetustas)  
 Sacratum caput, & victos Diademate crines:  
 Nec fatis hoc: ipsam cupiunt à stirpe *Stuartum*  
 Evertisse domum, atque æternæ gentis honorem.  
 Nequicquam! longè venturi provida mater  
 Senferat hæc, & te nimium, *Jacobe*, paternis  
 Vicinum fatis Nebulâ subduxit amictum

Fœminæ:



Fœmineâ : favit cœptis audacibus ætas

Mollior & dubiæ tenerâ lanugine malæ.

Talem flava Thetis magni Chironis Alumnum

Eripuit bellis & trans vada cærula vexit

Virgineâ tectum pallâ : stupet æmula formam

Deidamia parem ; victæ indoluere sorores.

Ex illo qui Te palantem egere labores

Æquora per terrasque ? O nusquam rebus in arctis

Fratre minor *Carolo* ! Patris O non degener hæres !

Finibus extorris peregrinæque hospes arenæ

Quas supplex gentes, quas non oraveris urbes ?

Heu duram fortem & Divos expertus amaros !

Non tamen his animi virtus infracta ruinis

Succubuit ; Ligerin testor, Rhodanique fluenta

Vulneribus Francorum & pigro fordida tabo :

Testor & undantes Dunkirkæ sanguine fossas,

Atque tuum, Mardika, haud exuperabile vallum,

Cum portas super, atque ipsis pro mœnibus Heros

Auderet frustra : infælix quod milite Flandro

Ufus in adversos ivisset forte Britannos.

Quali Marte ruens, quam magnæ prodigus iræ

Arma Nemuriadum & disjectas perculit alas !

Illa dies atque illa animoso in pectore virtus

Nutantem folio *Lodovicum* & Gallica fata

Sustinuit,



Sustinuit, stupet in tantis *Turennius* ausis,  
Seque premi dolet, & partas arefcere lauros.

Et tamen hunc toties defensâ excedere terrâ,  
Galle, jubes; neque te juncti vicinia movit  
Sanguinis, hospitii fides: valet usque Tyranni  
Fama minax, & *Oliveriani* Nominis horror.  
Quanquam (siqua suos tangunt præfagia Vates)  
Tempus erit quondam cum Te, *Lodoice*, paventem  
*Jacobus* non jam supplex inviserit hospes;  
Cum sternet Gallos, cum magna in prælia vindex  
Ducet avos, atavosque, & quas *Edoardus* in armis  
Impiger, aut melior concepit Filius iras.  
Ducet enim, ac multo Parasinos ariete muros  
Victor ovans impellet, & in sua jura Caleti  
Avulsum trahet imperium, Normanaque regna.  
Tum vos *Isiacæ*, gratissima Nomina, Musæ  
Idem tanget honos, qui nunc; similisque videri  
Ibit magna dies: iterum cecinisse juvabit  
*Caroliden*, capitique recentem aptasse coronam;  
Solenni hæc iterum resonabunt Mœnia plausu.

Tu tamen exhaustos age nunc molire labores;  
Venturum decus, ac ferarum præmia laudum  
Diis, Erato, permitte: vides quas læva Britannis  
Fata tulere vices! quis rerum volvitur ordo!



Avulsum<sup>3</sup> folio *Cromwellum* pallida Ditis  
Regna tenent: sævit flagris subigitque fateri  
Tisiphone insultans; circum fœda agmina stipant  
Gorgones, Harpyæque, atque informes Centauri.  
En *Carolus*! En reduces Rutupina ad littora Fratres!  
Quà tendunt per agros, perque urbes aurea circum  
Pax & prisca fides, & formosissima rerum  
Libertas nitet, atque effuso copia cornu.

O magnas experte vices *Jacobe*, secundis  
Qua licet utere Diis; cape fœlix pacis amœnæ  
Intermissa diu studia, ac florentia dona.  
Nec te longa manent: jam nunc antiquus ad arma  
Te poscit Mavors, iterumque in bella resorbet.  
Ecquid enim vix dum Natali Belga palude  
Elapsus, stagnisque informibus, Oceanum omnem  
Abripiet, pelagoque impune volabit aperto?  
Ille etiam Angligenas audaci Marte laceffet,  
Ultiores Britonas, sociamque oblitus *Elisam*?  
En & nunc quantis instaurat classibus æquor  
Hinc atque hinc, oditque moras, atque increpat ultro!  
Demens! qui *Jacobi* haud æqua in bella ruentis  
Excierit Nimbosque & non imitabile fulmen!  
Ille aderit damnoque moras graviore rependet.  
Haud aliter vidi meditantem prælia taurum

Stare



Stare procul, vultusque truces animosæque cōlla  
 Fingere, libratoque irasce in vulnera cornu:  
 Dein ubi collectæ volvuntur naribus iræ,  
 Proruit, atque omnem rapido pede spargit arenam.  
 Quas strages tulit illa dies! quæ funera vidit  
 Et quales lethi facies! cum Marte secundo  
 Terribilis puppi staret *Jacobus* in altâ,  
 Et Batavûm laceras vexaret fulmine *Quercus*:  
 Audiit, intremuitque imis Haga fundamentis,  
 Intremuere lacus, perque uda cubilia pressit  
 Rugitum Leo, septenoque obmutuit ore.  
 Quâ ferret se cunque neces & vulnera spargens,  
 Illac retrò acies ac ruptas ire phalanges  
 Compulit, & vacuo cesserunt æquore Belgæ.  
 Haud tulit hoc partas Suedorum sanguine lauros  
*Opdamus* recolens, seseque objecit, & omnem  
 Excepit belli nubem, intorsitque receptam.  
 Tum verò volitantûm hinc illinc ingruere imbrem  
 Telorum, volvi fumos & stridere glandes  
 Alatas: medius regnat pavor; omnia latè  
 Caligoque umbræque & circumfusa tenet Nox.  
 Tres illic juvenes crudeli funere raptos  
 Vidisti, *Jacobe*; tibi quoque missile plumbum  
 Affuit, & sparsæ rorabant sanguine vestes.



Fælices animæ quibus hoc sub Iudice coram  
Contigit oppetere, & tam pulchro vulnere labi.  
Non vos indecores, nec inultæ errabitis umbræ:  
Pœnarum ipse fatis jam nunc pro talibus ausis  
*Opdamus* luet, atque eadem mox regna tenebit.  
Namque ut *Carolides* magnis se accinxerat iris  
Torva tuens, Ductorque Duci jam cominûs ire  
Apparat, & stricto ad puppim mucrone coruscat;  
Protinûs immani ( seu Fors hoc, seu Deus Author  
Egerit, incertum est ) Batavûm ratis iccta fragore  
Diffiluit: piceæ fursûm cum turbine Nubes  
Volvuntur, mistæque atrâ caligine flammæ:  
Tum verò passim vidissēs gurgite vasto  
Antennasque, forosque, & truncos vulnere malos,  
Nigrantesque trabes, semustaque robora ferri;  
Arma quoque, & laceros ( immania corpora ) Belgas.

Hactenus Hollandis animos viresque *Lyæi*  
Indomiti rabies suffecerat udaq̃ue virtus:  
At simul *Opdami* cladem ingentesque ruinas  
Prospexere, ruunt subiti, clavosque reductos  
Expediunt, omnesque vocant ad Carbasâ ventos.  
Terga premit *Jacobus*, & impiger æquore toto  
Palantes agit, & repetito fulmine vastat;  
Nec mora nec requies, *Blaci* subridet imago

Atque



Atque *Amboynæi* faturantur sanguine *Manes*.

Bellis parce, Brito: jam nunc tibi Thamesis ultrò  
Cæruleum pandit gremium, Tuque inclyte Victor,  
Ingredere ò, crinesque obtentu frondis inumbra.

Aspice qui coeant populi, quo littora plausu  
Icta sonent! passis ante omnes *Carolus* ulnis

Gratatur reduci, longumque amplexus inhæret.

Actiaci talem Cæsar post funera Martis

Se tulit invectus triplici Romana triumpho

Mœnia: procedunt famulæ longo ordine gentes

Æthiopes, Lelegesque, sagittiferique Geloni.

Tum lætus viguit Pæan, tum carmine festo

Albion insonuit. Quin Tu popularibus auris

Fide parùm, *Jacobe*; eadem mox turba revulsum

Prosternet decus, & direptas vertice lauros.

Illius imperiis patrio Tu littore quondam

Excussus peregrina iterum vagus arva requires:

Antiquis iterum fatis exercitus ibis

(Heu tibi!) per scopulos, & per maria aspera ventis;

Ah! quam pene die Britonùm spes occidit illo,

Cum quæ te vexit bibulis hæreret arenis

Fixa ratis, rimisque inimicum admitteret imbrem

Horridum hians, jam jamque vado subsideret imo.

Tum vitreo (ut fama est) mœstum ingemuere cubili

Nereides



Nereides Nymphæ: tum monte Britannia fidens  
Diva super, canos pictai frontis honores  
Turpavit, diæque verenda insignia pallæ:  
Lapsa manu sceptrâ, atque excussæ vertice Turres.  
Quod Te tunc Numen tanto discrimine præsens  
Eripuit, *Jacobe*? Deûm certissima cura  
Salve, Fatorumque labor! cui militat æquor  
Cui venti, vigilisque armamentaria cœli.  
O fueti nimium Patres per devia ferri!  
O populi rabies! ut vos præcordia subter  
*Shaftsburiana* lues, & trux accendit Erynnis!  
Sic decuit patriæ dilecto è limine pelli,  
Qui patriæ sumptis steterat tutamen in armis!  
Sic ponti cœlique in aperta pericula mitti  
Qui maris imperium vindex, sævumque tridentem  
Afferuit! gesti sunt hæc stipendia belli!  
Quis furor est illi sceptrâ invidisse Britanna,  
Quem Dominum velit Europa? hunc ascisceret ultrò  
Gens Lithuana Ducem, Thracis qui cornua Lunæ  
Frangeret, Ismariique retunderet arma Tyranni.  
Illi Cæsareas Germano addente secures  
Cederet Austriacus, stet quanquam stemmatis ordo  
Æternus, missumque Deorum à sanguine Nomen.  
Quin tu caruleis gratissima Tethyos ulnis

O

Albion,



Albion, & circumfusi decus Ennosigæi,  
· *Jacobo* gratare tuo: viden' ille malignas  
Evicit tandem *Parcas*: ille omine fausto  
Imperiis jam affargit, & Anglica regna capefcit!  
Quantus fefe infert populis! qualisque videri  
Hinc atque hinc feftâ Procerum ftipante coronâ  
Incedit! Lucent effufis aurea flammis  
Tempora; Fraternalumque aperitur vertice fydus.  
Haud alius folium ftellis ardentibus aptum  
Confcendit Pater Omnipotens: ftant limina circum  
Divi, Semideique, & (Ruftica Numina) Fauni:  
Fit fonitus, tremulumque perambulat atria murmur.

Recitavit in Theatro *Apr. 23. 1685.*

—— ex *Æde Christi.*

CARMEN



CARMEN  
CORNU VENATICO  
INSCRIPTUM.

**R**uris O Præses, Nemorumque Virgo,  
Ecce Venatûs studiosa Pubes  
Quæ Tibi Vovit! Cape nunc, & olim  
Leniter audi.

Hoc simul Cornu sonuit, repentè.

Ipsa Te, Diana, Tuasque Nymphas

Affer in Cursum; & Latebris morantem

Excute Prædam.

Sic Tuos nusquàm temeret Recessus

Capripes! sic Te, per operta, nullus

Cernat *Ætæon*, ubicunque puro

Fonte laveris!

—— ex *Æde Christi*.



## CARMEN

*Poemat. Oxon. in Obitum Augustis-  
simæ & Desideratissimæ Reginae  
MARIAE secundæ inscriptum.*

**E** Stne, qui missus petat astra pennis  
Ales, ac *Teiam* superet columbam?

Surgat, ac charæ ferat hæc *Sororum*

*Dona Mariæ.*

*Cæteras herbas* minùs illa fidas

Sensit, herbarum generosa nutrix:

*Nostra* succurret meliùs caducæ

*Laurea vitæ.*

—— ex Æde Christi.

MUSÆ



## MUSÆ

## Regem &amp; Reginam

## CORONANTES.

**I**UO dubium rapitis *Musæ*? quis carminis ardor  
 Intus agit stimulos, & fervida pectora turbat?  
 Namque ignota prius subit imas flamma medullas,  
 Et plusquàm solitus mihi corda fatigat Apollo.  
 Nunc sua castra sequi, Regumque exponere laudes  
 Hortatur *Clio*, Reginarumque triumphos;  
 Sive tuas audax memorem, domus *Atia*, lauros,  
 Quæ gesta *Alphonsi*, quantus *Sigebertus* in armis;  
 Seu *Bruti* sobolem, genus insuperabile ferro,  
 Angligenûmque acies, & euntem in bella *Jacobum*.  
 Protinùs abripior. Dantem cùm vela furori,  
 Audacique nimis conantem prælia versu  
 Retrò ferre pedes *Erato* monet, & sibi molles  
 Indulgere Elegos, dignumque Cupidine carmen.  
 Quinetiam *Euterpe* tenui memorare Camœnâ



Admonet increpitans, hilaris quas Curia pompas  
 Ducat, quo Regum surgant diademate crines,  
 Quantaque sollicitent hodiernum gaudia Phœbum.  
 Distrahor in varia, & multus mecum ipse voluto,  
 Quos ferar in campos, quis surgat carminis ordo.

2. Quin Tu *Jacobo* solus meditaris honores?  
 Aut solum Te, vane Puer, fecêre Poetam  
 Pierides? sed & hoc vivit sub pectore Regum  
 Fidus honos, & cùm solvuntur vota *Jacobo*,  
 Me quoque amant Musæ, mihi non peregrinus Apollo.

3 ad 2. O insane Puer! nimiùm nè fide Camœnis,  
 Carmine si speras laudes æquare *Jacobi*,  
 Idem Virgilium certes superare canendo.

2 ad 3. Quamvis nostra putes fordescere munera,  
 quamvis  
 Despectus tibi sim, melior mea carmina forsan  
*Jacobus* foveat. (3.) Modò sint ea digna foveri.

1 ad 3. Parce malæ linguæ, & (ad 2.) Tu, Phœbi  
 'magne Sacerdos,  
 Opprobriis ignosce; (ad ambos) atque has componite lites.  
 Et referes Tu carmen, & Ille; & Quisqus honores  
*Jacobo*, aut *Divæ* supplex fert dona *Mariæ*.  
 Nec satis est unus tanta in conamina Phœbus;  
 Quid juncti valeant humeri, & communis Apollo,



Experiamur; erit mihi carminis Argumentum  
Præliaque, clypeique, & Marti accommoda *Clio*.

3. Bella canant alii, queis fortia pectora largus  
Indulfit Titan, duri & patientia ferri.  
Me lituo aversum (nam nec pudet ista fateri,  
Dum non degenerem arguerint tua signa, Cupido)  
Ad mollem citharæ lusum, imbellesque modorum  
Delicias *Erato*, Veneris gratissima cura,  
Incitat, & chordis inspirat amabile Carmen.

2. Nec mollis Cytherea mihi, nec prælia cordi;  
Tu Dea, cui dederint jucundum gaudia nomen,  
Alma meis faveas cœptis, Tu ritè vocanti  
Dextra ades, atque animæ præsens illabere nostræ.  
Auditas agnosco preces, hilaremque repentè  
Mutor in *Euterpen*, & me novus incitat ardor  
Ire viam immensam, & plenis dare carbasa velis.  
Quin cedo — (*ad Cl.*) Tu fare prior, quo carmine turges?  
Nam postquàm *Clio* cupis, ambitiose, vocari,  
Et tanto effrænis vanum Te nomine jactas,  
Fronti siqua fides, si non falso omine plenæ  
Inflantur buccæ, majorque insurgis in altum,  
Grande aliquod moliris, & haud ignobile carmen.

*Cl.* Sit procul ut tali me digner laude, Sorores.  
Quin pugnata olim recolo jam prælia, namque

*Ipsa*



Ipsa aderam præsens, & in imâ mente reponens  
 Confertasque acies, albentesque ossibus agros,  
 Et Senonum infractas *Jacobo* vindice turmas  
 Tempus in hoc volvo : juvat, ô, meminisse ; quot Ille  
 Orco animas magno *Dunkirkæ* ad mœnia bello  
 Tradidit, & primam surrexit quantus in hastam !  
 Vidi perque hostes, per & obvia tela ruentem,  
 Quò generosa tulit cunque ira, aut vivida virtus,  
 Hospitiive fides, focio & data dextra *Philippo*.  
 Nec Martem arguerim, nec te, Tritonia Pallas,  
 Nec Vos, quotquot ego genua incerare Deorum  
 Haud oblita fui, quod non fausto omine duram  
 Commisit pugnam ductor ; fors ista Britannæ  
 Debita erat genti ; quòd si non æqua favebant  
 Fata Viro, cæsis Gallorum millibus antè,  
 Ducentem in castra Hispanos rediisse juvabit.  
 Sed neque Te posthac similis, *Lodoice*, manebit  
 Fortuna, aut tantis Sors si semel abfuit ausis,  
 Tum quoque, cùm fidos hortetur in arma Britannos,  
 Obstiterint eadem contraria fata *Jacobo*.  
 Ille memor veteres Patrum instaurare triumphos  
 Irruet in Gallos, secumque in prælia ducet  
*Edvardique* animos, & *Nigri Principis* arma.

*Erato.* Quòd veheris, *Chio* ? quòd te monumenta laboris

Antiqui



Antiqui rapiunt? magni dum gesta *Jacobi*  
 Officiosa refers, nescis, temeraria, nescis,  
 Heu quantum efficias fando incrudescere vulnus,  
 Quos Anglis renovet mœstissima scena dolores:  
 O infanda dies! quam Musæ semper acerbam,  
 Quamque ego præcipuè crudelem semper habebo!  
 O triste exilium! quando his peregrinus ab oris  
 (Horresco referens) pulso cum fratre *Jacobus*  
 Infelix aliis successit sedibus hospes.  
 Me quoque tunc eadem crudelia fata trahebant,  
 Exul & ipsa fui; tenuère hæc regna vicissim  
 Iræque, insidiæque, & belli tristis Erinnyes,  
 Atque Odia, & scissâ turpis Discordia pallâ.

*Enterpe.* Quid tamen hæc, *Erato*, nequicquam ingrata  
 revolvis?

Lætior en rerum facies! meliore secundos  
 Augurio ire dies, atque aurea sæcula volvi  
 Conspicor: en quanto procedunt agmine *Fratres*  
 In patriam *reduces*! quantus sese explicat Ordo,  
 Magnatum & Patrum, & plaudentûm mille Virorum.  
 Ipsa alios inter, circum plaudente coronâ  
 Naiadum, effusis aderam gavisa triumphis,  
 Pars magna illorum; nam quæ Lux prima reduxit  
*Carolidas*, Anglis eadem me reddidit oris,

Et



Et dedit hâc iterùm placidam consistere terrâ.

*Erato.* O illam meminisse diem mihi magna Voluptas!  
O votis revocanda meis! quâ bellicus Heros  
Camporum immunis strepitu, durique solutus  
Martis fervitio, te demùm, blande Cupido,  
Fassus erat, tantosque animos submisit amor.  
Fælix ante alias, domuit quæ Martia Virgo  
Pectora, primus amor, Quæ dudum juncta fideli  
Connubio, fausta Venere ac Junone secundâ,  
*Jacobum* fecit formosâ prole parentem.  
Scilicet ex illo gaudent se sanguine nasci  
*Auriaci* conjux, Angli & spes altera regni  
*Anna* soror: Nec Te, cui vincla jugalia curæ,  
Incussem, ô Juno, deerat quòd mascula proles,  
Et parca invidit sobolem Lucina virilem.  
Ille aliis honor est thalamis, manet illa *Mariam*  
Sors melior lecti, quâ non fœcundior ulla,  
Pulchrior aut Italis sese Nympha extulit oris.  
O quæ connubia, & quales celebrant Hymenæos  
Egregium *Alphonsi* genus, invictusque *Jacobus*!  
Multa tamen toleranda priùs, multoque *Maria*  
Sanguine dotanda: expectat te pronuba Enyo,  
O semper duris *Jacobe* exercite fatis,  
Et Mars æquoreus, Belgarum & mille carinæ.



Altera Te nunc bella vocant, spretumque laceffit  
 Oceani imperium, temerataque fœdera ponti.  
 En! video Angliacis tabulatum classibus æquor,  
 Transtra per & puppes se latè efferre *Jacobum*  
 Funera spargentem, simul & trepidare fugacem  
*Opdamum*, inque suas properum remeare paludes.  
 I nunc, Belga ferox, offer Te, irrise, periclis,  
 Navales, i, sterne acies, tege classibus æquor,  
 Crudâ ut mole tumens, multoque abdomine pinguis  
 Balænam pascas, & fias præda filuris.

*Euterpe.* Quot spolia indutus Victor, quantisque  
 trophæis

Insignis graditur! circum Pæana volutant  
 Littora; iò Pæan repetit de montibus Eccho.  
 Mille inter populi plausus per strata quadrigis  
 Fertur ovans; fusos lauro redimita capillos  
 Læta triumphales sequitur *Victoria* currus,  
 Pax simul it comes, & fœcundo *Copia* cornu.

*Erato.* Nempe per hos casus, perque hæc discrimina belli  
 Itur in Italiam, formosam ubi Diva *Mariam*  
 Ostendit Venus, & tantorum digna laborum  
 Præmia.

Sic Priami post fata senis, supremaque Trojæ  
 Funera, Neptuni rabiem Turnique furores

Elapsum



Elapsum Ænean, blandis Virgo excipit ulnis

Itala, & ingentes pensat Lavinia curas.

O si talis eram, qualis *Tassonis* anhelum

Accendi pectus, fudique in carmina vires!

O quantis Ego tum numeris *Lauræque Jacobique*

Ornarem thalamos, & connubialia jura!

Sed nunc angustos animos, & inertia corda

Nequicquam stimulo & tantis non æqua Camœnis.

*Euterpe.* Quin aliquid potius præsens quorum indi-  
get usus,

Texere Regales properamus ritè coronas?

Et nunc ridet ager, nunc omnis pullulat Arbos,

Induiturque recens viridem Natura juventam.

Quare agite, ô *Musæ*, per amœni jugera Pindi

Parnassi per agros, muscoque virentia Tempe

Ferte pedem, ac passim crescentes carpite flores,

Communemque ornate Deum, & date ferta volentes.

*Clio.* Tantus honor ruri, Deus ut sacra tempora circum  
Inter odoratos flores finat ire capillos?

Flores, quos crepitans impunè per aera Corus

Disjicit, aut sudos ubi torret Sirius agros,

In tenues cogit nimius Sol ire vapores.

*Erato.* Non, si adsint Tmoli colles, & amœna vireta  
Alcinoi, aut rosei, Pæstum quos jactat, honores,



His Hyblam addideris super, haud tamen æqua *Jacobo*  
Ornamenta feres, aut munera digna *Mariâ*.

*Euterpe*. At vidi his nuper formosam incedere Floram  
Frondebis, ipse tegi nec dedignatur Apollo.

*Clio*. Phœbo sacra viret Parnassi in vertice summo  
Laurus, & in cœlum ramis fœlicibus exit:

Perfæpè hinc noster sua tempora cinxit Apollo,  
Hinc propero meritam *Jacobo* ferre coronam.

*Euterpe*. Dii facite, ut frondens cingit dum tempora  
laurus,

Huic adsit semper lætis Victoria pennis;

Sive acer poscat tumidos in prælia Gallos,

In Mauros seu signa ferat, Thracesque laceffat,

Euphraten Nilumque sequens, invisere Gangem

Seu paret, & captos ostendere civibus Indos.

*Erato*. Propter aquam tardis ubi lenis flexibus errat

Castalis, & placido demulcet murmure ripam,

Myrtus, amor Veneris, latè diffundit honores.

Qui cœlo assurgit summus, decerpere ramum

Cura mihi, & fertum lectâ de fronde *Mariæ*

Nectere; si Nymphæ myrtus non vilis habetur

Nec tibi, cedo, (*ad Cl.*) Soror, nec vincet Laurea Myrtum.

*Euterpe*. Ornet sanguineos laurus Phœbea triumphos,

Myrtus amat facilem, partam & sine cæde coronam.

Quam



Quam video nasci sobolem! quæ surgere regna!  
 Tu modò nascenti puero, quem *Cambria* regem  
 Infantem expectat, famulus cui serviet orbis,  
 Ilithyia fave, dextra & natalibus adsis.

*Clio.* Lauro addam virides querno de vimine ramos,  
 Quæ *Carolus* texit, suus est honor huic quoque frondi.

*Erato.* His super addetur varios Rosa picta colores,  
 Utque memor referat conjunctæ insignia gentis,  
 Hinc nive candidior fuerit, simul indè rubebit.

*Euterpe.* Dum legit illa Rosas, (*ad Cl.*) tu Lilia ferre  
 memento;

Invida frendenti rumpantur ut ilia Gallo.

*Clio.* Illa memor carpam, simul & miscebitur illis  
 Non Boream metuens, non Brumæ frigora Palma.  
 Utque hujus nimio pressus sub pondere truncus  
 Altior in coelum assurgit; sic nulla *Jacobum*  
 Flectere fata queant, at contra audentior ibit,  
 Dum coelo tandem celsum caput inferat alto.

*Erato.* Pallentes violas, & summa papavera carpens  
 Narcissique comas, pulchræ fero dona *Mariæ*.

*Euterpe.* Narcisso sat erit, si sub vestigia Nymphæ  
 Spargitur, & sacro pressus pede surgere sperat.  
 Quære quibus terris inscripti nomina Regum  
 Nascantur flores, hinc collige ferta *Mariæ*.



Intereâ in Pisâ, multùm dilecta Minervæ  
 Pullulat, & latè frondens se pandit Oliva.  
 Sunt mihi, sunt geminæ supremâ ex arbore frondes;  
 Hæc, *Jacobe*, tibi magnum decus, illa *Maria*.  
 Lenta quidem in nubes pigrum caput exerit Arbos,  
 Sed semper viridis, frustra obrepente seuectâ,  
 Crescentis tardè compensat damna Juventæ.  
 Sic precor, ô Superi, postquam Rex Nestoris annos  
 Præteriiit, simul & vicit Regina Sibyllæ  
 Sæcula Cumææ, maneat tamen usque *Jacobo*  
 Cl. Vis eadem in bello. (*Er.*) similis sit forma *Mariæ*.

Recitârunt in Theatro Apr. 23. 1685.

D. Udal. Corbet Baronett.

Johannes Sprot Armig.

Guil. Barber Armig.

} ex Æde Chr.

Exequiæ



---

Exequiæ Dolbenianæ:

SIVE

ECLOGA

In OBITUM

Reverendissimi in Christo Patris

JOHANNIS DOLBEN,

Archiepisc. EBORACENSIS.

Interlocutores, *Corydon & Thyrsis.*

**D** I C mihi, dic Pastor, (si jam communis utroque  
Cura tenet, communis amor) quo faucia luctu  
Mens tibi languet, & unde dolor depascitur ora?  
Talis enim, memini, tibi purpura læta solebat  
Flagrantes vestire genas; sub vere rubenti  
Qualis honor violas, & odoriferos Hyacinthos.

Jam



Jam color iste abiit, seu sævæ Phyllidis iræ  
Exedère animum; trepidi prædator ovilis  
Seu lupo invalit teneros cum matribus agnos.  
Fare age; & ex illo sic *Pan*, tibi Numen amicum,  
Securas tueatur oves, sic Phyllide *Thyrsis*  
Conjuge fit fælix, fælix simul illa marito.

*Thyr.* Ah! pereant mea cura greges, oviumq; magistrum  
Mors eadem rapiat; postquam crudelior *Orcus*  
Abstulerit *Gallum*, atque imâ sub nocte recondit.  
*Galle*, decus Nemorum, Borealis fama *Briganti*;  
Quà mediam, ante alias longè pulcherrima *Nymphas*  
*Ousa* fecas urbem, lenique interluis alvêo.  
Sed fluvios jam luctus habet, tuque imbre tumentis  
Volvis aquas, queruloque immugit murmure ripa:  
Nempe tuus periit *Gallus*, cui fistula ventos  
Et poterat mulcere, & vestros sistere cursus.  
Pastorum immortalis honor, spes unica, & ingens  
Præsidium *Arcadiæ Gallus*: te, *Galle*, sub undis  
*Nereides* deflent, te lugent pascua circum  
*Faunisque Dryadesque*. (*Cor.*) Ergo quando omnia damnum  
Tangit idem, certè & *Corydon* sua munera debet.  
Te, natale solum, testor, placidæque fluenta  
*Aufonæ*; propter vestras si carmina ripas  
*Gallus* adhuc juvenis lusisset, carmina valles



Motura & montes; quin jam per flumina fævus  
 Rumor eat, *Gallus Coritanæ* gaudia terræ  
 Occubuit: Tu semper eras Custodibus ipsis,  
 Tu pecudi secura salus; Tu maxima, *Galle*,  
 Progenies Divûm: Vos mœsti dona quotannis  
 Libate Agricolaë (vestris sub ovilibus urfos,  
 Immanesque fugavit apros) ter spargite flores,  
 Ter lustrate umbras, evincti tempora, tristis  
 Et taxi ramis, & funereæ Cyparissi.

*Thyr.* Tu quoque pullatos inter, *Rhedycina*, triumphos  
 Tu focias misce lacrymas (Vos parcite Musæ  
 Agrestes) olim sacros dilecta recessus  
 Incoluit proles; Tibi plenâ munera flammâ  
*Galle*, dedit, geniumque indulfit amicus Apollo.

*Cor.* Sed Musis fortuna obstat, brevis illa voluptas  
 Tum retrò fluere, adversusque evolvier ordo:  
 Nam Furiaë vetuère moras, invasit Erinnyes  
 Campos, alternusque animas demessuit ensis.  
 O, Monstrum *Pani* invisum, atque obsœnior Ursâ,  
 Seditio Pestis! per Rura hinc cominus atque hinc  
 Pastoresque ruunt, pecorumque ignobile vulgus.

*Thyr.* Jam *Pani* devota fides Te, *Galle*, lacessit  
 Ad partes, laterique hæret delecta Caterva,  
 Fælix turma, duo Juvenes! Vos conscia virtus

Incitat,



Incitat, & pietas fucatæ nescia fraudis:

Vos Martis terrorem inter campique labores

Mens eadem tulit, & per casus mille coegit

Fata inimica sequi; seu fors incerta juberet

Aut unâ superare, aut pulchræ occumbere morti:

O, Patriæ spes magna! O, duri in turbine belli

Nusquam victa cohors! O, turba haud millibus impar!

*Cor.* Sed jam canus amor, vicibusque infractus iniquis

Atque extremum emensus iter, cadit; ultima nodum

Avulsit fors Urnæ, & inexpugnabile bello

Dirupit vinclum: feros descendus in annos

Interiit (1) *Celadon*; quo non præstantior alter,

Nec potior Judex (quoties *Melibæus* & *Ægon*

Certavere unâ, atque alternâ lite cadentem

Divisere diem) Divinæ oracula Legis

Sacrasque ambages, & cæca ænigmata solvit.

Tu comes, heu nimium fidus; Tu proxime cœlis

Succedis, *Galle*; En & languet (2) *Myrtilus* alter

Et senio & morbo, super alstra futurus Amicis

Jam socius: dolet Ille inimicæ tædia lucis

Ingratasque moras. Quanquam, O si Numina hæcant

Singultus *Rhedycina* tui; Vos altera demùm

1. *Vir* Rev. Rich. Allestry S. S. T. Profes. Regius, & Coll. Æton. Præ-  
fectus. 2. *Rev. in Chr. Pater* Johan. Fell-Episcop. Oxon. & Ædis Chri-  
sti Decanus.



Pignora, Dii, servate, & magnis parcite fata

Reliquiis. —————

*Thyr.* At Vos nec fatum, meritorum aut immemor ætas  
 Dissimiles unquam arguerit; Vos una tabella  
 Vos tres una refert famamque æterna loquetur  
 Pictura: En! ut vicinos sub imagine vultus,  
 Jussit amor spirare, & eâdem vivere cerâ.  
 Fortunatæ animæ! primis adolevit ab annis  
 Jam matura fides, vobis & fœdera sanxit  
 Multa dies, junctasque exhausta pericula dextras.

*Cor.* Quali Marte pares in castra adversa ruistis,  
 Atque avidi pugnæ, per mistos pulvere campos,  
 Perque globos ignesque, & quâ densissimus urget  
 Impetus! At quam pene die cecidistis in illo,  
 Cùm medios hostes inter temerarius ardor  
 Tercentum rapuit Juvenes; tum milite fuso  
 Ensesque, insidiasque, alato & fulgure glandes  
 Fervere vidistis: nimix tum prodigus iræ  
 Sæviit hostis, & ibat ovans latè agmina circum  
 Musarum spolia indutus. Sed Te tua, *Galle*,  
 Defendit virtus, medioque è turbine magnis  
 Eripit illæsum auspiciis fortuna, futuri  
 Grande ævi pretium. (*Th.*) Quin nunc age, cardine verso  
 Diffugiunt, *Corydon*, nubes, & flore superbit

Rursum



Rursum lætus ager: supplex per rura colonus  
 Agnoscit *Pana*, & latè nemus omne remugit  
 Io, *Pana* Deum! Tu jam sine tempora circum  
 Fælices errare hederas, Tibi, *Galle*, fereni  
 Indulgent cœli; Teque ambit pacis amœnæ  
 Intemeratus honos, atque inviolabile pignus.

*Cor.* O, nostro dilecta Deo, & certissima *Galle*  
 Cœlorum cura! O, sacros hæud immemor unquam  
 Ritus asserere! ô quoties ardente tumultu  
 Pastorum, cum nunc auderet cæca Juventus  
 Sceptra affectare, atque æternos *Panis* honores:  
 Tu fluctus sedas, tibi fandi copia torrens  
 Incantat rabiem, & gliscentes temperat iras.  
 Talis vel Zephyri, vel blandior aura Favonî,  
 Si forte aspiret, tum gaudet mutua silva  
 Inclinare apicem, & facili se flectere nutu.

*Thyr.* Neglectas inter valles tibi, *Galle*, loquenti  
 Auscultant pecudes, arrectisque auribus hærent  
 Suspensæ; tu Pastorumque oviumque sequaces  
 Huc illuc mulces animos, Tibi flumine lento  
 Hyblæis vox mista favis, cum roscida mella  
 Sudant, & liquido distillant nectare quercus.

*Cor.* Tale tuum carmen, qualis molli incubat herbæ  
 Aut roris gemma, aut acclivi in tramite murmur



Lene cadentis aquæ: Quin vos jam flete capellæ,

Custodesque, agrique, & tu resonabilis Echo:

Jam vox ista filet, vicibus quam sæpe solebas

Alternis iterare, horæque involvit acerbæ

Longa quies *Gallum*, æternisque immiscuit umbris.

Sam. Jones,

Tho. Chester,

} Armigeri è Coll. Mert.

SCHOLÆ



SCHOLÆ  
Westmonasteriensis

## DESCRIPTIO:

A D

Reverend. in Chr. Patrem &amp; Dominum

THOMAM,

*Episc. Roffensem, & Eccles. Colleg.  
Westmonast. Decanum.*

**M**E Pia, me memorem Charæ Nutricis Alumnum  
Dilectos monuit Clio celebrare Penates,  
Et dare mansuræ nota incunabula Famæ.

Tu modò, Musarum Columnen, quo pendet ab uno  
Gloria, & augusti spes inclinata Lycæi,  
Tu, qui tendentes duri ad fastigia Pindi  
Exemplo accendis juvenes, & lenta Tuorum  
Despicias ex alto, & longè vestigia rides,  
Summo Ipse innitens apici, impavidusque ruinæ;  
Tu modò, da faciles Musas, & dirige cursum.

Qua



*Fanum S. Petri* ] Quà juxtà Thamesin, se tollit in æthera  
*Westmonast.* ] Moles,

Cæsaribus benè nota Domus; seu donet ovantes  
 Regali trabeâ, seu servet fida repostos,  
 Et Sceptri, & Cinerum pariter certissima Custos;  
 (Hos fera ingeminet luctus, hunc fera triumphum)  
 Hîc ubi porrigitur longus sub fornice trames,  
 Qui Tempia à tergo claudens sinuatur in Austrum;  
 Hîc ubi porta patet, verso obice, panditur ingens  
*Musæum.* ] A lævâ limen; Pariisque innixa Columnis  
 Marmora, tornatæque trabes, laquearque superbum;  
 Mœniaque artifici multùm debentia dextræ.

Talem si Siculo donâssent æqua Tyranno,  
 Talem Fata Scholam; patrias fælicior exul  
 Despiceret sedes, & parva palatia Regum.

Mox ubi sepositis aperitur janua valvis,  
 Ut primùm ante oculos fervet numerosa juvenus  
 Turba Silens; intenta operi, nunc dicta Magistri  
 Aure bibens pronâ, nunc alto in pectore condens,  
 Pythagoram remeâsse negas, Samiosque Nepotes?

Sed quò se ducat meliori tramite Clio,  
 Et regat immensum vestigia certa per æquor;  
 Signat iter dubium, & lustrat justo ordine *Classes.*

1. *Class.* ] Hîc aditu in primo, studiis accenditur infans

Æmulus,



Æmulus, amotamque ardet contingere metam;  
 Et septem à cunis qui vix numeravit aristas,  
 Romanas voces, primæ tentamina linguæ  
 Dimidiat, doctæque edit præludia Suadæ.

Sic teneros olim eduxit Cornelia Gracchos  
 Infantes facunda parens; dum didita circum  
 Fama vocat Proceres, admiraturque Senatus  
 Præcociis Eloquii vires, Cunasque disertas.

2. *Class.*] Mox, uti cum pedibus se credit debilis infans,  
 Et summis instat plantis, benè sedula Nutrix  
 Tarda Ariadnæo firmat vestigia filo;  
 Ne quæ transversum titubet, pronusve feratur:  
 Sic ubi distantem certatim attingere Romam  
 Nituntur juvenes; ne fortè per avia tendant  
 Incerti, & duris illidant crura salebris,  
 Præbet Aristarchus normam, & data regula certum  
 Signat iter, solidatque gradus, & firmat euntes.

Intereà aut facilis teritur post prandia *Naso*,  
 Aut lepida *Æsopi* ridetur fabula, utrinque  
 Et lactare animum, & mores formare parata.

3. *Class.*] Nec tantum volvit veteres ignava Poetas,  
 Concipit ipsa intus flammæ, fervetque juvenus;  
 Agnoscitque Deum; & facili sua carmina venâ  
 Qualiacunque potest, saltè mediocria condit,

Quæ



Quæ facilis laudet judex, non arguat æquus,  
 Quæis meliora Maro, Bavius pejora sonaret.

His sensim gradibus formavit Mantua Vatem,  
 His & Smyrna suum; paulatim ad culmina Pindi  
 Carpendum est iter, & sua habet cunabula Pallas.

Hic interpositus gemini maris arbiter Isthmus  
 Sistitur, & diffusa aditum Cortina recusat;  
 O testis studii Cortina, & doctior illâ  
 Quam Delphi stupuere olim, quæ conscia Phœbi  
 Secretas voces, & certa oracula fudit.

4. *Class.*] Hactenus Ausoniâ pubes sudavit arenâ,  
 Et tandem (heu longo) summa ad Capitolia cursu  
 Evehitur, mediâque locat vexilla Suburrâ:  
 Vicinus ingeminant læti; jam Roma curules  
 Insequitur devicta, alias captivus in oras  
*Nasô* redit; nosterque *Maro* est: Te, *Flacce*, tenemus  
 Invisi Britones; Vosque, ô par nobile Vatum,  
 Pellibus exiguis, unoque volumine clausi,  
 Vos nox, & piceæ nequeunt celare tenebræ.

Non tamen hæc turmam Victoria reddit inertem,  
 Securamque sui; longè trans Itala regna  
 Urget iter, tentatque vias, & tendit Athenas.

5. *Class.*] Cecropiæ cedunt arces, sua mœnia tradit  
 Victori Pallas; captâ dominatur in Urbe



Exultans juvenis; Teque, ô spes ultima Graiûm,  
Teque, Tuamque capit, longa ante decennia, Trojam.

Pergendum est Solymas; facilis Judæa repandit  
Immensas, quas servat opes; nova munera donat  
Intellectus Arabs, gazasque repandit Eoas.

Et tandem quis limes erit? quò vivida pubes  
Expatiat ovans; fixæque ignara Columnæ,  
Thulenque extremam, & Calpen post terga reliquit?

6. *Class*] Sistit paulisper cursum, & (quia parta tueri  
Est labor, & melius parent Cultoribus arva,  
Quæ longum subigit vomer, quæ frangit aratrum)  
Saxum volvit idem, & noto se versat in orbe,  
Et citiore iterum relegit vestigia passu.

Interea flammâ propiore accendit Apollo  
Fælices puerorum animos, & percutit œstro:  
Jam furit, & subitum fundit turba Enthea carmen,  
Neglectum carmen; sed quod culpâre severus  
Vix possit Momus, vix carpere Zoilus aufit.

Sic, sive id casu fiat, seu numine Phœbi,  
Se certo pede verba ligant; sic arte remotâ  
Sponte suâ numeros voces formantur in aptos.

Sic Epicure Tui coeunt vaga semina Mundi;  
Fit lapis ipse sibi faber, & sine legibus, ultrò  
Sese informe Chaos pulchrum glomeravit in Orbem.

Nunc



7. *Class.*] Nunc tandem summi Juvenis fastigia montis  
 Occupat, & bifido figit sub vertice sedem;  
 Et meliùs recolit notas, & promovet artes.  
 Seu nunc indulget Phœbo; fruiturque Deorum  
 Colloquio Musisque suis; seu rostra disertus  
 Conscendit, magnique quatit *Demosthenis* arma;  
 Seu vires *Numerorum* operoso examine pensat,  
 Et Samii Siculique senis non negligit artes:  
 Cursusque æthereos notat, & metitur Olympum.

His demùm exactis studiis, hoc orbe laborum  
 Expleto, doctæ sua reddere præmia publi,  
 Et donare rude emeritos, & tradere palmam,  
 Aut forte antiquo segnes includere ludo,  
 Hoc, Pater, omne Tuum est; Illis dat *Granta* coronam;  
 His *Rhedycina* parat; quæ me manet utra? vel ulla?  
 Te penes augurium est; certam tu dicere sortem,  
 Phœbe, potes, qui fata Regis, qui conjicis urnam.

————— Scholæ  
 Westmon. Regius Alum.

*CARMEN*



## CARMEN

## In OBITU

## AUGUSTISSIMÆ

ET

## DESIDERATISSIMÆ

## REGINÆ

## MARIÆ,

*Anno 1695.*

**P**OST fractas *Gallorum* iras, animumque subactum  
*Borbonii*, avulsasque hostili vertice *Laurus*;  
 Dum *Rhodano Nassavus* ovat, manesque cruore  
*Auriacos* placat, ruit & victricibus armis  
 Mortem inter mediam, & commissa tonitrua fumo,  
 Te rapit è mediis mors immatura Triumphis,

O!



O! *Venus* haud impar, neque *Marte* indigna Marito.

Prima per ignotum sparlit contagia vulgus  
 Dira lues; longum exiguis contenta trophæis,  
 Egit ubique humiles, nondum metuenda, triumphos.  
 Mox altè assurgens, tetrasque licentiùs auras  
 Invadens, toto se immiscet noxia cœlo,  
*Cæsareasque* gravi sufflamine polluit arces;  
 Privatum indignata rogam, tenuisque sepulchri  
 Gloriam inobservatam, & vix memorabile funus.  
 Omnibus hîc instructa dolis, junctisque venenis  
 Atque mali secura fui, per mille nocendi  
 Artes progreditur, repetito & vulnerat ictu.  
 Intereâ *Regina* haurit spirabile virus,  
 Exitiumque ignara trahit, mortemque futuram.  
 Jamque artus teneros depascitur ignea febris,  
 Formosum pendet caput, & cruciatibus ægris  
 Torquetur cerebrum, lumbique dolore gravescunt.  
 Purpureis maculata notis, & lurida turgent  
 Pectora, flagrantique rubent incendia pelle.  
 Nunc frontis divinus honos, nunc læta genarum  
 Purpura marcescit, solitos non spirat amores  
 Vultus, & innocuis languescunt lumina flammis.  
 Quam Tibi dissimilis! quantum O! mutaris ab Illâ,  
 Quæ modò per populum *incedens Regina*, coruscis



Mille necesse sparsisti oculis, & lucida tela!

Ast Tibi nunc formæque æterna obducitur umbra!

Nec via mortis erat simplex, sed fœdere juncto

Mista venena fluunt, regnantque impunè per artus

*Pæoniam* indignata artem, succosque potentes.

Quinetiam sanies squalenti fluctuat atra

Sanguine, corruptisque exæstuat ossibus ignis.

Per cutis excoquitur spiracula tabidus humor,

Nativoque tegit crustatum tubere corpus,

Perpetuo & nitidas Veneres velamine condit.

Haud secus ac quæ stella diu volventibus annis

Immensum in toto diffuderat æthere lumen,

Gloria cœlorum, mundo nec inutile sydus,

Cui longo innatas expressit tempore fordes

Multa dies, variusque ordo mutabilis ævi,

Ingenitâ nocte, & spisso se obnubit amictu,

Concretasque subit maculas, radiosque diemque

Subducens, tacitas premit intra viscera flammæ.

At Tibi nunc vanos temerè molimur honores,

Exequiasque Tuas, & non violabile bustum

Sacramus Musis, & inani munere versûs.

Et Tu jam posthac miserum plorabere funus

Gens quacunque suos egit *Romana* triumphos;

Te flebit vel tristis *Arabs*, & inhospita *Turca*

Pectora,



Pectora, inassuetisque ferox nunc *Persa* dolebit  
Luctibus, & *propriis* discent mansuescere linguis,  
Dum procūl emittit doctas *Rhedycina* querelas,  
Lugens mille sonis, & *multiplici* ingemit ore.  
O! nunquā ploranda fatis venerabilis Urna!  
Vel *Patri* deflenda Anima! & quam *Regius exul*  
Deploret, lachrymisque senilia proluat ora  
Dum *Natam* reputat, licet Illi mente resurgat  
Amissum Imperium lapsique infamia sceptri.

Quin *Te* pænè *Tuæ* junxit *Gulielme, Mariæ*  
Et cineres amborum unā commiscuit urnā  
Execranda dies, & ineluctabilis hora.  
Quos etenim impatiens volviſti corde dolores!  
Quosve dedit gemitus non enarrabile pectus!  
Cū vitam exhalantem, & fati angoribus actam  
Extremò amplexus, moriturus & *Ipsæ Mariam*,  
Tristis inhæſiſti dilecto oneri, oscula libans  
Suprema, & captasti animam super ora vagantem:  
Ut *Te* præcipitem luctu pius abstulit error!  
Ut Furiis agitavit Amor! cui mille ruinæ,  
Stridentesque Globi, & displosa tonitrua flammis  
Non poterant terrere animum, *Tua fata, Maria*,  
Incutiunt propiora, magisque pericula tangunt.

Verūm O! jamdudum fatis actum est Funere tanto,

Nec



Nec Superi nostris majora *Piacula* poscunt  
 Criminibus, si quid *Pietas* Divina labores  
 Respicit *Angliacos*, Tu cœlo inserta *Maria*  
*Cæsaris* esto Tui memor, atque intende *Britannis*  
 Pervigiles curas, quæis acti *Marte* secundo,  
 Auspiciis moveant semper fœlicibus arma,  
 Et nostris lætare, ut quondam assueta, Triumphis.

At Tu lapsuri, *Princeps*, spes unica regni,  
 Tu *Nassave*, Tuâ quamvis viduate *Mariâ*,  
 Abstineas fletu, & vanis nunc parce querelis.  
 En! quæ turba Tui repetit connubia supplex,  
*Cæsareique* tori *Geniales* ambit honores!  
 Quin age, fume animos, & luctum discute fronti,  
 Fata *Tuos* vel adhuc maneant meliora *Britannos*.  
 Ecce! occulta tumet lumbis ventura propago,  
 Et nondum nati *Heroes*, & *Regius* Ordo!  
 Quodque *Maria* negat sceptro dabit altera *Conjux*.  
 Ut Tibi cum totâ se tradit *Iberia* Gente  
 Fœmineâ, *Austriacæque* optant *Diadema Britannum*!  
 Ipsaque nunc sperat gratum sibi *Gallia* lectum,  
 Formosafque ostentat opes, & *Præmia* pacis.

Sydereo sic cum folio *Saturnia* cessit  
 Paulisper Terras, propriumque invisere Templum,  
 Dilectamque *Samon*; stat circum turba *Dearum*



Optato stipata *Jovi*, dum quæque vocari  
*Juno* ambit, fierique cupit Regina Tonantis:  
Certant Divæ mille, atque Immortalia poscunt  
Gaudia, & *Æterni Sponsalia* munera Regis.

Henr. Sacheverel,  
A. M. è Coll. Magd.

Machinæ



## Machinæ Gesticulantes,

## A N G L I C E

*A Puppet-show.*

**A**dmiranda cano levium spectacula rerum,  
Exiguam gentem, & vacuum sine mente popellum;  
Quem, non surreptis cœli de fornice flammis,  
Innocuâ melior fabricaverat arte *Prometheus*.

Compita quâ risu fervent, glomeratque tumultum  
Histrion, delectatque inhiantem scommate turbam;  
Quotquot lætitiæ studio aut novitate tenentur,  
Undique congressi permissa fedilia complent.  
Nec confusus honos; nummo subsellia cedunt  
Diverso, & varii ad pretium stat copia scamni.  
Tandem ubi subtrahitur velamen, Lumina passim  
Angustos penetrant aditus, quâ plurima visum  
Fila secant, ne, cum vacuo datur ore fenestra,  
Pervia fraus pateat: mox stridula turba penates  
Ingreditur pictos, & mœnia squallida fuco.  
Hic humiles inter scenas, angustaque claustra,



Quicquid agunt homines, Concurfus, Bella, Triumphos,  
Ludit in exiguo plebecula parva Theatro.

Sed præter reliquos incedit *Homuncio* raucâ  
Voce strepens; major subnectit fibula vestem,  
Et referunt vivos errantia lumina motus;  
In ventrem tumet immodicum; ponè eminet ingens  
A tergo gibbus; Pygmæum territat Agmen  
Major, & immanem miratur turba Gigantem.  
Hic magnâ fretus mole, imparibusque lacertis  
Confusus, gracili jactat convitia vulgo,  
Et crebro solvit, lepidum caput, ora cachinno.  
Quanquam res agitur solenni seria pompâ,  
Spernit sollicitum intractabilis Ille tumultum,  
Et risu importunus adest, atque omnia turbat.  
Nec rarè invadit molles, pictamque protervo  
Ore petit Nympham, invitoque dat oscula ligno.

Sed comitum vulgus diversis membra fatigant  
Ludis, & vario lascivit mobile saltu.

Sæpe etiam gemmis rutila, & spectabilis auro,  
Ligna gens prodit, nitidisque superbit in ostris.  
Nam, quoties festam celebrat sub Imagine lucem,  
Ordine composito Nympharum incedit honestum  
Agmen, & exigui Proceres, parvique Quirites.  
Pygmæos credas positis mitescere bellis,



Jamque, infensa Gruum temnentes prælia, tutos  
Indulgere Jocis, tenerisque vacare Choreis.

Tales, cùm medio labuntur fidera cœlo,  
Parvi subsiliunt Lemures, populusque pusillus  
Festivos, rediens sua per vestigia, gyros  
Ducit, & angustum crebro pede pulsat Orbem.  
Manè patent gressus; hinc succos terra feraces  
Concipit, in multam pubentia gramina surgunt  
Luxuriam, tenerisque virescit Circulus herbis.

At non tranquillas nulla abdunt nubila luces,  
Sæpe gravi surgunt bella, horrida bella, tumultu.  
Arma cient truculenta Cohors, placidamque quietem  
Dirumpunt pugnae; usque adeo insincera voluptas  
Omnibus, & mistæ castigant gaudia curæ.  
Jam gladii, tubulique ingesto sulphure foeti,  
Protensaque hastæ, fulgentiaque arma, minæque  
Telorum ingentes subeunt; Dant claustra fragorem  
Horrendum, ruptæ stridente bitumine chartæ  
Confusos reddunt crepitus, & sibila miscent.  
Sternitur omne solum pereuntibus; undique caesa  
Apparent turmae, Civilis crimina Belli.

Sed postquam insanus pugnae deferbuit æstus,  
Exuerintque truces animos, jam Marte fugato,  
Diversas repetunt artes, curasque priores.



Nec rarè prisca Heroes, quos Pagina sacra  
Suggerit, atque olim peperit fœlicior ætas,  
Hic parvâ redeunt specie, Cano ordine cernas  
Antiquos prodire, Agmen venerabile, Patres.  
Rugis fulcantur vultus, proluxaque barbæ  
Canities mento pendet; sic tarda Senectus  
*Titbonum* minuit, cùm moles tota Cicadam  
Induit, in gracilem fensim collecta figuram.

Nunc tamen undè genus ducat, quæ dextra latentes  
Suppeditet vires, quem poscat turba moventem,  
Expeditam. Truncos opifex & inutile lignum  
Cogit in humanas species, & robore natam  
Progeniem telo efformat, nexuque tenaci  
Crura ligat pedibus, humerisque accommodat armos,  
Et membris membra aptat, & artubus insuit artus.  
Tunc habiles addit trochleas, quibus arte pusillum  
Versat onus, molique manu famulatus. inertî  
Sufficit occultos motus, vocemque ministrat.  
His structa auxiliis jam machina tota peritos  
Ostendit fulcos, duri & vestigia ferri,  
Hinc salit, atque agili se sublevat incita motu,  
Vocesque emittit tenues, & non sua verba.

Jo. Addison, è Coll. Magd. A. B.

Neptuni



## Neptuni Vindicta:

S I V E

*\* Inedia Undecim Dierum.*

Vicerat Hesperios fluctus & præpete Curfu  
Oceani fines audax fulcaverat Alnus:  
Nec tulerat Phœbo visas, ipsasque negatas  
Esse sibi terras hominum labor. Ergo parantur  
Et Soli comites: Hi quicquid fabula Vatum  
Finxerat hoc cernunt; dum non mendacia possunt  
Verorum superare fidem: Naturaque doctis  
Lusibus exæquat proprias Erroribus artes.  
Quodcunque arcanum gremio studiosa recondit  
Diva parens rerum, conversa in mille figuras,  
Ignotas pecorum formas speciesque ferarum,  
Incultos terræ tractus, & monstra virorum  
Conspiciunt, & dum spectant Nova monstra putantur:  
Per mare discurrunt & terræ pensile pondus,  
Adversoque vident surgentia sidera Cœlo:  
Hispanasque ultra metas extenditur orbis,

\* Vide N. Tulpii *Observat. Medic. Lib. I. Cap. 43.*



Nec claudit nostri *Betis* confinia Mundi.

Jamque adeò præceps nobis audacia crevit,  
Ut scisso pateat contritus tramite Pontus;  
Nec melius veteres transibant Flumina, fregit  
Hellepontiacos melius vel Navita fluctus,  
Odrysiam quoties mutaret Seston Abydo;  
Quam terræ nobis fines, & diffita longis  
Littora *Neptuni* spatiis, fluctusque domantur  
Puppibus; & fiunt ipsi ludibria venti.  
Non tulit hoc ultrà pelagi Deus. Ergone vestris  
Nullus erit finis cœptis, ait? Impetus iste  
Quo ruet? haud impune mihi hæc injurius Orbis  
Inferet, hæc campis steterat modò silva Britannis,  
Quam fera in Occiduo nunc excipit India portu:  
Jamque suo major fato, & spumantibus Undis  
Classis adest, fluctus tempestatumque labores  
Irridens; licèt optatâ potiantur Arenâ,  
Non impune ferent. Fremitu vix talia fatus,  
Conspicit audaces ponti per cærula Nautas  
Exiguâ ferri cymbâ, sociisque relictis  
Et portu, Oceano tenui insultare Carinâ  
Curarum vacuos, ut qui modò summa legebant  
Littora, confisque suis successibus omnes  
Dedidicere metus: non illic fercula Mensis

Portantur,



Portantur, plenisque cadis Vindemia fervet.

Septem turba fuit, turba heu! non digna Deorum

Vindictâ, aut tantæ quæ sese opponeret iræ,

Non remis agitare salum, dare carbasa ventis,

Luçtari & contra surgentes scandere fluctus.

Nec satis hoc lenire Deos, injuria menti

Fixa sedet, vindexque animis ardescit Enyo.

Nec mora: crudelis cæcâ sese Æolus arce

Exerit, emittitque suos in prælia ventos;

Eripiturque à sole dies, obductaque velo

Cœlorum facies, rapidis nox fluctibus astra

Miscuit, & solæ veniunt à fulgure flammæ.

Nec perdunt rabiem flatus, non Africus Euro,

Non istic Aquilone Notus luçtatur, in unam

Tempesta proram incumbit, facilemque Carinam

Abripuit, portusque oculis & terra recessit.

Et jam quassa altum tenuit Ratis, undique Cœlum,

Undique Pontus adest, metuit dubiusque requirit

Navita, propulerit recto num Carbasa cursu

Ventus, an obliquo distorsit tramite Vela.

Incumbit gravior clades, cœloque furenti

Majorem extimuerè *famem*; malè cæca futuri

Turba, cibum cœnæ qui vix suffecerit uni

Diducunt, timidique uno consumere luxu,



Divisere dapes, Epulasque in frustra resolvunt.

Jamque quater reduci lustrarat lumine Phœbus  
Adversas nostris terras, nobisque reluxit  
Iratu toties, nostrumque reviserat orbem.  
Nondum *vera fames*; nec in hos duraverat una  
Cœna dies tantum, miseris etiam altera mensæ  
Pars levior superest, quærunt stomachumque sitimque  
Fallere, & arenti Cyathos hic rejicit ore,  
Ille reluctanti ambefas de faucē revellit  
Sæpe dapes, durusque animi Jejunia perfert,  
Dum vitare cupit, serò malè providus ipsum  
Quod metuit patitur. Fælix magis ipse videtur  
Tantalus, huic semper mensæ fluviusque parati.

At postquam variis Titan per Cærula flammis  
Luserat, & rutilos rediens vibraverat ignes:  
Projiciunt super alta oculos, fluctusque pererrant  
Lumine, at ingratos tantum dant cernere fluctus  
Crudeles flammæ, non hâc spumantia cautes  
Æquora dilacerant, non illac tubere terra  
Propendet, solæ magnâ se mole procellæ  
Devolvunt tractuque acies abrumpitur undæ.

Nec satis est timuisse *Famem*, *Fame* sævior ipsâ  
Tam tenuis cibus; at tandem frugalibus istis  
Reliquiæ deerant mensis, victusque canistris

Deficit,



Deficit, & luxus subeunt Jejunia Nomen.

Et nunc triste malum exiles grassatur in artus,  
Undique natus membra exiccaverat ignis;  
Et sua præstabat propriis alimenta ruinis.  
Jam tandem decimus Sol mœsto illuxerat igne  
Ex quo defecere Epulæ, exanguique coronâ  
Pallida turba sedet, squalentique horrida vultu,  
Membra premit pestis, torpent cava lumina, fauces  
Arentes, torvi vultus, cutis aspera, venter  
Flaccidus, & magnis prodibant artubus ossa.  
Non alia Exangues faciunt spectacula Cives  
Cocyti, quoties taciti Regnator Averni  
Concilium deforme vocat: magis horrida nusquam  
Artibus aut Medicis corrasa Cadavera pendent,  
Attonitas quoties terrent nuda ossa puellas.

Quæ miseros sufferre mala? & quæ fata coegit  
Vitæ dirus Amor? cur non tam flebile pondus  
Innectunt nodis, elisaque guttura frangunt?  
At si è vorticibus Ponti propiora videntur,  
Hinc sint fata, sitisque undis extinguite flammæ.  
Sed quoniam mortes istæ mollisque levisque  
Fœmineique animi, date apertis faucibus enses,  
Atque uno vitam & luctus discindite ferro.  
Quò transcribuntur Miseri? quò cesserat ista

Parcarum



Parcarum pietas? Morbis dum stragula lassi  
 Discutiunt alii, & febrim patiuntur & ignes,  
 Mors ipsis tandem æqua venit, non subvenit unda  
 Ulla siti, miseris tabescunt membra, nec istis  
 Pœna minor, non posse mori, sint lenia quanquam  
 Flumina venarum, & lento se circulet amne  
 Sanguis, & exili signet vitæ ultima motu.

Jamque importunus languentia corpora vexat  
 Extimulatque dolor; mensisque epulisque relictis  
 Nunc inhiant jugulis, fociisque in vultibus hærent.  
 Nec dolor elinguis fuerat, quippe ausus & istud  
 E miseris aliquis facinus, vehementior ignis  
 Cui spirat venis & deprædaverat artus,  
 Quò Comites, ( inquit ) versatis lumina? non est  
 Muta Fames, quamvis sonitus atque ora premantur:  
 Inque vicem vosmet votis oculisque voratis.  
 Sed nec inhumani lances, & Mensa superbi  
 Nostra Thyestis erit, fiunt hæc crimina plenis  
 Et saturis; at nos sic deliquisse necesse est,  
 Peccamus fato, Parcisque jubentibus ipsis.  
 Sed quid vestra ego vota morer? nec dicere plura  
 Mors patitur propior, nulloque humore rigatus  
 Aeris alternos angustat Pulmo Meatus.  
 Ergo agite, iratis cadat unus victima Divis,



Communem redimens privato Sanguine Vitam.  
Fælicemque illum quem destinat Alea Fato,  
Et tandem dat posse Mori! Ter terque beatum  
Qui clade accrescit, per senaque corpora fusus  
Multiplici vivens animâ Tumuloque superstes!

Dixerat: extemplo Sortes mittuntur in Urnâ,  
Consiliique duci fatalis Calculus exit:

Et fontem pœnæ constantia fata reposcunt:

Sic olim Sículus letho tormenta Tyrannus

Imbuit artificis, gemitusque Perillus in ære

Edidit ipse suo, Taurique emugit ore.

Ille tamen lætus fatis hæc ore profatur:

Vicerunt jam Vota Metum, vestræque salutis

Victima succumbo; fælix defunctus Amicis

Qui possim prodesse meis: nec Parca timetur,

Accipite hanc animam, & nostrâ ex hoc vivite Morte.

Vix hæc, nec potuit jam plura; ecce impius alter

Involat in jugulum, dat vulnera, vimque volenti

Ingerit, at nondum lethalem evulserat ensen,

Procumbunt in prædam omnes, olimque voratæ

Luminibus toties, veniunt in Viscera Mensæ.

Nec coëunt Pudor atque Fames, dum sanguine fumant

Semineces artus, & adhuc luctantia membra

Præda avidis fiunt, saturi jam morte, sodali

Dant



Dant vivos tumulos, fimilique in viscere condunt.

Has epulas rabiemque virum ut *Neptunus* ab alto  
 Conspexit, torvum ridens hæc ore profatur:  
 Sat pœnis iræque datum, sat cognitus orbi  
*Neptuni* furor est. Aras ventura Nepotum  
 Turba illæsa meas timeat, tremefactaque tantis  
 Exemplis parvæ peragret freta pervia cymbæ.  
 Jam tandem in pœnis facilis mitisque videtur  
 Jupiter; humanas mutare Lycaona formas  
 Jufferat, & villis hirtos obduxerat artus.  
 Ingeniosa mihi magis est Vindicta, Ferarum  
 Humanâ per me latitant sub imagine formæ,  
 Inque hominem migrat vel bellua. Siqua *Leænæ*,  
 Siqua *Lupi* feritas, vel siqua est *Tigridis* ira,  
 Unâ jam coit hæc, eodemque in Corpore regnat.

Vix ita, proscindens cùm *Cærula*, puppis ab alto  
 Conspicitur, *Batavum*que gerens in culmine signa  
 Applicuit propius, tantæ miserataque Cladis  
 Speratis dederat pelagi ludibria terris.

*Phil. Fell, Omn. Anim. Soc.*

FRAUS



## FRAUS

## Nummi Anglicani:

*Anno 1696.*

**E**ST imâ sub mole domûs Spelunca, frequenti  
Uda cado, cui Frigus iniquos utile Soles  
Propellit, *Bacchumque* inimico protegit æstu.  
Hic quem Sors dura, aut Nummorum foeda Libido,  
Aut Luxus finxere Fabrum (nam credere cœlo  
Non audet facinus) Vulcania subdolus arma  
Exercet, cæcisque agitat sub sedibus artes.  
Hic Focus, & Flammæ; hic candenti Lympha metallo  
Stridet, & exiguis animantur follibus Ignes.  
Nec minùs in toto procumbit plurimus antro  
Malleus, & nitidæ splendent in pariete limæ.  
Protinus Orbiculum, qui cunctos maximus inter

*Edvardi*



*Edvardi* facie, magnæve superbit *Elisæ*  
 Occupat, extremamque tenaci forfice massam  
 Furatur, tenuem mordens à margine prædam.  
 Illa Eadem, infestam quæ nostro ex æquore classẽm  
 Depulit, & *Britonum* radentes littus *Iberos*  
 Bellatrix, parvis finit Ipsa in finibus hostem  
 Sævire, & proprium populare licentiùs Orbem.

Exemplò alternans alienâ merce resectos  
 Sacrilegus mutat Nummos, spargitque per urbem  
 Laminulas curtas, defraudatumque metallum.  
 Dein antrum petit, infunditque fluentia falso  
 Æra Typo, insolito quæ partu nata repentè  
 Emergunt Reges; alienum *Edvardus* honorem  
 Induitur, decoratque orbes inglorius æreos.  
 Dedecus Angliaco repetitum mœret ab hoste  
 Infælix *Carolus*, cui truncatùm Anglia quondam  
 Abstulerat caput, Illa iterans Opprobria Sacrum  
 Irridet Simulachrum, & vertice ludit ahenò.  
 At ne detegeret fraudes erepta figuræ  
 Canities, tritoque Seni renovata Juventus;  
 Perniciosa manus venerandi pondera vultûs  
 Effingit, Frontisque imitatur Dædala rugas:  
 Atteritur lævis facies, extremaque Barba  
 Pendet acutùm extans, denormat plurimus oram



Scilicet haud (quamvis cumulanda Pecunia mentem  
Sollicitat) falsis curat ditescere Nummis:

Haud fœnus quærit tam vile, nec anxius optat  
Ut solo gravis Ære domum sua dextra rediret.

*Josephus Trapp, è Coll. Wadh.*



Inficitur tandem, & fato succumbit eidem

Tota Strues: Dominus simulac ignobile pondus

Aspicit; heu! video tandem, sunt, credo, fugaces

Divitiæ, didicit mortalia fallere vota,

Et frustra humanas lactare Pecunia Mentis.

Hoc nuper (dubiæ ni lux nocturna fefellit

Candelæ) Argentum cepi, nunc vertitur æris

Deformem in cumulum, & vili splendore refulget.

Ceu quondam sub nocte (foco si credere dignum est

Fœmineo) exiles per opaca silentia Formæ

Discurrunt, tranantque jocosis lusibus umbras;

Hæ loculum Agricolæ stertentis divite complent

Somnio, & objiciunt falsi Simulachra metalli.

Ille rapit trepidans fallacem manè recenti

Thesaurum, ast avidam Taurinæ frustula pellis

Eludunt dextram; mirantem evanida Turba

Linqvit, & exiguum tollit lasciva cachinnum.

Haud nunc vexantur Merces, neque multa coarctat

Turba forum; in vicis jam murmure rara minori

Plebs fremit, & passim per compita tardior errat.

Jam malè proponens venum frumenta Colonus

Cessat, & incumbens pleno terit otia Sacco.

Visum è longinquo Debentem Creditor, horrens

Vitat, & in densum cautus se proripit agmen.

Scilicet



Scilicet haud (quamvis cumulanda Pecunia mentem  
Sollicitat) falsis curat ditescere Nummis:

Haud foenus quærit tam vile, nec anxius optat  
Ut solo gravis Ære domum sua dextra rediret.

*Josephus Trapp, è Coll. Wadh.*



In OBITUM  
Reginæ MARIAE.

Quid Divæ bustum pompâ decoramus inani?  
Quid vanos gemitus, & lamentabile carmen  
Fundimus, exigua ingentis solatia damni?

Quin potius stemus fixa acri turba dolore  
Circum udos fletu cineres, urnamque silentem  
Mariæ, tacitoque imitemur marmora luctu;  
Luctu, quo fractus, vicinâ morte rigescis

Nassaide, Sponsæque cupis comes ire sub umbras.

Heu Tibi nunc primùm torpent formidine membra,  
Nunc altè infixum stridet sub pectore vulnus,  
Sævit atrox cura, atque ingens dolor ossibus ardet.

Frustra Celtarum Te sanguine Mosa rubescens  
Vidit pulvereâ bellorum in nube tonantem,  
Si partas Libitina jubet deponere fronte  
Lauros, & mœstâ crines foedare cupressô;  
Si Martis duri merces, & dulce levamen

Maria,



*Maria*, heu! frustra optatis frigescit in ulnis;  
 Si moriens reducem media inter gaudia linquat,  
 Elyfiosque petat manes, heu! non tua conjux.  
 Illam non iterum attonita emirabitur Aula  
 Insolitum nitidis vibrantem fulgur ocellis;  
 Dira lues, nunquam sat detestanda Britannis  
 Distinxit pulchros maculis nigrantibus artus;  
 Idaliasque faces, arcusque, & lucida tela  
 Nox atra eripuit lethique inamabilis horror.

O si longa dies, si stamina iusta dedissent  
*Mariæ* sobolem enixæ, stabilire penates  
*Nassaidum*, lapsæque domûs fulcire ruinam;  
 O si Cæsareâ lufisset parvulus Aulâ  
*Auriacus*, Matrem qui redderet ore venusto,  
 Et virtute Patrem; tum non solaminis expers  
 Æternùm unius defleres *Anglia* funus:  
 Sed vetuit fatum, sed inexorabile pensum  
 Spem vanam elusit, florentesque abstulit annos.

At non cum gemitu, lugubri aut murmure, dulcem  
 Ægrè Diva animam exhalat; ceu pura columba,  
 Quam jaculum fixit stridens, aut missile plumbum,  
 Cervicem inclinat niveam, atque oblita querelæ  
 Labitur exanimis, vitamque relinquit in astris.  
 Augustæ non pompa domûs, non purpura luctum



Ponenda, accendit; rutilæ non tempora circum  
 Gemmæ, non sceptrum movet, aut diadema caducum:  
 Hæc invita tulit, sed non invita reliquit.

Vidimus orantem ante aras, oculosque decoros  
 Dejectam, atque pio fletu nitida ora rigantem,  
 Vidimus auxilio miseros opibusque juvantem,  
 Vidimus. — At Divæ virtutes obruit urnâ  
 Dura nimis lex fati, & non revocabilis ordo.

Quis nunc dum *Auriacus* meditatur vincla *Garumnæ*,  
 Et *Lodoice* tremis, *Britonum* Mavortia corda  
 Imperio placido, & blando moderamine flectet?  
 Quæ *Venus* ex acie redeuntem & pulvere tectum  
 Sanguineo, excipiet *Martem*, amplexuque fovebit  
 Molli, singultans; lacrymis fordesque decoras  
 Abluet, & medicis ficcabit vulnera lymphis,  
 Dictamnium spargens, & odoriferam Panaceam?  
 Tu sola *Auriaci* poteras lenire labores,  
*Maria*, Ille tuis precibus devictus, ad hostes  
 Cautior accessit; nunc mille pericula quæret,  
 Anxius & *Senonum* in medios ruet obviis enses.

Quid referam everfas turbato in gurgite classes  
*Borbonias*? En cæde ardent, lateque relucet  
 Fulgure sulphureo, & tonitru maria alta tremiscunt!  
 Seu *Maria* colos, & pendula stamina ducit,



Seu textit pictas auri subtemine vestes,  
 Illi Neptunus domitor maris, omnia jura  
 Et pelagi imperium cedit, fœvumque tridentem.

Atque utinam superesset adhuc, nec flebilis umbra  
 Lætitiâ insolitam *Celtis* animosque dedisset;  
 At licèt *Auriacus* gemitu æger languet inertî,  
 Mox lapsæ surgent vires, animosaque surget  
 In *Gallos* rabies, & vitæ prodiga virtus.

En! iterum cerno spumantem sanguine *Mosam*,  
 En acuit dolor iram! En! implacabilis ardet  
*Nassides*, metit ense acies, latumque per agmen  
 Limitem agens, toto grassatur in æquore Victor.

Sic leo venantûm percussus vulnere fœvit.  
 Acriùs, horrendûm frendens, fetasque comantes  
 Erigit; accenso major violentia gliscit:  
 Mox ruit in turmas, & toto fervidus arvo  
 Nunc hos, nunc illos discerpit; viscera passim  
 Effunduntur humi divulsa, & lubrica tellus  
 Cæde rubet morientûm, & rorat sanguine campus.

G. Adams, Ædis Chr. Alumnus.

MEMO-



MEMORIÆ  
BEATISSIMI PATRIS  
JOH. FELL,

*Olim Episc. OXON.*

ET

ÆDIS CHRISTI *Decani.*

*Cum ipsi Monumentum poneretur.*

**O** Viva solers Marmora sculptili  
Dolare ferro, qui lapidem sacrum  
*Fello* reponis, sæpe doctis

Sæpe piis oculis legendum;  
Eia arte diam canitiem Senis,  
Vultumqueingas simpliciter bonum,

Suoque reddas os verendum

Quale precans tulit ipse, Templo.

Hic



Hic vernet inter tela rigentia

Flos non caducus, sanctior implicet

Verbena lauros, & remistæ

Cum galeis lituisque mitræ.

Huc forsan olim progeniem rudem

Musis daturus deveniet senex,

Quem prælium *Nasebianum*

Incolumem Laribus remisit:

Ni fallor, hæc quam conspicias inquiet

Imago *Felli* est, En! venerabilem

Agnosco vultum, En! ora mirè

Dædaleâ simulata dextrâ.

Hic sæpe mecum (nam meminì) breves

Fallebat horas, nunc iterum alloquor

Nunc predo dextram, nunc amicas

Accipio, referoque voces.

Mecum Hic tremendam militiam tulit,

Dum sævienti pervigil horruit

Totus pruinâ, dum gelatis

Dirigui pariter sub armis.

Sed jam quiescit furdus, & immemor

Commilitonis, non iterum mihi

Spectandus; heu! fas sit rigare

Imbre pio cineres Amici.

Hæc



Hæc mœstus inquit. Cætera lacrymæ

Reddunt loquaces. O tumuli fitis

Avara, & immatura *Felli*

Mors viridem refecans senectam!

Vix flore pulcros vestierat novo

Lanugo vultus, cum decus extulit

Sublimem, & intonso dederunt

Pierides sua regna Phœbo.

At quanta adulto gloria contigit?

Quot ferta canam cæsariem feni

Cinxere? quantum innixa *Felli*

Imperio *Rhedycina* crevit?

Ad hunc cruenti quos studium asperum

Belli manebat, vel labor imperi

Fluxere, & auratæ per *Ædes*

Aonias micuere bullæ.

Hinc jam vigescit *Concilium Patrum*,

Multoque foetum germine nobili

Et decolorem cæde *Tibrim*,

Et luteum refugit *Lemanum*.

Regnante *Fello* floruit artibus

Pubes aviti nominis æmula

*Ormondus*, & qui Heroa finxit

*Aldricius* propiore curâ.



Sensere *Celtæ* magna quid indoles

Nutrita posset Socratico sinu,

Ingens quid *Ormondi* juventus,

Atque animi generosus ardor.

En cerno quanto vividus impetu

*Marcellus* alter proruat agmina!

Quantus reluctantes catervas

Fulmineo metat acer ense!

Sic *Mosā* inundans illuvie vagā,

Latè rapaci volvitur alveo,

Gregefque, filvasque, & virentes

Sternit agros, fata læta sternit.

Doctrina tantum pectora roborat,

Et fida vires promovet infitas

Cultura. *Felli* O prisca virtus!

O animæ sine labe candor!

Cur vita nequicquam pia labitur

Nec Te caducum, virgineus pudor,

Neve arma, neve artes *Minervæ*

Eripiunt *Acherontis* unda?

Dum sternit atro turbine *Carolus*

Procella fati, Relligio caput

Dum languidum luctu recenti

*Carolus* tumulo reclinat.

Regni



Regni ruinas æger & anxius  
 Labantis horres, mox miser interis,  
 Comes sub umbras infecutus

*Caroliden*, nimis heu! fidelis.

Sic marcet Anchises Priami rogo  
 Brevi superstes, sic adiit patrem  
 Et Ditis Æneas sonantem

Mox petiit novus hospes undam.

At O futuri mens hominum nimis  
 Præfaga! Si Te fata remitterent

Terramve spectares *Britannam*

Concilio Superum remissus;

Videre posses non sine gaudio  
 Pulsos cucullos, pictaque numina,

*Romanque* concussam, & minantem

*Nassovium* triplici Coronæ:

Videre posses, ut patriæ decus,  
 Bellique fulmen non imitabile

Florente Parnasso inter arma,

*Auriacum*, celebrant Camoenæ.

Quin Te loquuntur, dum Tibi fervida  
 Theatra clamant, faxaque personant,

\* Tuasque læto cum tumultu

Instituit *Rhedycina* pompas.

\* Comitia Oxoniensia.

Nec



Nec si peribit quod Tibi ponimus  
 Marmor dolentes, Tu simul occides;  
 Cunctis priorem Te reponent  
 Aoniæ, Tua cura, Musæ.  
 Te docta fastis gens memor inferet  
 Tibique surgent templa perennia,  
 Lauroque florentes columnæ,  
 Ad citharam properante faxo.

———Ædis Chr. Alumnus.

EXPERI-



---

EXPERIMENTA  
Machinæ Pneumaticæ

A B

HONORATISSIMO  
D. D. BOYLÆO  
INVENTÆ.

**I**Nclusam quâ vi Terram circum ambiat Aer  
Urgens mole gravi; errantes quo pondere cogat  
Particulas; quanto oppressus sese explicet ictu  
Carceris impatiens, primus, *Boylæe*, recludis :  
Nam Te Naturæ deferta per ardua dulcis  
Raptat amor; Tibi Res intactæ Laudis & Artis  
Debemus; Tibi fas soli cognoscere causas  
Abstrusas, *Verique* imos penetrare recessus.  
O Terræ Cœlique potens! qui Limen utrumque  
Exploras,



Exploras, geminique aperis commercia Mundi:  
 Tu referas quicquid secum meditatur in Aula  
 Aeriâ Juno; Imperii Tu detegis oras  
 Cærulei, liquidamque plagam, & pellucida regna.

Quin *Hyalum* profer, latum quod crescit in orbem,  
 Quâque *Tubo* aptatur, cerâ viscoque tenaci  
 Unge fovens, ne se insinuet penetrabilis Aer.  
 Atque ubi jam spatio expressâ eluctatur inani  
 Aura levis, tenuisque in ventos hausta recedit:  
 Continud fragor auditur; ruit omnis ab alto  
 Incumbitque Aer Phialæ; & densissima torto  
 Verbere Tempestas circum furit; illa fatiscens  
 Solvitur, & sparso scintillant fragmina vitro.  
 Sin sit convexa, & curvum lunetur in arcum,  
 Stat contra obluçtans, partesque gravata coerces  
 Firmius, æthereum pondus confisa figuræ  
 Contemnit, laterique illisam decutit auram.

Sic sese attollit nativo fornice septa  
 Testudo in Concham crescens, sic grandia faxa  
 Fert tergo impunè, & ferratos sustinet orbes  
 Vulneris haud metuens; nequicquam concava pulsu  
 Testa sonat, solidumque terit rota stridula dorsum.

Accipe nunc, quantas vires tenuissima quævis  
 Particula aëria emittat, quali impete sese

Expediat



Expediat vincla indignans: quin obice rupto  
 Non jam se capit expatiata, ita turbine magno  
 Evolat, & veterem poscit revoluta figuram.  
 Nam si Veficam Phialæ alvo includis, & auram  
 Crystallo errantem educis, ventosa tumore  
 Protinus affurgit Pellis, majorque videri  
 Vitrum explet, raucoque crepat displosa fragore.  
 Scilicet urgentis Cœli gravitate remotâ  
 Funiculi aerii exiliunt, & murmure circum  
 Clauftra fremunt, tentantque aditum, & latera undi-  
 que pulsant.

Non vi majori Tormentis emicat ardens  
 Sulphur, non ruptâ fulmen de nube trifulcum  
 Irruit, evertitque imis radicibus ornos.

Haud aliter vento, quos presso implevit Ulysses  
 Turgescunt Utres gravidi, dum flatibus intus  
 Hinc sævit Boreas, furit illinc turbidus Auster,  
 Explorantque viam: donec mox carcere fracto,  
 Erumpunt omnes turmatim, atque æquora miscent.

At fragilem saliens cum Rana intraverit Urnam,  
 Machinaque ingenti gyro circum acta rotetur:  
 Ecce! inflatum animal turgenti pectore anhelat,  
 Miraturque novam molem, atque immania membra;  
 Tum furiis accensum Hyali cava mœnia tundit,

Singul.



Singultusque ciet, mediâque in mortē recumbens  
 Distinctam ostendit maculis squalentibus alvum.  
 Illi Natura effinxit mirabile textum  
 Pulmonum, alternam tumidis qui follibus auram  
 Accipiant reddantque; illi altas ire sub undas  
 Indulgens dedit, ambiguâque senescere vitâ;  
 Nequicquam; tenuis nescit puri ætheris haustus  
 Erigere inflatu, & vacuas distendere cellas.

Sic ubi captivus limosâ educitur undâ,  
 Et patitur Cœlum Piscis; mox frigore ficcum  
 Horrere aspicias, durisque rigescere squamis.

Id metuens serâ *Teneriffam* nocte Viator  
 Ascensu cautus superat, quando Aera Vesper  
 Humentesque umbræ densant, fumique volucres:  
 At sub mane ruit, montisque è vertice præceps  
 In Valles fertur, dubiâ cum luce rubescit  
 Nondum pura dies; nempe orto Sole vapores  
 Diffugiunt, simplex terrenâ facie relictâ  
 Rarefcit, non jam ulterius spirabilis Æther.

Quid referam in Vitro Sonus ut vanescit, & aures  
 Debilis arrectas fallit, longeque recedens  
 Paulatim moritur? Radios ut vibrat inertes,  
 Et tremula incerto languescit lumine Tæda;  
 Ut Lympha ebullit magno commota tumultu,



Exultantque intùs latices, dum roscida Fontem  
 Mentitur, crebrâque aspergine subfilit unda  
 Irriguas simulans scatebras. Sic Cynthia Nerei  
 Turbatas attollit aquas; furit æstus arenis,  
 Atque agitata imo fervereunt æquora fundo.

*Henr. Stephens, A. B.*

*Coll. Mert. Socius.*



*In* OBITUM  
Reginæ MARIÆ:  
*Anno* 1695.

O Umbra Divis mista volentibus,  
Matura sacris heu nimium choris;  
Quæ patrio donata cœlo

Inter avos atavosque regnas!  
O quæ receptum in sidera Carolum  
Utrumque spectas! ô cui brachiis  
Occurrit expansis Elisa,

Et capiti nova ferta nectit!  
Spectare ab alto si vacat æthere  
Terras relictas; si lachrymabiles  
Luctûs Triumphos, & sepulchri

Cernere non vacuos honores:  
Videbis Isin nunc tua funera  
Plorare; & umbræ carmina nobili  
Donata consecrare, partem

Funerei haud minimam Triumphî;



Videbis atras ut decoret vias

Pullatus ordo virginum; amabili

Decora luctu turba, telæ

Immemores simul & choreæ:

Videbis ægro murmure conqueri

Durum, relictâ cuspide, militem;

Tuumque, jam primum propinquo

*Nassaidem*.trepidare fato.

Hic inter omnes impavidus stetit

Mortis tumultus; undique militum

Turmas ruentes, ultimosque

Audierat gemitus cadentum.

Illum nec armis fusus Hibernicis

Senilis Heros; nec tua funera,

*Graftone*; nobilesve rapti

*Talmasii* quatiunt ruinæ.

Tu prima magni pectora Conjugis

Maria, frangis; jam refugit metu

Percussus Heros; & madenti

Infolitus tremit ore pallor.

Tu leniebas consilio Ducis

Duros labores; Tu, Dea, gaudium

Quæ semper illi, quæ Britannis

Una dabas, dabis una luctum.

Eheu!



Eheu! genarum purpureum decus,

Eheu! nitentis fulgura luminis,

Formæque flores (heu) caducos

Corripuit maculosa pestis.

Quis jam levabit, quis miserabilis

Luctus egeni? quis viduæ feret

Solatum? quis dulce reddet

Auxilium fragili senectæ?

Absente quis nunc incolumes Duce

Præstabit Anglos? Imperium maris

Quis asseret, quis tradet igni

Celtiacas iterum carinas?

En! flamma ferventi æquore volvitur

Contraria; en! puppes avido Thetis

Mergit barathro, semiustos

Dum liquidus lavat ignis artus.

En! acta nigro sulphuris impetu

Surgunt in altum corpora fumea.

En! spectro nubes inter altas

Attonitos volitare Gallos.

Frustra at *Mariæ* tempora laureæ

Cingunt coronæ; frustra agit Anglia

Victrix Triumphos: Gallicanis

Sævior (heu) Libitina telis



Divam subegit. Non populi preces  
Te, chara, fervant; non miseræ graves  
Gentis querelæ; non repellit

Fulmineum Tua laurus iētum.

Frustra auget undas navita fletibus,  
Damnatque Parcas & sua sidera;  
Armatque classēs; (heu!) sepultam  
Nulla ratis Dominam reducet.

Quin interemptâ restat adhuc Deâ

Spes una; restat *Nassides* suæ

Custos Britannix, superque

Celtiacas metuendus oras.

I, magne Princeps, Borbonias Tuo

Expelle naves victor ab æquore;

Et Gallicæ agnoscant triremes

Supplicibus Tua signa velis.

*Ant. Alsop, A. B.*

*Ædis Chr. Alumn.*

In



In

NOVUM HOSPITIUM,

*Chelseiani prorsus æmulum, ad Occidentalem Dublinii Plagam feliciter extructum.*

**D**I C, precor, Amphion quali Chelys Enthea plectro  
 Insonuit, quantisque levi sub pollice nervis  
 Facundum trepidavit ebur; cum faxea moles  
 Senferat insolitum blando percussa furore  
 Carmen, & attonito rueret digesta tumultu:  
 Cum nova discordem fociare industria cœpit  
 Congeriem, certaque fide coalescere iussit  
 Unanimesque rapi concursu in moenia rupes.

Dic mihi, nam magicâ quamvis testudine Musa  
 Instaurare urbes captivaque ducere saxa  
 Nesciat; instaurata tamen celebrare superbit,  
 Extructasque arces audaci attollere cantu.

Parte sub extremâ *Eblanæ*, quâ tramite noto  
 Tendis in occasum, viridi donata recessu,  
 Surgit amœna domus, quæ limine densa frequenti,

Multipli-



Multiplicesque Lares spatiofoque atria magna  
 Amplexu numerat, vasta que capacia turbæ  
 Mœnia, & immanem latis compagibus alvum.  
 Urbem habet una domus: seu dicere gentis Hybernæ  
 Palladium commune velis, ubi milite crebro  
 Fervet, quem fida in *Carolos* compescere motus  
 Civiles docuit Pietas, & nobilis ardor  
 Pectoris intrepidum misit per tela, per hostes,  
 Fulmineosque globos, atque atrum sulphuris imbrem.  
 Seu quoque castra voces veteres ubi lege Phalanges  
 Exercens variâ, innocuam sub imagine pugnam  
 Mentitur miles, simulachraque Martia ludit.

Stat sibi præsidium moles operosa, colonis  
 Muniturque suis; nec abest placidissima faxis  
 Gratia munitis; hinc præterlabitur amnis  
 Lenior ambiguisque susurrans flexibus errat;  
 Illinc fœcundum indefesso lumine campum  
 Metiri datur, & virides pulchro ordine silvas,  
 Vallesque & lætis flaventia messibus arva.

Aereis conis turritâ & Fabrica fronte  
 Declives longè cursus solisque labores  
 Prospicit occiduos, cum fesso mitior igne  
 Ire solet, quem fama refert (ubi flexus ab axe  
 Sideream molem, & surgentes viderit arces)

Attonitum



Attonitum his tandem rupisse silentia dictis,  
( Dum maris Indigenæ propero accedere natatu  
Cæruleæque Deæ medio emersere profundo. )

Quà passim dubii penetro confinia mundi  
Extremasque oras æternâ luce pererro,  
Nil mihi dignum adeo nec tam mirabile visu  
Occurrit, nec enim superas jactare juvabit  
Dardanidum turres, testataque mœnia Phœbum  
Artificem, nec quas jactat felicior arces  
*Eblana*, elatos apices atque æmula fæxa  
Cœlorum, nec sacra mihi nec sacra Camœnis  
Templa placent; ingratus honos & inutile nomen.  
Sæpe suas ( quoties spissâ caligine languet  
Pallidus Autumnus, lethalique incubat Auster  
Nube gravis, cœlumque udis contaminat alis )  
Musæ indignantur sedes, nimiumque superbi  
Martis tecta petunt, & vel sibi Pallas inermis  
Invidet armatæ: placidos dumque ipse recessus  
Suspicio moriente die, mihi dextera pronum  
Sponte retardat iter, frænoscque tenacior urget  
Adstrictos, nimixque moræ dispendia poscit,  
Vix ea, cùm leges æternaque fœdera cœli  
Increpuere moras, & dicere plura volentem  
Æquoreis mersere undis —————

Tuque



Tuque, Gradive Pater, fulgente invec̃tus amictu  
 Aerix̃ nebulæ, armorum dum splendidus ære  
 Immortale jubar vibras, lucemque coruscant,  
 Sæpius adversas aspectas desuper arces,  
 Et senio emeritas gaudens lustrare cohortes,  
 Ora vides horrenda, & hiulcis aspera rugis,  
 Immanesque artus, rigidâ & membra hispida silvâ,  
 Reliquias belli ingentes, monumentaque gestis  
 Facta suis, lacerumque cruenti insigne Triumphi.

Tales dimidii spirant in marmore vultus  
 Fumo squalientes, & multo pulvere turpes;  
 Vulneribus pars nulla vacat, labefacta ruinæ  
 Membra premunt, patulique horrent in corpore fulci.

Hic dubii expertus repetita pericula belli  
 Evulsos oculi nervos & vincula tabo  
 Ostentat disrupta, & inanem luminis orbem.  
 Hic pedibus læsus, memori de vulnere tardus  
 Claudicat, & torvâ conversus fronte superbit,  
 Incessu lato, atque alternis passibus impar.  
 Ille minor cubito, veteri pro more lacertos  
 Jactat inæquales, gelido dum sanguine torpet  
 Lævæ truncus iners, vacuæque injuria pendet  
 Deformis manicæ, lunatæ opprobria dextræ.

Sic ramos lacerata, annoso corpore quercus



Silvæ crescit honos, & crebro faucia ferro  
 Fronte petit superâ nubes, sic tuta ruentes  
 Ventorumque minas, & tela trifulca laceffit.

Non ultra querulis lassat sua brachia mater  
 Planctibus, & prono aversum super oscula vultu  
 Fusa tenet natum, tardis nec noctibus uxor  
 Ingemit, & pavidis ducit suspiria votis.  
 Matre jubente ruit proles, ardetque cruentâ  
 Tempestate frui, patriæque impendere vitam,  
 Et cæco miscere undantem turbine campum;  
 Vulnus amat, plauditque sibi mercede superbus  
 Oblatâ, pretioque juvat sua damna pacisci.

*Jo. Whitfeld, è Coll. Mert.*

**Ad**



Ad Insignissimum Virum  
D. THO. BURNETTUM,  
*Sacræ Theoriæ Telluris Autorem.*

**N**ON usitatum carminis alitem,  
*Burnette*, poscis, non humiles modos:

Vulgare plectrum, languidæque

Respuis officium camœnæ.

Tu mixta Rerum Semina conscius,

Molemque cernis Diffociabilem,

Terramque concretam, & latentem

Oceanum gremio Capaci:

Dum Veritatem quærere pertinax

Ignota pandis, sollicitus parùm

Utcunque stet commune Vulgi

Arbitrium & popularis Error.

Auditur ingens continuò fragor,

Illapsa Tellus lubrica deferit

Fundamina, & compage fractâ

Suppositas gravis urget undas.

Impulsus



Impulsus erumpit medius liquor,

Terras Aquarum effusa Licentia

Claudit vicissim; has inter orbis

Reliquiæ fluitant prioris.

Nunc & recluso carcere lucidam

Balæna spectat Solis imaginem,

Stellasque miratur natantes,

Et tremulæ simulacra Lunæ.

Quæ pompa vocum non imitabilis!

Qualis calescit spiritus Ingeni!

Ut tollis undas! ut frementem

Diluvii reprimis tumultum!

Quis tam valenti pectore ferreus

Ut non tremiscens & timido pede

Incedat, orbis dum dolosi

Detegis instabiles ruinas?

Quin hæc cadentûm fragmina montium

Natura vultum sumere simplicem

Coget refingens, in priorem

Mox iterum reditura formam.

Nimbis rubentem sulphureis Jovem

Cernas; ut udis sævit atrox Hyems

Incendiis, commune mundo

Et populis meditata Bæstum!

Nudus



Nudus liquentes plorat Athos nives,

Et mox liquefcens Ipse adamantinum

Fundit cacumen, dum per imas

Saxa fluunt refoluta valles.

Jamque alta cœli mœnia corruunt,

Et Veftra tandem Pagina (proh nefas!)

*Burnette*, Veftra augebit ignes,

Heu focio peritura Mundo.

Mox Æqua Tellus, mox fubitus viror

Ubique rident: En teretem Globum!

En læta vernantis Favonî

Flamina, perpetuosque flores!

O Pectus ingens! O Animum gravem,

Mundi capacem! fi bonus auguror,

Te, noftra quo tellus fupèrbit,

Accipiet renovata Civem.

*Jo. Addifon*, A. B. è Coll. Magd.

MARIA



# M A R I A

## R E G I N A

*Ex Gente* E S T E N S I.

**D**iva potens formæ, sceptri Regina Britanni  
Immortale decus, Cui frontis gloria majus  
Imperium, & latos tribuit toto orbe Triumphos.

Diva favens adsis, laudique, *Maria*, secundos  
Sterne Tuæ cursus; primæ incunabula famæ  
Seu referare juvat, priscumque à Cæsare Nomen  
Majorum eruere, & multâ deducere virgâ;  
Sive Tuis meritos aris libamus honores,  
Et Tibi solenni instaurantes Orgia ritu  
Angliacæ canimus, Præses Saturnia, terræ  
Magna Jovis Conjux, & digna Tonante Britanno.

Talis eras Paphiâ frontem redimita coronâ,  
Cum Veneri lætos indixisti Hymenæos.

Postquam



Postquàm omnis Comitum longè processerat ordo,  
 Ipsa aderas alias inter præstantior omnes,  
 Insignisque auri radiis, & luce smaragdi;  
 Dives opum, & vultu melior: Berecynthia Mater  
 Instituit talis lætas festiva choreas,  
 Dum Socias inter mediâ spectabilis urbe  
 Incedit, gradiensque altis cervicibus extat.

Quæ Tibi tum roseo Majestas ludit in ore  
 Intactam perfusa nivem? cui plurima flammam  
 Purpura subjecit, castâque in fronte Pudoris  
 Illuxere faces; sed vultum obnubit amictus,  
 Involvitque diem; sic umbra obducit opaca  
 Purpureos cœlorum ignes, Titaniaque astra.

Jamque oculos pompa invadit, cum finibus olim  
 Angliacis hospes, cum jam *Thamesina* subires  
 Ostia, sentit onus *Thamesis*, fluctuque superbo  
 Expatiat ovans, placidoque exuberat æstu.

Intereâ mediis, avidus spectator, ab undis  
 Neptunus, viridi implicitum caput extulit algâ,  
 Et vultum attonitus, suspensa silentia rupit.

“Prima, nec indignor, cedat Tibi gloria fortis,

“Æthereasque regas Dictæus Jupiter arces;

“Jam mihi surgit honos, crescitque immane Tridentis

“Imperium, cœlosque æquant Neptunia regna,

“En



“En nova cæruleo emergit Dea Cypria ponto  
“Nereidum comitante choro; Quæ jura furenti  
“Dat pelago, rapidosque jubet mitescere fluctus.  
“Nympha potens salve, nostri gratissima Regni,  
“Advena, Quæ Thetin exuperas pulcherrima, quantum  
“Ipsa Thetis reliquas superat pulcherrima Nymphas:  
“Aurea sic tumidos radianti lampade fluctus  
“Luna ferit, tremulus latè super æquora splendor  
“Emicat, & vastum incendit multo igne profundum.  
Dixerat, & rauco confusum murmure littus  
Intremuit, plausuque secundo immugiit æther.

Servit, Diva, Tibi quascunque allaberis oras  
Lætus honos, longè clamorque & plausus ovantum  
Affequitur gressus; seu Gallica regna peragras,  
Mox induta novo incandescit Gallia cultu,  
Præsentem confessa Deam; fulgore coruscat  
Terra sacro, rutiloque albescit femita tractu.  
Sive per Italiam transis, mox Itala tellus  
Sponte suâ croceos ridens vestitur amictus;  
Fragrantem circa nebulam jucundior aer  
Fundit, & undantes redolenti Nectare rores.

Sic ubi Mænalios Virgo Latonia saltus  
Ingreditur, jactatque humeris resonantibus arma  
Venatrix, crines latè per colla fluentes



Luxuriant, atque Ambrosios Dea spirat odores.

Quàm lætas indulget opes Saturnia tellus  
Indigenis, quali ridet Tua patria luxu?  
Illic vere novo, cùm primæ à vulnere gemmæ  
Materno erumpunt, passimque injussa superbit  
Herbarum pubes, ac florum lucidus ordo;  
Non sic Hyblæi fragrantia germina colles  
Exhalant, quoties Zephyrus mulcentibus alis  
Nascentes libat violas, lætosque Hyacinthos.  
Illa ferax opibus tellus, ubi quælibet arbor  
Sudat odorato spirantia Balsama succo;  
Lenæusque Pater generosâ vite coronat  
Purpureas valles, stratique fluentibus agri  
Luxuriant ramis, dum pondere lassâ tument  
Nutat curva arbor, foetuque premente gravescit.  
Illic mala nitent auro ditata, putares  
Hesperidum florere nemus, cui fulgida poma  
Ardescunt, flavoque rubent pretiosa metallo.

Sed mihi quanta acies, vel quis suffecerit ardor  
Per juga panda sequi, per nubiferumque cacumen:  
Quà procul aeriam latè Pater Appenninus  
Erigit in superos frontem? premit hispida durum  
Colla gelu, & canus latet inter sidera vertex:  
Porrigit Ille avidos per tædia multa viarum



Ad Mutinam gressus; Latios dorſa aspera campos  
 Valtâ mole fecant, *Mutinesesque* ardua turreſ  
 Deſpectant, longoque patent immania tractu.

Tu *Mutina* ante alios multùm dilecta reſeſſus,  
 Multùm digna cani; longos dominantia in annos,  
 Tu quondam *Eſtenſis* primordia maxima ſtirpis,  
 Vagitumque ingentem, atque incunabula læta  
 Heroum, & teneros cœlo plaudente *Mariæ*  
 Vidisti riſus: lævum Saturnius arce  
 Cum intonuit Pater, & flammas per inane coruſcas  
 Diſjecit, certique dedit læta omina regni:  
 Eſt via, quâ collis frondenti aſſurgere dorſo  
 Gaudet, vernantique jugum veſtire coronâ:  
 (Planities lata indè patet, cui flumina circum  
 Fundit humus flores, viridique inducitur umbrâ)  
 Acclivem, *Mutina*, in frontem, tua mœnia tollis,  
 Et fluvii curſus, & dulcia proſpicias arva;  
 Tardior hinc *Panarus* dilectæ allabitur urbi,  
 Inneſcitque moras, laſcivaque murmura miſcens,  
 Hinc, atque hinc udæ libat mille oſcula ripæ.  
 Protinùs Hæc vario circum undique fuſa colore  
 Læta nitet, depictas fœcundo ubere valles  
 Jaſtat, & æternos opulenti ruris honores.

Sic tibi Roma urbem campi ſubjecta coronat



Planities, blandi quâ mollior aura Favoni  
 Ludit, dum facilis juxta leni agmine Tiberis  
 Labitur, & placido testatur gaudia fluctu.  
 Terra Tibi similis, Regina, atque æmula vultûs  
 Diva Tui, radios spargit, lumenque juventæ  
 Purpureum.

Sic Mutina æthereas surgit sublimis in auras,  
 Hinc sibi vicinas *Veronæ* despicit arces,  
 Hinc *Patavi* campos, & *Bolognensia* castra:  
 Tuque etiam acclini demittis vertice turres  
 Æmula quantumvis *Ariostum*, *Mantua*, jactes  
*Virgiliumque* tuum. — Talis mihi pectora fervor  
 Incendat, similique ruat per anhela tumultu  
 Corda furor pulsans: Quis enim, Regina valebit,  
 Quis Proavos celebrare Tuos, à sanguine Divûm?  
 Quis digno poterit *Forrestum* attollere cantu?

Ille ubi grassantes adverso Marte Phalanges  
*Hunnorum* vidit Latiis incendia campis  
 Jactare, atque urbes hostili involvere flammâ:  
 “Quis mecum, exclamat, miseræ spondere salutem  
 “Audebit Patriæ? stat certè avertere pestem  
 “Communem terris, vel honesto occumbere fato.  
 Dicta fides sequitur, parvâ stipante coronâ,  
 Perque hostes, perque arma ruit, latam undique cladem

Sternit,



Sternit, & ingentes confusæ cædis acervos;  
 Huc, illuc adigit violento fulmine turmas,  
 Exosumque pecus procul *Hunnos* finibus arcet.  
 Nec magis *Almannis*, Tibi nec, gens *Vandala*, campos  
 Vastanti *Ausonios*, belli fortuna pepercit:  
 Namque volans mediis se fervidus ingerit armis,  
 Perque globos immane furens, *Acarinus* inundat;  
 Mille cadunt cæsi duro discrimine, mille  
 Captos vincla premunt; paucos à morte redemit  
 Noctis amica quies, tacitæque silentia *Lunæ*.

Quis referat præclarum *Azo*, bellicue potentem  
*Barsilium*, *Narcemque* cruento rore madentem,  
 Insignemque armis fulgentibus *Aldovardum*?  
 Quis *Borsum* celebrabit, *Amazoniamque Matildin*?  
 Tuque *Erneste* ardens, & *Berengarius* Heros,  
*Albertusque* ferox, & *Saracennius* *Otho*  
 Ingens fama, *Domûs* magnum decus *Atestinæ*:  
 Tu tamen antiquos ingentia stemmata Patres,  
*Rinalde*, exsuperas, viridi Tibi tempora lauro  
 Innectit *Tasso*, sacras *Latonius* artes  
 Cui dedit, & plenâ indulsit sua munera flammâ.

Quantus *Judæis* *Rinaldus* victor in arvis  
 Ibat! qui medio *Turcarum* ardente tumultu,  
 Appetere invisum Superisque, hominique Gigantem



(Incessu lato, & magnâ se mole moventem)

Aufus, & imparibus bellum decernere telis :

Illi alternantes in mutua vulnera surgunt,

Et ferrum obnixi infigunt, collisæque vastos

Dant sonitus arma, atque exundant imbre cruento.

Tum sic *Rinaldus* : “ Non te mea dextera vincit,

“ Cede Deo, magnum te certo vulnere Numen

“ Immolat, & dicens capulo tenus egit in imas

Mucronem costas, nec dum media ilia rupit.

Ille tremit graviter frendens, cum vertice pronus

Volvitur, & sese per totam extendit arenam.

Sic ferro percussa ingenti robore quercus,

Huc, illuc nutat tremefacta, & vulnere duro

Victa cadit; magno tellus commota fragore

Horrescit, gemituque vago nemus omne remugit.

Proximus accedit, sed major semper in armis

Emicat *Alphonsus*, teneris qui doctus ab annis

Primitias hausit Juvenis, bellicæ cruenti

Dura rudimenta; Ille artes in utraq; paratus,

Seu dubium regere Imperium, si forte minaci

Turba fremit strepitu, sævitque ignobile vulgus:

Seu galeam indutus, sælici hastilia dextrâ

Vibret, & in densos immani turbine campos

Ingruat, horrendumque externis intonet arvis.



Si titulos, *Alphonse*, Tuos numerare velimus,  
 Si magnas Patrum exuvias, atque agmine facto  
 Congerere annales, Major Tibi gloria surgit  
 Major adhuc fama est Divam genuisse *Mariam*;  
 Prole Tuâ fœlix, fœlix simul Illa Parente!  
 Illam stirpis honos, & Aviti sanguinis ordo  
 Evehit ad cœlos, atque inter Numina tollit.  
 Illa suis fulget Titulis, & Nomina jactat  
 Prolixa, & seriem fœcundam ostentat honorum.

Haud secus audiivi exundanti flumine ripis  
 Intumuisse suis, & pleno gurgite Nilum  
 Per campos ferri; dum fontis nobile traxit  
 A Cœlo caput, & superis immiscuit astris.

Quanta, *Maria*, Tibi laudum seges, æquore quanto  
 Panditur, & magnæ ditiescit gloria messis!  
 Seu longè à Patriis *Jacobus* finibus Exul  
 Egregius properet (dum vexat tristis Erinnyes  
 Vipereis Anglos odiis, & murmura plebi  
 Inspirat cæca, atque horrendi semina belli.)  
 Te quoque per similes eadem fortuna dolores  
 Impulit, & sequeris per tot dispendia, fati  
 Confors indefessa, atque inviolabile pignus;  
 Una salus, unum Vobis commune periculum.  
 Seu populo rursùm adversante, & forte novercâ  
 Tendit



Tendit ad algentes Boreali cardine Scotos;  
Tu comes ire paras, atque effera turba potentis  
Imperium formæ agnoscunt, Teque auspice Diva  
Et vulgi rabiem fregit, pelagique tumultus.

Sic comites Divos ostentat Troïus Heros,  
Securusque ruit, densa inter tela, per ignes,  
Perque maris, vastæque exhausta pericula terræ.

Sed damnat Fortuna nefas, ac fœnore multo  
Præteritos reparat casus, & crimina fati;  
Jam vultu meliore dies, nitidosque juventâ  
Instauras, Saturne, annos, seriemque superbis  
Infantem revocare, & lætam evolvere scenam.  
Jam video, nec vana fides, per compita plausus  
Ingentes furere, & sacras effervere pompas.  
En Diva incedit solenni invecta triumpho,  
Dumque oculi latè radiorum tela coruscant  
Ipsa micat stellis fulgentibus intertexta.

Æthereâ nuper lapsus Cyllenius arce,  
Fragrantisque imbres Nardi, & redolentis Amomi  
Perfundit rivos, dum molli tempora ferto  
Implicat, & ramo nectit fælicis olivæ.  
Fusa utrinque cohors Magnatum, atque ordine longo  
Turba nitet Procerum; sequitur dum splendidus ære  
Miles, & ignitæ lucent umbone Phalanges.



Haud fecus ardenti radiorum fulgure cincta,  
 Æternoque armata die, cum Juno superbâ  
 Majestate sedet, quatit hinc circum Ægida Pallas  
 Bellatrix, illinc Pharetrâ metuendus Apollo  
 Præsidet, & rutilis Mavors Pater horret in armis.

*Jo. Whitfeld, A. B. Coll. Mert. Soc.*  
 recitavit in Theatro Apr. 23. 1685.

CAROLUS,



CAROLUS,  
WALLIÆ PRINCEPS,  
EX  
HISPANIA REDUX

Anno 1623.

**C**ongerite fascēs, struite lignorum pyras,  
Totusque largâ fulgeat vicus face,  
Stellentur urbes singulæ flammis suis,  
Trabesque & ipsa tigna conferte in focum.  
Campana festos multa proclamet sonos,  
Funes strepentes brachium vexet frequens.  
Nostram Apparatus iste Pietatem decet,  
Simplex, & hilaris iste, vernaculus, probus,  
Extemporale gaudium quicquid jubet.

Te sumptuosis mulceat ludis licet  
*Hispana* tellus, illa meditados Tibi  
Paret triumphos, pompam ut ostendat *suam*:  
Nos tantum Amorem cupimus: haud Nobis vacat

Rude



Rude expolire Gaudium, & moram pati  
Cunctantioris Ingeni; subitum damus,  
Erumpit importuna Lætitia, & sonum  
Ingeminat unum, *Carolus* Princeps redit,  
Revisit *Anglos Carolus* Princeps suos.  
Spectetis, *Ipsè* est. Densa jam premit vias  
Avida videndi turba, scintillat frequens  
Oculis fenestra; quin & ancipiti pede  
Crepidines hic scandit, & Magnæ Domûs  
Proclive culmen. Quisque nunc epulum suo  
Oculo voraci præbet, haud fatiat tamen.  
Spectetis, *Ipsè* est; jam nec obscurat genas,  
Dubiosque cultus artifex tegit coma;  
Sed clarus, & noscendus, & facie suâ,  
Stat liberalis jam sui, & largus manu.

Secede tandem Turba: sat vobis datum,  
Sat impedistis, jam suam pergant viam  
Ad Aulam; ubi illum charior manet sinus,  
Et prole tantâ digna Majestas Patris.  
Quàm dulce collo pondus incumbet tuo?  
Quàm differere amplexibus? quantum *Hic* modò  
Flebitque spectabitque? Quis strepitus erit  
Tumultuantis gaudii? Quàm nunc putem  
Auresque & animos ore pendentes tuo?

Dum



Dum propriam nunc *Ipsè* commemoras viam,  
 Iterque quicquid vidit, aut fecit novum,  
 Probasque populi vota, confutas metus,  
 Et quanta fueras cura Fortunæ refers,  
 Quamque innocentes suspicabamur Deos,  
 Quàm mitis unda, quàm Tibi stratum mare,  
 Lævis *Pyrene*, comis *Hispanus* fuit,  
 Quodcunque de Te Fama narravit loquax,  
 Quodcunque finxit. Parce trepidanti *Angliæ*,  
 Quisquis severus es Patriæ Censor nimis,  
 Hunc Charitas creavit, hunc Fides Metum,  
 Nec curiosa nostra, sollicita fuit.

Ceu Mater alma Filium emittens suum,  
 Omnes susurros captat, & cudit sibi  
 Quod porrò metuat, ipsum & hoc pavet procul,  
 Et quicquid oculos habeat, haud tutum putat.

Nunc si quid olim Vota suggererent Boni,  
 Sperâsse gaudet, sive quid dubius Timor  
 Offendit, hîc errâsse vel gaudet magis,  
 Spectaculo jam tota perfruitur suo,  
 Tantoque fidos Pignore absolvit Deos.

*Jo. Earle, Coll. Mert. Soc.*



In JUVENEM NOBILEM  
SIDNEIUM,  
CAROLI MONTACUTI  
FRATREM,

Occisum à *Batavis* in Navali Prælio Anno 1672.

O D E.

*Mater Defuncti, & Umbra.*

*M.* **D**UM noctis tenebræ & grata silentia  
Componunt oculos, dum lacrymis bonus  
Irrepat sopor, astat  
O spes atque Decus Tuis.

*U.* Te, Mater, vacuâ solor imagine:  
Nec me restituunt fata, sed opprimi  
Te mœrore Diurno  
Nocturnoque vetat Deus.

*M.* At saltem in patriâ debueras domo  
Extingui, in patriâ debuerant domo  
Te flevisse Sorores  
Planctus inter & Oscula.

*U.*



*U.* Sic viles animas, sic timidos mori

Lethæo tacitum condit in alveo.

Fatum: Mene supremo

Linquat Laudis Amor Die?

*M.* Quid, *Sidneje*, juvat fervor, & ultimo

Partum Marte decus, quem loca squalida,

Quem tetræ Stygis ulva,

Cocytusque tenet Lacus?

*U.* His me Fama locis extulit, inferens

Diis consanguineis. Me comitem accipit

Clarâ quâ micat ingens

*Sandovicus* adoreâ.

*M.* Quin *Belga* haud meruit talia; Sanguine

Non æquo intumuit Pontus, & infimâ

Nostrium facere cruorem

Misceri doluit Mare.

*U.* At cœlo placuit. Tu pia nœniis

Jam parce, atque vale: me subitus vocat

Portæ stridor Eburneæ,

Et surgens pelago Dies.



## POCOCKIUS.

**D**UM cæde tellus luxuriat Ducum  
Meum Pococki barbiton exigis,

Manesque Musam fastuosam

Sollicitant pretiosiores.

Alter virentum proruat agmina

Sonora Thracum, donaque Phillidi

Agat puellas, heu decoris

Virginibus nimis invidenti.

Te nuda Virtus, Te Fidei pius

Ardor ferendæ, sanctaque Veritas

Per faxa, per pontum, per hostes

Præcipitant Asiæ misertum:

Cohors catenis quâ pia stridulis

Gemunt onusti, vel fude trans sinum

Luçantur actâ, pendulive

Sanguineis trepidant in uncis,

Sentis ut edunt fibila, ut ardui

Micant Dracones, Tigris ut horridos

Intorquet ungues, ejulatque

In madido Crocodilus antro.

Vides



Vides Lacunæ sulphure lividos  
Ardere fluctus, quæ stetit impiæ  
Moles Gomorrhæ mox procellâ  
Hauſta rubrâ, pluuiisque flammis :  
Quod iſta tellus ſi ſimiles Tibi  
Si forte denos nutrierat Viros,  
Adhuc ſtetiffet, nec vibrato  
Dextra Dei tonuiſſet igne.  
Quin nunc requiris teſta virentia  
Nini ferocis, nunc Babel arduum,  
Immane opus, creſcentibuſque  
Vertice fideribus propinquum.  
Nequicquam: Amici diſparibus ſonis  
Eludit aures neſcius Artifex,  
Linguaſque miratur recentes  
In patriis peregrinus oris.  
Veſtitur hinc tot Sermo coloribus,  
Quot Tu, *Pococki*, diſſimilis Tui  
Orator effers, quot viciffim  
Te memores celebrare gaudent.  
Hi non tacebunt quo Syriam Senex  
Percurrit æſtu raptus, ut arcibus  
Non jam ſuperbis, & verendis  
Indoluit Solymæ ruinis.



Quis corda pulsans tunc pavor hauserat!

Dolor quis arsit non sine gaudio,

Cum busta Christi provolutus

Ambiguis lachrymis rigaret!

Sacratur arbos multa *Pocockio*,

Locosque monstrans inquiet accola

Hæc quercus Hoseam supinum,

Hæc Britonem recreavit ornus.

Hic audierunt gens venerabilem

Ebræa Mosen, inde *Pocockium*

Non ore, non annis minorem,

Atque suam didicere linguam.

Ac sicut albens perpetuâ nive

Simul favillas, & cineres finu

Eructat ardenti, & pruinis

Contiguas rotat *Ætna* flammæ;

Sic Te trementem, Te nive candidum

Mens intus urget, mens agit ignea

Sequi reluctantem *Ioel*em

Per tonitru, aeriasque nubes.

Annon pavefcis, dum tuba Pallidum

Ciet *Sionem*, dum tremulum polo

Caligat astrum, atque incubanti

Terra nigrans tegitur sub umbrâ?



Quod agmen! heu quæ turma sequacibus

Tremenda flammis! quis strepitantium

Flictus rotarum est! O *Pococki*

Egregie, O animose Vatis

Interpres abstrusi, O simili ferè

Correpte flammâ, Te, quot imagine

Crucis notantur, Te, subacto

Christicolæ gravis *Ottomannus*

Gemens requirit, Te Babylonii

Narrant Poetæ, Te Pharetris Arabs

Plorat revulsis, & fragorosos

Jam gravior ferit horror agros.

Quà Gesta nondum cognita Cæsaris,

Quà nec Maronis scripta, *Pocockius*

Floratur ingens, & dolenda

Nestoreæ brevis Senectæ.

*E. Smith, Ædis Chr. Alumnus.*

**F I N I S.**









PL







